



Milik Departemen P dan K  
Tidak diperdagangkan  
Untuk umum

# Hikayat Tajul Muluk I

Ramli Harun



atorat  
aan

Departemen Pendidikan dan Kebudayaan



PPS/Ac/7/81

PERPUSTAKAAN  
DIT. TARIQ SHIDQIEN NBSF  
DILBUDPAR

Milik Dep P dan K  
Tidak diperdagangkan

# Hikayat TAJUL MULUK I

Alih Aksara  
Oleh  
RAMLI HARUN

PERPUSTAKAAN	
DIT. TARIQ SHIDQIEN NBSF	
DILBUDPAR	
NO. INV	: 2110
PEROLIHAN :	
TGL	: 4-5-89
SANDI PUSTAKA:	

Departemen Pendidikan dan Kebudayaan  
PROYEK PENERBITAN BUKU SASTRA  
INDONESIA DAN DAERAH  
Jakarta 1982

Proyek Penerbitan Buku Sastra  
Indonesia dan Daerah

Hak pengarang dilindungi undang-undang

PERPUSTAKAAN  
DIT. SEJARAH & NILAI TRADISIONAL

Nomor Induk : 1637/1984  
Tanggal terima : 26-12-1984  
Bent/hadiah dari : proyek PBSI 40  
Nomor buku :  
Kopi ke : 3

# **HIKAYAT TAJUL MULUK I**

## **KATA PENGANTAR**

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1982

**Proyek Penerbitan Buku Sastra  
Indonesia dan Daerah**

## **PENGANTAR**

Menurut Ishak Peutua Gam, naskah hikayat Tajul Muluk ini merupakan hasil salinannya sendiri yang dikerjakannya sekitar tahun 1970. Sumbernya adalah sebuah naskah lama yang tidak diketahui nama pengarang aslinya dan tahun penyusunannya. Hal ini diungkapkannya pada kesempatan bertemu dengan kami tanggal 20 Juni 1982 di kediamannya di Meureudu. Dikatakan juga bahwa ia telah merubah beberapa kata yang terdapat dalam naskah sumber sesuai dengan selera bahasa yang dimilikinya. Namun tidak merubah jalan ceritanya.

Naskah salinan huruf Arab ini kami peroleh dari Pusat Dokumentasi dan Informasi Aceh bulan September 1981, dengan ukuran 21,5 cm X 16,5 cm. Tebalnya 401 halaman dan tiap halaman terdiri dari dua puluh lima baris.

pengaruh mempengaruhi dalam jalan cerita hikayat Aceh nampak kuat dalam Tajul Muluk. Untuk bahan studi perbandingan, hikayat ini kiranya perlu dipelihara. Kami telah mengalihaksarakan hikayat yang cukup panjang ini kedalam huruf Latin dengan memberikan ringkasan ceritanya. Semoga ada gunanya bagi peminat kesusasteraan daerah.

**Penyunting**

**RINGKASAN  
HIKAYAT TAJUL MULUK  
JILID I**

Raja Zainul Muluk dari negari Syarikatan mempunyai empat orang putra. Sesudah kawin lagi dengan putri Kande Lilan baginda mendapat seorang putra lagi dan diberi nama Tajul Muluk. Menurut ahli nujum, Tajul Muluk akan menjadi seorang raja besar, tetapi baginda sendiri akan menjadi buta bila melihat anaknya itu. Sebab itulah baginda membuang Tajul Muluk yang masih bayi itu ke dalam hutan bersama ibunya Kande Lilan.

Pada suatu hari ketika Zainul Muluk sedang berburu, secara kebetulan melihat anaknya. Baginda tidak mengenal anaknya yang sudah berusia tujuh tahun itu. Pada saat itulah mata baginda buta. Tajul Muluk dituduh mencelakakan mata raja. Ia ditangkap lalu dibuang ke dalam jurang.

Menurut ahli nujum obat mata baginda ialah bunga Meungkawali. Keempat putranya disuruh mencari bunga mujarab itu dan barangsiapa yang berhasil akan diangkat menjadi raja menggantikan baginda. Dalam perjalanan mencari bunga Meungkawali mereka bertemu dengan Tajul Muluk yang ternyata masih hidup meskipun sudah dibuang ke dalam jurang. Mereka tidak mengetahui bahwa Tajul Muluk adalah adik mereka sendiri. Tajul Muluk turut serta mencari bunga obat mata ayahnya.

Ketika sampai di negeri Buni Yaman keempat bersaudara itu dipenjarakan oleh Ratu Janu Hati akibat kalah main catur. Dalam permainan berikutnya Tajul Muluk dapat mengalahkan Janu Hati sehingga ia diangkat menjadi raja negeri Buni Yaman sesuai dengan taruhan yang sudah disepakati. Janu Hati menjadi permaisurinya dan keempat saudaranya dibebaskan. Tetapi Tajul Muluk bersumpah tidak akan mendekati istrinya sebelum ia menemukan obat mata ayahnya. Dengan bantuan Janu Hati akhirnya Tajul Muluk sampai di negeri Peulinggoe Pura yang diperintah oleh raja Muzaafasyah yaitu ayah putri Meungkawali. Dalam usaha mendapatkan bunga sakti itu Tajul Muluk harus kawin dengan putri Mahmuda yaitu anak ratu Ha-

milah yang bertanggung jawab atas bunga Meungkawali. Dengan susah payah akhirnya Tajul Muluk dapat memasuki mahligai putri Meungkawali dan memetik bunganya yang disebut bunga Meungkawali.

Sesudah agak lama Tajul Muluk tinggal bersama putri Mahmuda ia teringat akan nasib ayahnya yang dalam keadaan buta itu. Dengan menunggang seekor kuda terbang bersama Mahmuda ia menuju negeri Syarikatan. Mereka singgah di Buni Yaman. Kemudian melanjutkan perjalanan bersama keempat saudaranya. Sebelum sampai di Syarikatan bunga Meungkawali dirampas oleh Hamidasyah yaitu abang Tajul muluk yang tertua dan ia sendiri dipukul dengan batu sampai pingsan. Disangkanya Tajul Muluk sudah mati. Bersama ketiga orang adiknya Hamidasyah melanjutkan perjalanan hingga sampai di istana orang tuanya. Baginda Zainul Muluk segera diobati dengan bunga Meungkawali sampai sembuh.

Dengan bantuan ratu Hamilah Tajul Muluk sembuh kembali dan dipertemukan dengan kedua isterinya. Ia diterbangkan ke Syarikatan. Di suatu tempat agak jauh dari istana ayahnya, ia tinggal di sebuah istana yang dibangun oleh Dewi Hamilah. Dalam waktu singkat banyak penduduk datang bermukim di sekitar istana Tajul Muluk.

Adapun putri Meungkawali tatkala terbangun dari tidurnya heran melihat bunganya sudah hilang berikut cincinnya. Ia pergi mencarinya. Di negeri Syarikatan, Meungkawali menyamar sebagai penjaga kuda raja. Pada suatu hari raja Zainul Muluk berkunjung ke istana Tajul Muluk bersama keempat orang putranya. Ikut pula penjaga kudanya, Meungkawali. Dalam pertemuan itulah, atas keterangan Janu Hati berbuka rahasia bahwa sebenarnya yang menemukan bunga Meungkawali adalah Tajul Muluk. Dalam kesempatan itu pula Meungkawali bertemu dengan Tajul Muluk dan jatuh hati kepadanya. Tajul Muluk pun kagum melihat kecantikan Meungkawali. Tetapi Meungkawali segera terbang ke negerinya. Di sana ia memarahi Dewi Hamilah yang telah membantu Tajul Muluk memetik bunganya. Hamilah me-

ngatakan bahwa ia sengaja memberi jalan kepada Tajul Muluk supaya ia jatuh cinta kepadanya. Dengan alasan itu Meungkawali tidak marah lagi.

Secara menyamar Tajul Muluk terbang ke istana Meungkawali. Siang ia berupa seekor burung dan malam hari menjelma sebagai manusia. Lama kelamaan hal itu diketahui oleh ibu Meungkawali yang tidak senang melihat anaknya bergaul dengan manusia. Meungkawali di penjarakan, dan Tajul Muluk dilempar ke udara dan jatuh di laut. Berkat sebuah azimat, Tajul Muluk sampai di sebuah kolam dan secara kebetulan bertemu dengan adik sepupu Meungkawali bernama Ruhul Afda yang menjadi tawanan Jin Hitam. Ia dapat membebaskan Ruhul Afda. Putri ini berjanji akan mengembalikan Meungkawali kepada Tajul Muluk. Dalam suatu adu sakti dengan Tajul Muluk raja Jin Hitam tewas. Mengetahui adik sepupunya sudah bebas Meungkawali bermohon kepada orang tuanya supaya ia dibebaskan, dengan janji tidak akan berhubungan lagi dengan manusia. Ruhul Afda menceritakan kepada Meungkawali bahwa ia ditolong oleh seorang pemuda bangsa manusia dari negeri Syarikatan.

Adapun Tajul Muluk sudah bertekad akan melawan ayah Meungkawali jika ia tetap melarang putrinya berhubungan dengannya. Akhirnya atas desakan Ruhul Afda, raja Muzaafasyah menikahkan Meungkawali dengan Tajul Muluk, dan tiada berapa lama kemudian ia diangkat menjadi raja Peulinggoe Pura menggantikan raja Muzaafasyah yang sudah lanjut usia. Tajul Muluk memerintah negeri dengan adil sehingga namanya dikenal di seantero negeri dan Peulinggoe Pura berada dalam keadaan aman dan makmur.

Jakarta Nopember 1982  
Diringkaskan ke dalam bahasa  
Indonesia dari naskah aslinya oleh  
Ramli Harun

**HIKAYAT  
TAJUL MULUK  
JILID I**

**BISMILLAHIRRAHMANIRRAHIM**

Bismillahi lon mula kalam  
Ngon nama Tuhan zat nyang Esa  
Ngon nama Tuhan zat nyang kadim  
Rahman rahim sifeuet mulia

Alhamdulillah Rabbil 'alamin  
Lon pujoe Tuhan Rabbus sama  
Beurmula pujoe dum sikalian  
Milek Tuhan po nyang Esa

Tuhan peujeuet sigala alam  
Jen ngon insan asoe donya  
Dum lat batat asoe alam  
Sidroe Tuhan dum nyang fana

Jeuneh batee di dalam gle  
Naleueng awe dalam donya  
Apui angen neupeuhade  
Dum peue hase neukaronya

Sigala na dum lat batat  
Allah nyang ahad bandum peuna  
Asoe laot asoe darat  
Hana sisat buet Rabbana

Wajeb ateueh sikalian  
Sidroe Tuhan beu tathee na  
Teulheueh lon pujoe Khalikon alam  
Seulaweuert lheueh nyan keu saidina  
  
Seulaweuert saleuem keu Muhammad  
Pangulee umat dum sineuna  
Ya Tuhanku neutamah rahmat  
Ateueh Muhammad saidil anbia

Ateueh wareh seureuta sahbat  
Bandum umat nyang takua  
Agam inong dum beu habeh  
Sidroe sideh jeueb-jeueb donya

Neubri iman dum beukhaleh  
Amai bak tuleh di dalam dada  
Oh lheueh pujoe seulaweuet sudah  
Insya Allah beutroh pinta

Lon meungsurat saboh kisah  
Beuk sudah ulon rika  
Lon mohon tulong nibak Allah  
Lon meungkisah sidroe raja

Haba jameun lon riwayat  
Treb ka lambat dilee masa  
Sidroe raja meusyeuhu that  
Timu barat meugah raya

Beutuhan bri troh ban hajat  
Beuk tamat lon calitra  
Beureukat intu nabi Adam  
Beureukat tuan Siti Hawa

Beureukat guree dilon tuan  
Seureuta ngon ibu bapa  
Beuk tamat ulon surat  
Deungon beureukat dum aulia

Meungna tulong po nyang ahad  
Cit troh hajat ban nyang pinta  
AMMA BAKDU ulon mula  
Ngo syeedara dum sinaroe

Ngo lon kisah sidroe raja  
Meugah raya hana bagoe  
Lagi gagah that beurani  
Hana sabe jeueb-jeueb nanggroe

Hukom ade hana sakri  
Raja duli that jipujoe  
Nama geukheun Zainul Muluk  
Bungong tajok that seureuloe

Le that nanggroe keunan taklok  
Wase jijok jeueb-jeueb sagoe  
Di raja nyan wahe akhi  
Na isteuri sidroe putroe

Rupa indah that juhari  
Nan putroe ti han lon tusoe  
Peuet droe aneuk bak putroe nyan  
Sikalian ureueng lakoe

Mangat hate po jonjongan  
Pujo Tuhan malam uroe  
Lam ibadat nantiasa  
That takwa raja nanggroe

Teutap putroe deungon raja  
Ngon aneukda nyan ban peuet droe  
Padum lawet akhe masa  
Poteu raja lon hareutoe

Leumah pike dalam dada  
Bah lon mita laen putroe  
Bah le jinoe lon meukawen  
Putroe canden aneuk meuntroe

Meunan leumah dalam dihen  
Hate meusyen raja nanggroe  
Teuma neukheun bak peurdana  
Kajak gata ubak meuntroe

Peurdana jak laju sigra  
Haba raja geupeugah proe  
Peurdana jak keu teulangke  
Geupeugah le ubak meuntroe

Jeuet le laju han peue pike  
Meukawen le raja nanggroe  
Oh lheueh kawen poteu raja  
Meuseusuka geunap uroe

Sajan putroe nyang jroh rupa  
Poteu raja sinan laloe  
Dalam kuta tan neuwoe le  
Sinan sabe sajan putroe

Teukeudi Tuhan rabbul kade  
Putroe hame lam meuligoe  
Troph nam buleuen hame nyang ka  
Susah teuka raja nanggroe

Han tom teungeut poteu raja  
Ret ie mata geunap uroe  
Uroe malam neumoe sabe  
Kadang pakri teuma dudoe

Yoh nyan raja leumah pike  
Raja hei le nujum sidroe  
Teungku nujum troh le teuka  
U astana neuek sampoe

Nujum peurab laju sigra  
Deungon raja mumat jaroe  
Lheueh nyan neuduek rab sulotan  
Troph le hidang keunan sampoe

Teungku nujum buka hidang  
Ngon sulotan makeuen jinoe  
Raja makeuen sinan sapat  
Mulia that hana bagoe

Oh lheueh makeuen raja deelat  
Peugah leugat haba lumpoe  
Wahe teungku guree hamba  
Leumah rahsia malam baroe

Han lon tupeue takbi makna  
Hai syaikhuna deungo jinoe  
Uroe Jum'at teubiet faja  
Sang-sang geumpa reuloh nanggroe

Teuka reudok ngon seupot clam  
Tujoh malam tujoh uroe  
Kuyut hate lon han macam  
Ngon ija plang ulon tob droe

Teutap ulon lam dukaan  
Jaga yoh nyan ulon sidroe  
Oh ban jaga lon hai syaikhi  
Teuloh hate hana bagoe

Saleh peue-peue keu lon neubri  
Uleh Rabbi po geutanyoe  
Teungku kalon ngon muslihat  
Peue alamat atueuh kamoe

Teungoh marit raja deelat  
Rioh sangat sare neumoe  
Teungku nujum buka kitab  
Neukalon bab takbi lumpoe

Leumah neungieng dalam kitab  
Aneuk deelat lahe jinoe  
Meutuah that hana tara  
Jeuet keu raja akhe dudoe

Rupa pi jroh that peurkasa  
Le that raja taklok keunoe  
Salah bacut po meukuta  
Seupot mata tuanku droe

Oh neukalon bak aneukda  
Po meukuta roh meupaloe  
Cit seupot le mata dua  
Nyankeuh makna tuanku droe

Nyankeuh makna po meukuta  
Meunan nyata takbi lumpoe  
Ban neudeungo haba meunan  
Neukheun yoh nyan raja naggroe

Kon meutuah aneuk laman  
Paleh jih nyan hana bagoe  
Bah le lon boh dalam rimba  
Hana laba tinggai sinoe

Meunan neukheun uleh raja  
Ubak nisa han le neuwoe  
Peukek peusan bak peurdana  
Beutroh raja neuwoe keunoe

Han cit neuwoe poteu raja  
Hingga nyata po samlakoe  
Oh ban lahe po jroh rupa  
Teuma sabda raja naggroe

Hai peurdana nyang seutia  
Dalam rimba jak ba jinoe  
Bek le tinggai lam astana  
Kajak lanja wahe meuntroe

Peurdana jak laju sigra  
Neucok lanja bungong geutoe  
Lheueh nibak nyan padum lama  
Troph lom haba bak sulotan

Neuyue pangge dum panglima  
Bentara syahbanda peukan  
Uleebalang dum sineuna  
Lom ulama sikalian

Hingga teuma troh le teuka  
Ubak raja nyang analan  
Peukek seumbah le peurdana  
Ampon hamba syahi alam

Kamoe bandum ka tröh teuka  
Saleh peue na nyang syugolan  
Peue tuanku nyang na susah  
Cuba peugah hai jonjongan

Poteu raja seuot pantaih  
Insyia Allah meuntroe intan  
Nyang lon pangge bar.dum gata  
Guree hamba sikalian

Lon meungpeugah aneuk hamba  
Uroe nyoe ka keulaheran  
Jinoe teungku peue bicara  
Neupeunyata keu lon tuan

Ulon teungku susah raya  
Oh ban nyata aneuk badan  
Sabab ulon ingat keu takbi  
Nyang neurawi dilee nyoe ban

Meunyo lon eu nyan aneukda  
Cahya mata ulon hilang  
Oh ka han le cahya mata  
Keupeue guna udep badan

Oh lon ingat meunan rupa  
Got lon yue ba dalam hutan  
Supaya ulon lheueh bak banya  
Nyankeuh haba bak lon tuan

Ban geudeungo sabda raja  
Ret ie mata dum sibarang  
Wazi meuntroe ngon bentara  
Hate rukha hana lawan

Weueh hate keu aneuk raja  
Bandua ngon Kande lilan  
Teuma seuot sidroe meuntroe  
Geukheun meunoe bak sulotan

Deelat ampon payong nanggroe  
Deungo kamoe sikrak kalam  
Ulon peugah nyang meutakwi  
Wahe duli deungo hamba

Fireuman Tuhan hadih Nabi  
Bek neuungki hai jonjongan  
Iza jaa ajaluhum  
Meunan muphom kalam Tuhan

Oh ka troh had sampoe janji  
Beurangkari han leupasan  
Meung ka troh hak nibak Rabbi  
Meusti jadi cit han jeuet tan

Beuthat neujak beurangkaho  
Beuthat tapo dalam awan  
Beuthat talob dalam peutoe  
Nyawong geutanyoe jadeh hilang

Ban nyang kheundak Tuhan sidroe  
Beurangkasoe han ek lawan  
Beuthat taboh dalam rimba  
Ban dua ngon Kande Lilan

Akhe dudoe saboh masa  
Po meukuta roh jak keunan  
Meungka kheundak Tuhan Esa  
Beurjumpa ngon aneuk badan

Meunyo meunan po meukuta  
Peuekeuh guna taboh intan  
Meulaenkan nyang na meudeesya  
Bak Rabbana that salahan

Hana patot taenanya  
Wahe raja nyang budiman  
Meunyo taboh dalam rimba  
Keuji nama syahi alam

Salah bak Allah deungon Nabi  
Aib keuji hai sulotan  
Troh meusyeuhu jeueb-jeueb nanggroe  
Raja duli neuboh intan

Deungon Allah tameupake  
Hana mise.ngon teuladan  
Meunan jikheun jeueb-jeueb nanggroe  
Aeb han soe tadeungoran

Nyankeuh lon kheun hai khalifah  
Beuna salah bak jonjongan  
Di lon tuanku lon peuingat  
Saket mangat ulon paban

Habeh haba nibak nujum  
Habeh maklum sikalian  
Sabet beuna ban kheun teungku  
Han sigeutu na salahan

Nyankeuh ureueng mat hakikat  
Beuna sangat ban neukheun nyan  
Meunan neukheun poteu raja  
Bak peundita sidroe yoh nyan

Sira neujak meunan haba  
Wahe raja nyang budiman  
Lheueh lon tuan deungon raja  
Allah Taala nyang timbangan

Lheueh nyan teuma neuwoe laju  
Sabab teungku beungeh han ban  
Poteu raja hate ragu  
Neuheu laju dum sibarang

Wahe meuntroe ngon bentara  
Jak cok sigra kande Lilan  
Dum beuhabeh ngon peukakah  
Kajak keubah dalam hutan

Oh lheueh titah nibak raja  
Peurdana beudoh le rijang  
Uleebalang ngon panglima  
Jak seureuta bandum sajan

Oh troh ubak putroe muda  
Lem peurdana marit rijang  
Wahe putroe nyang jroh rupa  
Suroh raja bak lon tuan

Neuyue jak tueng putroe muda  
Ngon aneukda dua sajan  
Jinoe laju sajan hamba  
Neuyue jak ba dalam hutan

Lon pabanbah po jroh rupa  
Hana daya bak lon tuan  
Lon meusageueng han kuasa  
Sabab raja keubeusaran

Leubeh that kreueh teungku pandita  
Neupeugah ka bak sulton  
Neutham putroe han neubri ba  
Habeh rupa neubri jalan

Han neupateh poteu raja  
Pihak kuasa jeuet beurangban  
Wahe putroe nyang johari  
Jok bak Rabbi dum sibarang

Beudoh jinoe tapeureugi  
Hai putroe ti Kande Lilan  
Putroe deungo kheun peurdana  
Ret ie mata meugeulumbang

Allah Allah ya Rabbana  
Pakon raja buet meunan ban  
Neuboh ulon tan keureuna  
Wahe raja nyang budiman

Pakon neuboh lon hai duli  
Pakon beunci keu lon tuan  
Hana sayang keu aneukda  
Pakon raja sang binatang

Pakon raja hate lupa  
Neubeh hamba tan salahan  
Han teuringat peutang pagi  
Wahe duli lon rah tangan

Beungoh seupot lon rah gaki  
Malam hari lon eh sajan  
Ija bajee lon srah ngon gleh  
Oh neueh lon ceupet badan

Pakon keu lon han neugaseh  
Neubeh keudeh dalam hutan  
Teungoh malam neulakee bu  
Neukheun teungku keulaparan

Meunoe meudeh lon peulaku  
Bak tuanku leumah cit tan  
Kukuek manok ranub sinulang  
Patna ureueng meunan macam

Han neuingat guna jameun  
Dalam uteuen lon neubuang  
Adat binatang nyang peuet gaki  
Na cit hate geukasehan

Laba rugoe na jipike  
Han beurangri bri antusan  
Thatjisayang keu aneukda  
Jipeulara beurangkajan

Hantom siat hate lupa  
Beungoh sinja bri makanan  
Seudang binatang na seutia  
Pakon raja keulupaan

Hana patot po meukuta  
Neuboh hamba dalam hutan  
Ya Allah Wahidul Kahhar  
Neupeulara aneuk laman

Lon seurah droe ubak gata  
Ngon aneukda dua sajan  
Sira bae po jroh rupa  
Neucok lanja aneuk badan

Tingkue aneuk sawak ija  
Ro ie mata han muban-ban  
Oh lheueh tingkue cahya mata  
Beudoh lanja Kande Lilan

Sira beudoh peugah haba  
Hai aneukda cahya intan  
Lon pabanbah bijeh mata  
Geuboh gata hai bangsawan

Geuyue jak boh dalam rimba  
Buet ayahaha nyang sulotan  
Bukon sayang putik sukon  
Didalam on ret meukarang

Wahe judo neupeuampon  
Nyang salah lon dilee jameun  
Bukon sayang bungong jeumpa  
Habeh mala dalam karang

Wahe judo po meukuta  
Meuah deesya ulon tuan  
Putroe neumoe sare riuh  
Ma teungku boh bukan sayang

Wahe aneuk nasib tuboh  
Geutanyoe roh dalam hutan  
Karoh untong dalam rimba  
Meunan kada nibak Tuhan

Cut putroe moe hate rukha  
Ret ie mata han muban-ban  
Cicempala bulee soebroe  
Meurubok manoe dalam taman

Han neungieng le atueuh kamoe  
Ngon samlakoe aneuk badan  
Bukon sayang mirahpati  
Rajawali jeuet keulawan

Wahe Tuhan po ku Rabbi  
Hanco hate lon ngieng intan  
Bukon sayang bak rangkileh  
Boh habeh peulandok seuba

Wahe aneuk bungong puteh  
Nyoe keuh gaseh bak du badan  
Digob aneuk diastana  
Geutanyoe ka dalam hutan

Wahe aneuk tangke nyawa  
Meunan jeumba naseb badan  
Hanco rusok dalam dada  
Neutueng hamba wahe Tuhan

Putroe neumoe hana reuda  
Ret ie mata basah badan  
Teungoh bae putroe muda  
Troh peundita neujak keunan

Dipeundita pika neumoe  
Weueh keu putroe Kande Lilan  
Tungku marit teuma meunoe  
Deungo kamoe putroe intan

Kada kadar nibak Rabbi  
Cit ka janji dilee meunan  
Saba beuthat po juhari  
Po ku Rabbi peulahraan

Beuthat taeu jinoe bala  
Nekmat teuka oh komdian  
Tuhan sidroe tulong gata  
Ngon aneukda dua sajan

Meunyo got niet dalam dada  
Tuhan peulara dalam hutan  
Bah han jibri bu sibabah  
Bah jikeubah bak umpung syeetan

Neupeulara uleh Allah  
Ngon meutuah cut bangsawan  
Meutuah that bungong geutoe  
Akhe dudoe meugah han ban

Jeuet keu raja lam donya nyoe  
Le that nanggroe takluk keunan  
Pinta hajat po samlakoe  
Neumohon droe ubak Tuhan

Ya ilahi wa ya Rabbi  
Po ku neubri sampaikan  
Ngon syafaat Muhammad Nabi  
Beuroh neubri lam seunangan

Bumeuteumeung pangkat tinggi  
Po ku neubri bahgiaan  
Tajul Muluk nan lon rasi  
Hai ya Rabbi neukabuikan

Lheueh neuboh nan le peundita  
Beudoh sigra putroe intan  
Seumbah tuot teungku peundita  
Di Syeekhuna sambot rijang

Teuma marit bungong meulu  
Wahe teungku guree laman  
Neumeulakee bak Tuhanku  
Beulanjot umu aneuk badan

Seureuta lom hai Syekhuna  
Izin sigra keulon tuan  
Neupeumeuh dumna deesya  
Hai Syekhuna nyang budiman

Nyoe seuneulheueh lon ngieng rupa  
Izin hamba masok hutan  
Sira marit sira geumce  
Sang geumanoe basah badan

Dipeundita deungon meuntroe  
Neulungkob droe atueuh intan  
Han jeuet meueu atueuh putroe  
Ngon samlakoe dua sajan

Lheueh nyan putroe beudoh leugat  
Neupeuteupat dalam hutan  
Hana sapeue le teuringat  
Bak hadarat neujok badan

Hanle pike dum sinaroe  
Neupeujok droe ubak Tuhan  
Panglima ngon wazi meuntroe  
Geusyik sagoe huleebalang

Ireng sajan tuan putroe  
Geujak sampoe dalam hutan  
Uroe malam geujak sabe  
Tan peuduli dum sibarang

Leumoh asoe bungong pade  
Han mumet le gaki tangan  
Deuek deungon grah hana sakri  
Sang-sang hanle meugrak badan

Putroe piyoh diyub kayee  
Tumpang ulee bungong rihan  
Neucok aneuk boh lam pangkee  
Nibak kayee sadeue badan

Ngon ie mata ret meuree-ree  
Basah bajee bungong peukan  
Ureueng ireng tuan putroe  
Habeh jimoe sikalian

Teuma tanyong po sambinoe  
Ho ret jinoe tabeurjalan  
Yoh nyan seuot teungku meuntroe  
Ampon kamoe bungong karang

Tan ret laen pike pake  
Meung kon taek gunong manyang  
Ban neukalon gunong rubek  
Meuhasek ulee cut intan

Gunong teudong miseu kayee  
Pucok nyum bee sampoh awan  
Kuyut hate bungong keumbee  
Ek leupah kee bak beurjalan

Sira neumoe putroe siti  
Neutinggai le aneuk badan  
Putroe ek le buket tinggi  
Meuntroe wazi ireng sajan

Uroe malam neukek sabe  
Darah ile gaki tangan  
Tujoh malam tujoh uroe  
Trok le sampoe geuek keunan

Beudoh sinan geujak laju  
Trok bungsu bak saboh taman  
Kuta pi jroh that seureuloe  
Ngon meuligoe indah han ban

Cit geupeugot yoh saboh roe  
Teumpat putroe Kande Lilan  
Hiran hate cut sambinoe  
Ngieng meuligoe indah han ban

Kheun peurdahna ubak putroe  
Tamong keunoe bungong rihan  
Putroe tamong laju bagah  
Sabab payah leumoh badan

Huleebalang ngon bintara  
Peurdahna dum sikalian  
Geuek laju ban sineuna  
Lam astana piyoh rijang

Teuma marit meuntroe wazi  
Ngon putroe ti Kande Lilan  
Wahe putroe nyang juhari  
Izin neubri keulon tuan

Izin kamoe woe keumbali  
Hai putroe ti cahya intan  
Putroe jaweueb insya Allah  
Bumeutuah sikalian

Jak hai meuntroe beuseulamat  
Beuta ingat keulon tuan  
Takheun saleuem lon keu deelat  
Doa beule that keabajikan

Neumeulakee bak hadarat  
Beuseulamat lon lam hutan  
Beujeuoh laknat jarak mara  
Ngon aneukda dua sajan

Lheueh nibak nyan ban sinaroe  
Com bak jaroe putroe intan  
Oh lheueh geucom jaroe putroe  
Laju geuwoe sikalian

Habeh geutren bandum geuwoe  
Tinggai putroe Kande Lilan  
Deungon aneuk nyang samlakoe  
Bandua droe teutap sinan

Laen bandum ka habeh woe  
Troph u nanggroe dum sibarang  
Oh troh keudeh geuhareutoe  
Dum sinaroe bak sulotan

Keu hai aneuk raja nanggroe  
Deungon putroe Kande Lilan  
Raja seuot laju bagah  
Bumeutuah meuntroe intan

Oh ka han le jih disinoe  
Hate lon nyoe seunang han ban  
Meunan neukheun po teuraja  
Bak bintara huleebalang


Peukek seumbah lom peurdahna  
Ampon hamba syahi alam  
Woe u teumpat kamoe dumna  
Treb ka lama dalam hutan

Teuma sabda nibak raja  
Izin lon ka wahe teelan  
Lheueh nibaknyan bandum sare  
Geubeudoh le geuwoe rijang

Woe u teumpat bak isteuri  
Teuduek rawi keu sulotan  
Bit ceudah that mirahpati  
Keudidi meuen dalam blang

Meuwoe kisah cut putroe ti  
Nyang juhari Kande Lilan  
Deungon aneuk Tajul Muluk  
Sinan neuduek dalam hutan

Hana susah bungong tajok  
Sabe daok pujo Tuhan  
Lam ibadat hana khali  
Pujo Rabbi Nabi sajan



Tajul Muluk nyang juhari  
Tuhan neubri rayek rijang  
Ho siuroe rayek leugat  
Tamse kulat ujeuen beuklam

Hana sapeue na meularat  
Allah ahad peularaan  
Sijuek tuboh asoe mangat  
Cit lam nekmat beurangkajan

Sajan bunda malam uroe  
suntok laloe pujoe Tuhan  
Troh tujoh thon umu sampoe  
Akai ragoe banta seudang

Ho siuroe maken leubeh  
Tamse bijeh musem hujan  
Tuan putroe that neugaseh  
Bungong puteh that analan

Padum lawet teuma dudoe  
Tuan putroe neukheun nyoe ban  
Putroe marit ngon aneuk droe  
Deungo kamoe cahya intan

Puji Allah deungon Nabi  
Malam hari bek lupaan  
Tameungucap dua kalimat  
Syahadah Allah ngon Muhammadan

Asyhadu alla ilaha illallah  
Sidroe Allah nyang laen tan  
Wa asyhadu anna Muhammad Rasulullah  
Muhammad sah peursurohan

Ingat beuthat hai meutuah  
Hate ngon lidah bek lupaan  
Poteue Allah peujeuet donya  
Laen dumna sikalian

Tuhan peujeuet langet bumoe  
Lom geutanyoe bandum insan  
Dum lat batat ban sinaroe  
Tuhan sidroe nyang jadikan

Meunan neukheun tuan putroe  
Bak aneuk droe bri ajaran  
Teuma seuot po samlakoe  
Ampon kamoe hai ma badan

Rindu hate malam uroe  
Nyang sibagoe ma ajaran  
Yakin lon that dalam fuad  
Hai ma pocut ngo lon tuan

Jinoe hajat jak meununtut  
Lon meungjak beuet hai ma badan  
Teuma seuot tuan putroe  
Deungo kamoe bungong peukan

Bak soe tabeuet bungong geutoe  
Tanyoe sinoe dalam hutan  
Teuma seuot Tajul Muluk  
Bek that daok hai ma badan

Nakeuh Allah deungon Nabi  
Nyang pumeuri guree laman  
Meungna izin nibak umi  
Singoh hari lon beurjalan

Bek neugundah wahe bunda  
Tuhan esa peularaan  
Putroe deungo kheun aneukda  
Han le haba bungong peukan

Lagi malam pi ka jula  
Bandua geujak tidoran  
Kukuek manok saboh-saboh  
Banta beudoh laju rijang

Lheueh srah muka po banta jroh  
Ek u rumah tok peukayan  
Oh lheueh meungui po samlakoe  
Ubak ma droe neukheun nyoe ban

Wahe po ma izin kamoe  
Bak uroe nyoe lon beurjalan  
Teuma seuot tuan putroe  
Izin kamoe aneuk badan

Banta peurab keunan laju  
Seumbah ibu gaki tangan  
Oh lheueh seumbah teuot ibu  
Neutron laju neubeurjalan

Tajul Muluk neujak lanja  
Neujak mita ileumee Tuhan  
Oh ban leupah pinto kuta  
Meuteumeung ka syiah yoh nyan

Tan neuturi po samlakoe  
Teudong sidroe dalam hutan  
Syiah peurab tanyong meunoe  
Hai samlakoe ho beurjalan

Ho keumeung jak hai aneukda  
Peugah sigra bak lon tuan  
Teuma seuot banta muda  
Ampon hamba guree 'ajam

Hajat ulon jak meununtut  
Lon meujak beuet ileumee Tuhan  
Meunan teungku lon meukeusud  
Teuma jawueb syiah yoh nyan

Meunyo meunan hai banta cut  
Ngon ulon jeuet tabeurjalan  
Riwang dilee ubak ibu  
Bungong meulu ulon sajan

Banta deungo narit teungku  
Riwang laju bungong peukan  
Dalam hate sangat seuu  
Ka na teungku soe ajaran

Teungku neuek u meulingoe  
Ubak putroe Kande Lilan  
Seureuta deungon po samlakoe  
Beudoh putroe mumat tangan

Teungku tapa marit meunoe  
Deungo kamoe putroe intan  
Neubri izin keulon jinoe  
Po banta nyoe lon ba sajan

Ulon pubueuet po samlakoe  
Tuan putroe bek susahan  
Tuan putroe seuot pantaih  
Ngon ijazah guree laman

Ban nyang nafsu teungku syiah  
Bak ulon sah seunang han ban  
Teungku syiah seuot bagah  
Beumeutuah putroe intan

Oh lheueh izin putroe indah  
Teungku syiah neutren rijang  
Teungku neujak deungon banta  
Dalam rimba neubeurjalan

Troh bak teumpat teungku tapa  
Banta muda hireuen han ban  
Neungieng bale jroh that rupa  
Hireuen raya cut bangsawan

Dileuen bale saboh kulah  
Meutatah ngon batee rukham  
Tajul Muluk neutron bagah  
Dalam kulah nyang analan

Tueng ie seumbahyang po juhari  
Neutiti u bale rijang  
Dua sajan deungon syaikhi  
Neupiyoh le laju sinan

Na sikeujab duek mupioh  
Makanan troh dalam hidang  
Teungku tapa neupeugah troh  
Puteh lusoh makeuen rijang

Buka hidang uleh banta  
Sinan pika tahe mandang  
Sie peulandok daging rusa  
Daging rawa cicem hutan

Sie rampeuneung mirahpati  
Laeン lagi le that macam  
Leumak mameh hana sakri  
Banta ahli makeuen rijang

Po samlakoe makeuen laju  
Ucap syuko pujoe Tuhan  
Oh lheueh makeuen bintang timu  
Beudoh laju cok Quruan

Teungku pubeuet banta indah  
Ngon bismillah puphon mulaan  
Lheueh nibak nyan alhamdulillah  
Jeuet le bagah bungong peukan

Tajul Muluk neubeuet pantaih  
Hana ubah bak bacaan  
Peungeuh hate han peue peugah  
Teungku syiah that sukaan

Meung sigeutu hana ubah  
Sangat ceudah cut analan  
Hingga seupot uroe asa  
Teungku tapa neukheun yoh nyan

Jak hai aneuk woe bak badan  
Bek oh sinja susah jalan  
Singoh uroe lom tateuka  
Wahe banta nyang budiman

Tajul Muluk teuma neuwoe  
Meujak sidroe ret lam hutan  
Siat ka troh u meuligoe  
Bak rumoh droe bungong peukan

Peurab laju bak bunda droe  
Seumbah jinoe gaki tangan  
Teuma marit tuan putroe  
Ka troh tawoe cahya intan

Bumeutuah po samlakoe  
Beuek sampoe beuet Quruan  
Peue na neukheun teungku tapa  
Ubak gata wahe intan

Tajul Muluk seuot sigra  
Ubak hamba na ajaran  
Beungoh lon jak seupot lon woe  
Geunap uroe yue beurjalan

Meunan hamba po samlakoe  
Galak hansoe Kande Lilan  
Uroe suboh beudoh laju  
Jak taguen bu aneuk badan

Oh lheueh banta neupajoh bu  
Neujak laju rot lam hutan  
Oh troh keudeh bungong meulu  
Seumbah teungku gaki tangan

Teungku peubeuet teuma laju  
Seun sigeutu na ajaran  
Meunan sabé geunap uroe  
Han peue adoe le lon peutrang

Beungoh neujak seupot neuwoe  
Hana laloe cut bangsawan  
Daok sabe lam neujak beuet  
Meununtut ileumee Tuhan

Trang that hate samlakoe cut  
Ngon siat jeuet tamat Quran  
Tamat Quran beuet Bidayah  
Sangat ceudah cut analan

Teuma neubeuet Jarumiah  
Ngon Kifayah dua sajan  
Ileumee Maknun nahu fiqah  
Maklum sudah sikalian

Ileumee mantra ngon falakiah  
Nyan pi ceudah cut bangsawan  
Ileumee nujum ngon lazini  
Taki maki lam peupeurangan

Sangat utoh po juhari  
Han sapeue le keukurangan  
Di teungku pi habeh neubri  
Sampoe hate gaseh sayang

Saraf nahu habeh meuri  
Banta ahli habeh neupham  
Seureuta neubri ngon ijazah  
Uleh syiah nyang budiman

Teuma marit teungku syiah  
Hai meutuah deungo laman  
Deungon tulong po nyang Esa  
Ka mumada lon ajaran

Jinoe aneuk tajak gisa  
Ubak bunda tapeugah ban  
Takheun saleuem ubak bunda  
Lon kuteuka ngon grak Tuhan

Meungna izin po nyang Esa  
Singoh teuka ulon tuan  
Tajul Muluk neuwoe pantaih  
Neujak peugah bak ma badan

Ban neudeungo narit syiah  
Neuwoe pantaih bungong peukan  
Wahe ma po ma teungku droe  
Teuhngku keunoe neubeurjalan

Singoh teungku neujak keunoe  
Bak geutanyoe hai ma badan  
Putroe deungo meunan haba  
Hate suka hana lawan

Singoh uroe watee duha  
Teungku tapa troh le keunan  
Neuek laju teungku tapa  
Putroe muda seumbah rijang

Tajul Muluk pi seureuta  
Seumbah sigra guree 'ajam  
Teuma marit teungku tapa  
Deungo hamba wahe intan

Tajul Muluk nyang bahgia  
Po jroh rupa umu seudang  
Bak pike lon wahe putroe  
Patot jinoe tapeukhitan

Teuma seuot tuan putroe  
Ban pike nyoc guree laman  
Wahe teungku guree hamba  
Bak lon kira sabet meunan

Akan teutapi peue lon peugah  
Ka grak Allah nasib badan  
Di gob teutap dalam nanggroe  
Kamoe sinoe dalam hutan

Wahe teungku guree hamba  
Hana daya bak lon tuan  
Ban nyang pike bak syeekhuna  
Teungku teuma peugah rijang

Grak teukeudi po nyang Esa  
Beuk saba putroe intan  
Lahe baten niet beuteupat  
Grak hadarat sikalian

Bek le susah cut meuubon  
Bahle ulon nyang peukhitan  
Yoh nyan teungku meuhei banta  
Ngon siat ka keunan datang

Neuduek laju rab Syeekhuna  
Banta muda nyang analan  
Bak masa nyan teungku tapa  
Laju sigra neupeukhitan

Oh lheueh khitan banta muda  
Teungku tapa neukheun yoh nyan  
Izin keu lon hai samlakoe  
Jinoe lon woe dalam hutan

Banta seuot neukheun meunoe  
Izin kamoe guree ajam  
Oh lheueh izin teungku neuwoe  
Neujak sidroe rot lam hutan

Tinggai banta lam meuligoe  
Sajan putroe nyang analan  
Kande Lilan ngon samlakoe  
Sajan putroe nyang analan

Uroe malam lam ibadat  
Hate mangat bungong peukan  
Hana sapeue le teuringat  
Dalam taat beurangkajan

AMMA BAKDU teuma dudoe  
Laen jinoe lon peugisa  
Zainul Muluk raja nanggroe  
Geunap uroe meuseusuka

Oh lheueh geuboh Kande Lilan  
Dalam uteuen ngon aneuksda  
Han sapeue le keususahan  
Lam seunangan rok-rok masa

Padum lawet dudoe akhe  
Ngo boh hate lon calitra  
Teukeudi po Rabbul kade  
Leumah pike po teuraja

Bahle jinoe lon jak meuen  
Jak meuramien paroh rusa  
Meunan leumah dalam hate  
Neuyue pangge pawang dumna

Uleebalang meuntroe wazi  
Tandi waki ngon beuntara  
Hingga habeh dum meusapat  
Neukheun hajat jak meurusua

Pawang rusa nyang utoh that  
Ka meusapat dum sineuna  
Oh ka cukop sileungkapan  
Sulotan yoh nyan neubungka

Deungon rakyat ireng sajan  
Uleebalang ngon bintara  
Sira geujak dalam hutan  
Peurasan meugura-gura

Jipeh tambo palee geundrang  
Sare kiam tango subra  
Jiyub suleng deungon bangsi  
Rapai deungon biula

Surak deumpek jihei sare  
Ulah mise sang prang raya  
Geunap uroe meunan sabé  
Didalam gle jak meurusá

Dumna pawang gadoh pike  
Gadoh syawe dalam dada  
Saboh rusa han meuteumee  
Gadoh lagee pawang dumna

Han tom meunan nyang ka dilee  
Meubulee tan leumah rupa  
Padumna treb meunan sabé  
Didalam gle uteuen rimba

Teukeudi Allah Rabbul kade  
Jibeudoh le saboh rusa  
Rusa jiplueng pantaih han ban  
Rot hadapan raja raya

Zainul Muluk neukalon ban  
Beudoh yoh nyan pantaih sigra  
Yoh nyan neulet le neukarat  
Tinggai rakyat han neukira

Rusa jiplueng pantaih sangat  
Raja deelat let meutaga  
Hingga troh bak saboh gunong  
Rusa teudong payah raya

Raja pi troh keunan mamong  
Neutop keunong teuntang dada  
Rusa reubah ka meugule  
Yoh nyan neusie uleh raja

Takue rusa pika putoh  
Rakyatpi troh keunan teuka  
Tango a'u sare riöh  
Sang seunujoh kiam subra

Rusa reubah sinan rab toe  
Ngon meuligoe Kande Lilan  
Tajul Muluk nyang samlakoe  
Tanyong meunoe ubak bunda

Peue jih rior ma teungku droe  
Kiam bunyoe dalam rimba  
Teuma seuot tuan putroe  
Ureueng nanggroe jak meurusia

Bek tajak-jak aneuk keunan  
Ureueng dum nyan han got basa  
Jipoh gata bungong keumang  
Han soe sagang tan syeedara

Tajul Muluk marit sikrak  
Bah le lon jak siat hai ma  
Lagi pi rab hana jarak  
Di lon galak kalon rusa

Meunyo tajak aneuk badan  
Bek rab intan tadong gata  
Tajul Muluk neujak rijang  
Jak pandang ureueng sie rusa

Oh troh keunan bungong meulu  
Leumah neueu rakyat that bha  
Dalam kawan tamong laju  
Meukeusud eu pakri rupa

Neutanyong bak ureueng nanggroe  
Pat teungku droe reubah rusa  
Rakyat seuot jikheun meunoe  
Jeh bak sagoe ulee paya

Neujak laju putik langsat  
Nibak' teumpat reubah rusa  
Teukeudirollah po nyang ahad  
Ngon deelat meuteumee muka

Oh ban neungieng banta seudang  
Laju hilang cahya mata  
Raja reubah le meulayang  
Keunong pacang kayee rimba

Teutop mata deungon duroe  
Neukheun meunoe po teuraja  
Allah hai po Tuhan sidroe  
Lon ka paloe hai peurdana

Teungoh lon eu rusa teumbon  
Mata ulon gadoh cahya  
Saleh na soe keunoe jitron  
Hana makon lon binasa

Saket kuthat hana bagoe  
Pakri jinoe hai peurdana  
Neupareksa bak teumpat nyoe  
Soe na keunoe ureueng teuka

Jibeudoh le meuntroe bujang  
Uleebalang ngon panglima  
Jipareksa laju rijang  
Soe na keunan ureueng teuka

Ka jikalon keudeh keunoe  
Jitanyong soe keunoe teuka  
Tajul Muluk seuot keudroe  
Nyoe pat kamoe peue tamita

Ulon nyang na tamong keunoe  
Meuteumeung nyoe deungon raja  
Wazi meuntroe teuma kheun le  
Kah nyang ruge mata raja

Jidrob laju bungong pade  
Ka jiba le ubak raja  
Oh rab keunan po samlakoe  
Raja nanggroe susah teuka

Maken saket nibak bunoe  
Meutumbok droe hana reuda  
Neupoh-poh droe hana macam  
Hingga pangsan po teuraja

Teuma beungeh dumna rakan  
Jicok yoh nyan banta muda  
Jitrom sipak ngon jitumbok  
Ka jiantok hana reuda

Bukon sayang bungong tajok  
Sret meutumpok uyub ara  
Bukan sayang Tajul Muluk  
Ka jiantok bak-bak muka

Bukon sayang cicem murong  
Sideh umpung dicong para  
Pihak hana wali karong  
Han soe tulong banta muda

Bukon sayang bak sijaloh  
Han tom meuboh rok-rok masa  
Tajul Muluk laju jipoh  
Hana saboh soe tem publa

Neupeujok droe ubak Allah  
Bah peurintah po nyang Esa  
Tajul Muluk nyang meutuah  
Droe neuh seurah bak Rabbana

Lheueh nibak nyan teuma dudoe  
Gaki jaroe jiboh singkla  
Ka jiikat gaki jaroe  
Dalam uroe laju jiba

Hana inseueh ube pade  
Jipoh mate banta muda  
Laju jiba u atueh gle  
Jaroe gaki ka meusingkla

Di ateueh kon phon jigule  
Hingga sampe troh u data  
Saleh udep saleh mate  
Hana deuh le lon eu rupa

Bandum rakyat ka jipike  
Sangka mate bak jikira  
Teuma jikheun uleh meuntroe  
Beudoh jinoe tajak gisa

Jicok raja boh lam usong  
U gampong jipuwoe lanja  
Uleebalang nyang mat payong  
Jipeutudong raja raya

Hana neuthee malam uroe  
Daok poh droe hana reuda  
Tuan putroe judo duli  
Nyanpi akhi sang ka gila

Ro ie mata tan beureungi  
Neutanyong kri bak peurdana  
Hai peurdana meuntroe wazi  
Pakon duli jeuet binasa

Teuma seuot meuntroe wazi  
Deungo cut ti lon calitra  
Rusa reubah sinan teudu  
Kamoe lalu keunan sigra

Teungoh-teungoh kamoe peulaku  
Tuanku ka buta mata  
Yoh nyan neumoe tuan putroe  
Aneuk peuet droe keunan teuka

Ngon ie mata sret meataloe  
Jiduek rab toe deungon raja  
Wahe ayah pakon meunan  
Han get bagoe lon eu rupa

Masa neujak jroh samlakoe  
Watee neuwoe hanle mata  
Raja neukheun teuma meunoe  
Wahe putroe panyot peulita

Wahe aneuk lon nyang peuet droe  
Bek le tamoe bijeh mata  
Tapabanbah kheundak Rabbi  
Grak teukeudi ateueh hamba

Jinoe tahei ahli nujum  
Nyang ek maklum dum peukara  
Cuba tanyong ubak nujum  
Pakri maklum ubat mata

Banta peuet droe beudoh rijang  
Meuheu bujang keunan sigra  
Oh sare troh keunan bujang  
Banta seudang peugah haba

Teungku nujum neujak pangge  
Beurijang le keunoe teuka  
Takheun raja neumoe sabe  
Saleh pakri akhe masa

Bujang beudoh laju jiplueng  
Ahli nujum jijak mita  
Ban meurumpok deungon nujum  
Jibri maklum haba raja

Nujum beudoh laju pantaih  
Neumeulangkah ubak raja  
Oh sare troh teungku syiah  
Banta peugah meunoe haba

Wahe teungku guree kamoe  
Raja nanggroe ka binasa  
Neujak u gle yoh saboh roe  
Padum uroe jak meurus

Teukeudi po Tuhan sidroe  
Oh troh neuwoe han le mata  
Uroe malam daok neumoe  
Pakri jinoe hai syekhuna

Cuba kalon dalam kitab  
Peue na ubat mata raja  
Teungku nujum buka kitab  
Neukalon bab pupoh angka

Habeh neungieng sigala bab  
Deuh neukalon bintang raja  
Leumah sinan dalam kitab  
Didalam bab nyang keulima

Sinan nyang na neueu lahe  
Cut putroe ti nyang eumpunya  
Akan teutapi that meuseuke  
Beuranggasoe le han ek daya

Meulainkan ureueng nyang meutuah  
Nyang ek leupah nibak banya  
Dalam surat meunan leumah  
Teungku syiah kalon nyata

Teungku nujum hanle kalam  
That neusayang po meukuta  
Tob ngon kitab laju rijang  
Hate leukang nyum lam dada

Banta peuet droe tanyong laju  
Wahe teungku peue na haba  
Na lom ubat keu tuanku  
Peugah laju ubak hamba

Bah dibarat get ditumu  
Kamoe teungku nyang jak mita  
Teuma jawueub uleh teungku  
Leumah lon eu ubat raja

Mantong ubat di sulton  
Meung ek na nyan puleh sigra  
Akan teutapi susah han ban  
Payah jalan tajak mita

Peue nan ubat hai teungku droe  
Di pat nanggroe peue bu nama  
Beuthat jeuoh jarak nanggroe  
Ubat ny'oe kamoe jak mita

Teuma jaweueb nujum ahli  
Neupeugah kri ubak banta  
Nyankeuh bungong meungkawali  
Nyang ek rasi ubat mata

Puleh laju po jonjongan  
Ngon ubat nyan soe ek peuna  
Akan teutapi jarak han ban  
Siulah nyang han troh bungka

Jeuoh teumpat hana bagoe  
Nibak nanggroe Pari Diu  
Nyankeuh bungong indah hansoe  
Ayeuem putroe indah rupa

Meuploh ribee pari mambang  
Jaga bungong putroe muda  
Biek raksasa nyang kreueh ceukang  
Han tom reunggang sikutika

Saboh kawan bangsa Milon  
Jiek jitron keunan mata  
Uleue ngon naga teungku ampon  
Meuron-ron han ek takira

Rimueng badeuek singa gajah  
Subhanallah laksin laksa  
Beurangkasoe han ek ilah  
Sya payah tauceuha

Nyankeuh lon kheun that meuseuke  
Wahe duli banta muda  
Teungku nujum meunan rawi  
Raja duli deungo haba

Wahe aneuk lon nyang peuet droe  
Wahe meuntroe nyang seutia  
Tayue mita ubat ka noe  
Bak beurangkasoe nyang ek daya

Soe ek teumeung bungong putroe  
Nanggroe nyoe bahle jih raja  
Meunan neukheun raja nanggroe  
Sira neumoe hana reuda

Teuma nujum jawueeb neubri  
Wahe duli deungo hamba  
Meung kon bungong Meungkawali  
Bek hai duli neuyue mita

Laen nibak nyan hana ubat  
Wahe deelat neupeucaya  
Lon peugah nyoe jalan teupat  
Bukon deelat lon dusta

Meung kon bungong nyang lon rawi  
Hai duli beurayek saba  
Neupeujok droe ubak Rabbi  
Ban nyang neubri beuna rila

Meunan nujum neuhareutoe  
Raja nanggroe hanle haba  
Po teuraja teutap neumoe  
Aneuk peuet droe beudoh sigra

Jimarit le haba meunoe  
Ampon kamoe po meukuta  
Beule doa nibak duli  
U nanggroe han le lon gisa

Nibak udep bahle mate  
Nibak keuji aib nama  
Meunan narit banta peuet droe  
Raja nanggroe ro ie mata

Raja neukheun haba meunoe  
Gata peuet droe bek tabungka  
Piyoh dilee hai samlakoe  
Lon hei meuntroe ngon panglima

Yoh nyan raja yue krah rakyat  
Timu barat dum sineuna  
Hingga troh le keunan leugat  
Meusapat u mideuen raja

Uleebalang wazi meuntroe  
Geusyik sagoe ngon bentara  
Laeñ rakyat dum sinaroe  
Peunoh asoe kuta raja

Leumbeng tumbak jiba sajan  
Ngon seunapang bandum rata  
Lom keureupoe dum jisandang  
Peudeueng panyang cokma khanja

Peurdana meuntroe peukek seumbah  
Ampon maaf po meukuta  
Bandum rakyat hase sudah  
Peue na titah bak sroepada

Sabda raja neukheun meunoe  
Banta peuet droe keumeung bungka  
Ulon harap dum geutanyoe  
Pakon jinoe banta muda

Meunyo banta gohlom jiwoe  
Gata dum nyoe bek tagisa  
Teuma seuot peurdana meuntroe  
Nibak kamoe di jeumala

Meung mantong nyawong lam badan  
Meuubah han ban nyang sabda  
Habeh haba ngon sulotan  
Beudoh yoh nyan peuet droe banta

Peurab laju ubak duli  
Com di gaki po meukuta  
Lheueh nibak nyan heurangkat le  
Rakyat sare dum seureuta

Poteu raja lam meuligoe  
Deungon putroe nyang jroh rupa  
Putroe bae hana bagoe  
Hai aneuk droe ka tabungka

Ho troh ulon bungong pade  
Gata han le hai bentara  
Teungoh bae putroe siti  
Banta ahli laju bungka

Deungon rakyat meuntroe wazi  
Geusyik waki ngon bentara  
Ret dalam gle geubeurangkat  
Geujak leugat hana reuda

Hana pioh meungsikeujab  
Aneuk deelat laju bungka  
Laju geujak hana piyoh  
Habeh geubloh lam beuluka

Dalam uteuen dalam paloh  
Habeh geubloh alue paya  
Pat nyang malam sinan piyoh  
Oh ka beungoh lom geubungka

Meunankeuh hai geujak sunggoh  
Hingga troh bak saboh data  
Teumpat jitiek Tajul Muluk  
Keunan ka troh balatandra

Kiam subra miseue reudok  
Rakyat kaok peugah haba  
Sira jijak poh beurakah  
Khem meuhah-hah sare subra

Tajul Muluk lam beureukah  
Jikeubah yoh dilee masa  
Sinan jitiek lam lungkiek gle  
Sang ka mate nyawong fana

Teukeudi Allah Rabbul kade  
Uroe nyan le banta jaga  
Keureuna suara rioh han ban  
Ngon sabab nyan jaga banta

Ban teukeujot nibak pangsan  
Han meuban-ban ro ie mata  
Sira neumoe po bangsawan  
Neuheui Tuhan hana reuda

Ya Tuhanku po di kamoe  
Pakon meunoe untong hamba  
Tan salah lon bak barangsoe  
Pakon kamoe jienanya

Ya Tuhanku lon meulakee  
Gata nyang mee kaboi pinta  
Beureukat Muhammad Nabi panghulee  
Beureukat guree teungku tapa

Poku neubri beutroh hajat  
Ngon beureukat ayah bunda  
Neubri beulheueh lon lam ikat  
Rabbul abad nyang kuasa

Lheueh meulakee bungong riwat  
Taloe ikat rhet meuleua  
Hana meukon putoh taloe  
Sang sinyak nyoe ureueng buka

Teuma beudoh po samlakoe  
Neujak sidroe dalam rimba  
Teungoh jak-jak bungong seumpeueng  
Ka meuteumeung aneuk raja

Deungon rakyat han teubileueng  
Leumbeng peudeueng jieu jiba  
Ban neukalon tahe hireuen  
miseue ureueng jak poh bila

Tajul Muluk tanyong laju  
Wahe teungku pane teuka  
Pat bu nanggroe di tuanku  
Ho meunasu keumeung bungka

Peugah bak lon meung sigeutu  
Peue hai teungku neujak mita  
Teuma seuot peurdana meuntroe  
Deungo kamoe ureueng muda

Nyang jeuet meujak bandum kamoe  
Sampoe keunoe ka troh teuka  
Kamoe bandum mita ubat  
Raja deelat lam naza'a

Zainul Muluk raja deelat  
Mata meuhat ka binasa  
Daok neumoe neupoh-poh droe  
Malam uroe hana reuda

Nujum peugah yoh saboh roe  
Ubak kamoe dum sineuna  
Saboh bungong meungkawali  
Ayeuem cut ti nanggroe Diu

Meung ek na nyan Tuhan neubri  
Mata duli puleh sigra  
Meunan nujum nyang hareutoe  
Ubak kamoe dum sineuna

Teuma beudoh banta peuet droe  
Jak com jaroe poteu raja  
Lakee izin bandum kamoe  
Jeueb-jeueb nanggroe meujak mita  
  
Nyānkeuh sabab jeuet troh keunoe  
Gohlom sampoe ban nyang pinta  
Tajul Muluk deungo meunan  
Sret meugram le ie mata  
  
Sabab sayang bungong peukan  
Keu sulton nyang ayahanda  
Teuma neukheun haba nyoe ban  
Neutueng laman hai peurdana  
  
Bah le neuba ulon sajan  
Keu teubosan namiet gata  
Bek neutinggai lon lam uteuen  
Jimakeun le badeuek singa  
  
Teuma seuot peurdana meuntroe  
Nibak kamoe that mulia  
Akan teutapi hai samlakoe  
Kheun bak kamoe nyang sijahtera  
  
Pat bu gampong deungon nanggroe  
Peue buet sinoe dalam rimba  
Soe nan ayah bungong geutoe  
Gata sidroe soe bu nama  
  
Tajul Muluk deungo meunan  
Han muban-ban ro ie mata  
Ka teuingat nasib badan  
Dalam hutan dilee geuba  
  
Sira neumoe po samlakoe  
Neukheun meunoe bak peurdana  
Wahe teungku deungo kamoe  
Han lon teusoe ayah bunda  
  
Oh teuingat ulon sidroe  
Cit ka sinoe dalam rimba

Seuntok lazim lam rimba nyoe  
Han tom kamoe geuheu nama  
Saleh pakri masa dilee  
Geuboh euntee le ayahanda  
Saleh geuboh lon di nanggroe  
Hai teungku droe lon thee hana  
  
Han lon tukri han lon tuban  
Poku Tuhan thee sibeuna  
Ngon mukzijat Muhammad Nabi  
Tuhan neubri udep hamba  
  
Han tom lon eu meung makanan  
Lon makan on kayee rimba  
Nyankeuh teungku lon peugah ban  
Hanco badan beukah rasa  
  
Meung na gaseh keu lon tuan  
Neuba sajan neupeu hamba  
Peurdana deungo haba meunan  
Teuka sayang dalam dada  
  
Teuma geukheun laju yoh nyan  
Tajak intan sajan hamba  
Tajul Muluk that sukaan  
Teuma yoh nyan laju bungka  
  
Sajan rakyat meuploh katoe  
Malam uroe geujak lanja  
Padum lawet teuma dudoe  
Troh sampoe bak saboh banda  
  
Ban troh keunan dum sinaroe  
Piyoh jinoe bala tandra  
Geupeudong le deungon kemah  
Piyoh payah aneuk raja  
  
Nyang di rakyat sabe rakyat  
Peugot teumpat maseng kada  
Ureueng nanggroe hireuen tahe  
Jieu that le jamee teuka

Dalam hate jikheun meunoe  
Angkatan nyoe aneuk raja  
Teuma beudoh peurdana meuntroe  
Geujak sidroe dalam banda

Teungoh jak-jak dalam peukan  
Ka meuteumeung ngon syahbanda  
Mubri saleuem mumat jaroe  
Ban dua droe that mulia

Syahbanda ba ubak teumpat  
Geubri adat jamee teuka  
Piyoh sinan na sikeujab  
Tanyong leugat le peurdana

Wahe teungku deungo kamoe  
Nanggroe nyoe peue geukheun nama  
Soe nan raja nyang sulotan  
Peugah tuan ubak hamba

Kheun syahbanda peugah rijang  
Deungo teelan lon calitra  
Nama nanggroe Buni Yaman  
Luah han ban ngon tapeusa

Hana raja wahe tuan  
Meulaenkan cut putroe muda  
Janu Hate nama putroe  
Lam nanggroe nyoe nyankeuh raja

Sinan teutap lam meuligoe  
Geunap uroe meuen muda  
Rupa indah hana lawan  
Tamse intan cahya muka

Taeu tuboh pi jroh jeunjang  
Bangon nyum sang lheueh geuupa  
Soe nyang kalon tahe mandang  
Sang buleuen trang malam jula

Kulet puteh sang keululu  
Lam seupot hu deuh meucahya  
Beurangkasoe hate rindu  
Meunyo jieu putroe muda

Ngon suara sang manisan  
Soe deungoran pungo gila  
Oh jimarit mameh hin ban  
Hate deundam agam muda

Suntok sabe beursukaan  
Peurasan meubagoe rupa  
Tunong baroh troh dum keunan  
Bak peurasan dum jiteuka

Le that paloe oh troh keunan  
Ngon cut intan putroe muda  
Aneuk raja aneuk meuntroe  
Le that paloe dum binasa

Habeh bandum geupeugah proe  
Ubak meuntroe le syahbanda  
Lheueh nibak nyan geulakee droe  
Meukeusud woe teumpat nyang ka

Kheun syahbanda izin kamoe  
Teungku meuntroe laju gisa  
Oh sare troh peurdana woe  
Geukheun meunoe ubak banta

Bunoe ulon jak u peukan  
Meurumpok lon ngon syahbanda  
Peugah haba deungan kamoe  
Keu putroe nyang ceudah rupa

Rupa indah hana bagoe  
Dalam nanggroe hana ngon sa  
Ngon peurasan le that sinan  
Peurmainan putroe muda

Beurangkasoe jijk keunan  
Ngon cut intan gadoh daya  
Banta deungo haba meunan  
Geukheun yoh nyan pantaih sigra

Bahle tajak bak teumpat nyan  
Takalon ban pakri rupa  
Banta peuet droe geujak kéunan  
Sajan-sajan ngon peurdana

Na sikeujab baro geujak  
Ka meurumpok saboh kuta  
Ngon meuligoe that meusigak  
Keupucak batee beulanda

Bak binteh geuboh ceureumen  
Tulak angen ie peureuda  
Soe nyang kalon hate ingen  
Jroh that reunem taeu rupa

Di leuèn meuligoe saboh bale  
Bak beureunti jamee teuka  
Di leuen bale saboh kulam  
Batee rukham geuboh lingka

Meuturab jroh batee rukham  
Soe ngieng deundam hate suka  
Lingka bale jroh meukeunong  
Sinan bungong dum geupula

Sigala dum jeuneh bungong  
Han peue tanyong di sinan na  
Bungong rumi bungong rawatu  
Bungong meulu dum aneka

Banta kalon jroh that laku  
Geujak laju sigra-sigra  
Oh troh keunan banta lalu  
Leumah neueu saboh rupa

Saboh surat nibak pinto  
Banta tajo jak peunyata  
Haba surat jroh meulaku  
Hate rindu soe nyang baca

Ngo lon peugah meung sigeutu  
Hai teungku nak meuho punca  
Seumbah saleuem Janu Hate  
Beurangkari jamee teuka

Beuthat aneuk raja duli  
Walee meuseuki aneuk peurdana  
Bak bale geupiyoh dilee  
Bungong keumbee keunan teuka

Gong bak sagoe teungku palee  
Mangat meuthee u astana  
Meunan haba dalam surat  
Meulakab bak pinto kuta

Banta muda hate mangat  
Kheundak leugat putroe muda  
Hamidasyah hate beureuhi  
Cut putroe ti meungieng rupa

Tron bak kulam neusrasah gaki  
Neutiti u bale raya  
Teuma geupeh gong bak sagoe  
Sinyak putroe tupeu bahsa

Putroe marit ngon deundayang  
Tajak rijang gata hai da  
Jibeudoh le dum sibarang  
Deundayang nyang muda-muda

Jingui ija sawak pinggang  
Sikalian jeuneh sutra  
Boh ngon ranub dalam bate  
Jiteubit le pantaih sigra

Deundayang dum sabe-sabe  
Sang seurungkhe muda-muda  
Nyang jak dikeue sinyak Lambot  
Jak dilikot sinyak Jeumpa

Jitiek aleh jroh meusambot  
Sang angen pot pucok u dara  
Dilikot nyan sinyak Kandi  
Rupa na ri meuh geuteumpa

Jipoh linggang jroh han sakri  
Beureuhi hate lam dada  
Di likot nyan sinyak Isah  
Rupa indah hana ngon sa

Di likot nyan sinyak Ibah  
Nyang that ceudah peugah haba  
Taeu jijak leuntek leunto  
Ulee baho sang meugisa

Soe nyang kalon tahe gante  
Bee meuhambo gaharu jeumpa  
Jitiek aleh jroh meupatah  
Jicok langkah peuet sibanja

Oh takalon teuhah babah  
Sang aruah ka keulua  
Oh troh keunan jijak laju  
Leumah jieu aneuk raja

Jimarit le bungong meulu  
Tadeungo su sang biula  
Deungon jaroe angkat laju  
Tuanku peuampon deesya

Kayee ramphak jroh ijo on  
Meuhimpon cicem lam rimba  
Naneu keunoe teungku ampon  
Ulon seuon di jeumala

BALIKA REPUBLIK  
DIREKTORAT TRADISI  
DITJEN NSSF DEPBUDPA

Cicempala bulee soebroe  
Meureubok manoe dalam ceuntra  
Tuanku langkah u meuligoe  
Ubak putroe nyang jroh rupa

Meunan jikheun sinyak Lambot  
Leumah leumbot ngon suara  
Hamidasyah laju seuot  
Samlakoe cut hate suka

Di atueuh gle timoh cuko  
Seurungkhe ngon bak kupula  
Nyang troh keunoe ulon lalu  
Bungong keundo lon jak mita

Puteh-puteh bungong meulu  
Meujampu ngon minyeuk ata  
Hate lon nyoe sabe tunu  
Meunggoh lon eu putroe muda

Meunan narit po samlakoe  
Deundayang nyoe hate suka  
Lheueh nibak nyan teuma dudoe  
U meuligoe geujak lanja

Geuek laju u meuligoe  
Ubak putroe nyang jroh rupa  
Tilam kaso nyang meusujo  
Cit ka bunoe hase lingka

Hamidasyah piyoh rijang  
Hate seunang hana tara  
Janu Hate putroe seudang  
Beudoh rijang peumulia

Jiboh ranub dalam grah  
Putroe indak jok keu banta  
Lheueh jok ranub po sambinoe  
Jiduek le toe sapat dua

Pajoh ranub na sigapu  
Teuma meusu putroe muda  
Suara mangat sang ie madu  
Bungong meulu panton jiba

Rampeuneung meuen cong iboh  
Lheuek utoh meuen bak data  
Hanco hate pijuet tuboh  
Lom preh-preh troh po meukuta

Meunan jikheun Janu Hate  
Bungong giri hate suka  
Hamidasyah jiseuot le  
Hai putroe ti bungong jeumpa

Aneuk rampeuneung keunong geutah  
Teuka siwah jak peufana  
Uroe malam ate bicah  
Suntok payah rok-rok masa

Di atueh gle cot sikurah  
Kayee reubah dum meutimpa  
Pihak hate lon that gundah  
Lon langkah hana soe maba

Bak lon sangka puleh hate  
Ek meusampe ban nyang pinta  
Oh troh keunoe ulon tuan  
Han soe sayang ube seuma

Pihak lon ureueng meuladang  
Han soe pandang siblah mata  
Meunan narit po samlakoe  
Sinyak putroe jawueub sigra

Ceundana titnloh di buket  
Meuapet ngon meudang ara  
Pakon tuanku hate saket  
Ban kheundak sabet ulon rila

Beuriweueng timoh di pante  
Meurante timoh bak data  
Bek tuanku saket hate  
Rila lon cre tuboh ngon nyawa

Takoh tampu plah keurujee  
Peugot bajee ija sutra  
Hai Tuanku saba dilee  
Bek jithee le ureueng lingka

Bukon sayang bungong seuruni  
Ayeuem putri di astana  
Bek le susah tuanku droe  
Taboh lon nyoe neupeu hamba

Jinoe tuanku dang masak bu  
Tameucato sikleb mata  
Got ngon jeuheut meunang talo  
Bek tuanku hate luka

Meung na hajat ngui peukayan  
Jak u peukan meuniaga  
Meungna hajat putroe intan  
Jak maenan dilee mula

Meung na hajat tacok unoe  
Ek jinoe cong kayee raya  
Meung na hajat meutueng kamoe  
Laba rugoe bek neukira

Meunan narit Janu Hate  
Banta ahli malee raya  
Teuma beudoh po juhari  
Ngon putroe ti meuen dua

Putroe tanyong padum taroh  
Tuanku boh phon tamula  
Hamidasyah hate sunggoh  
Puteh lusoh dum nyang suka

Meunyo meunan hai panghulee  
Siribee taroh tamula  
Han peue salah bungong keumbee  
Siploh ribee pi lon rila

Putroe meuen yoh nyan laju  
Ngon tuanku sajan dua  
Talo putroe bungong meulu  
Hate seuu banta muda

Keureuna phon talo putroe  
Mangat asoe seunang teuka  
Oh ka talo tuan putroe  
Tarah bunoe jok keu banta

Hamidasyah galak hansoe  
Meuen lom nyoe misue nyang ka  
Ingat jih that bungong keundo  
Aneuk cato sabe jijaga

Teungoh hibat meuen cato  
Meunyum talo putroe muda  
Putroe kalon han got laku  
Troph le laju kucing teuka

Sinyak putroe bri isyarat  
Kucing sangat tupeue basa  
Jilumpat le keunan pantaih  
Lampu bicah han le cahya

Sret le panyot ka meuhambo  
Tikoh tajo pantaih sigra  
Ka jituka aneuk cato  
Putroe a-o pura-pura

Pura-pura peubungeh droe  
Bek gob tupeue nyan rahsia  
Putroe meuhei le deundayang  
Keunoe rijang panyot taba

Deundayang me lampu rijang  
Ka trang bandrang miseu nyang ka  
Meuen laju miseue dilee  
Ka lam tipee banta muda

Bit pi meunan hana jithee  
Bungong keumbee bingong raya  
Hingga talo Hamida: yah  
Habeh sudah dum hareuta

Teuma marit putroe indah  
Piyo payah po meukuta  
Bahta piyo siat jinoe  
Tuanku droe malam jula

Seuot banta neukheun meunoe  
Hajat kamoe lom ngon gata  
Meung sigo treuk wahe putroe  
Lheueh nibak nyoe ka mumada

Ban jideungo meunan bagoe  
Meuen jinoe laju sigra  
Rakyat han le banta seudang  
Peukayan laju jibuka

Ukeue putroe tumpok rijang  
Banta seudang nyankeuh banda  
Meuen laju bungong keundo  
Nyan pi talo miseu nyang ka

Sang han jeuet le geujak cato  
Tahe gante banta muda  
Bukan sayang bungong peukan  
Dalam karang habeh mala

Bukon sayang banta seudang  
Meubacut tan le hareuta  
Geucré gampong tinggai teumpat  
Mita ubat keu ayahanda

Oh troh keunan bungong riwat  
Keunong leugat tipee daya  
Teuma marit tuan putroe  
Tuanku droe ka mumada

Malam jula beungoh ka toe  
Ulonceu nyoe teungeut mata  
Seuot banta teuma leugat  
Nyoe ka rab that uroe faja

Bah le beungoh uroe meuhat  
Lon hajat that meuen ngon gata  
Putroe deungo haba meunan  
Meuen yoh nyan miseue nyang ka

Hamidasyah marit yoh nyan  
Deungo laman putroe muda  
Hareuta di lon cit hana le  
Ka meusampè keu gata lon ba

Meunyo talo lon watee nyoe  
Tuboh kamoe tapeuhamba  
Teuma meunyo meunang kamoe  
Ban sinaroe pulang hareuta

Meunan narit po samlakoe  
Sinyak putroe kaboi sigra  
Meuen laju miseue bunoe  
Meunang putroe talo banta

Hireuen tahe po samlakoe  
Hana sapeue pi le haba  
That teupike dalam hate  
Sang ka cre tuboh ngon nyawa

Janu Hate yoh nyan hei le  
Si pai nyang kawai kuta  
Oh troh keunan jikheun meunoe  
Taba gob nyoe lam peunjara

Lheueh peurintah nibak putroe  
Jiba jinoe laju sigra  
Teutap jiba po samlakoe  
Hana sapeue pi le haba

Bukon sayang taeu seulayang  
Angen timang rok-rok masa  
Bukon sayang banta seudang  
Ka meulang-lang lam peunjara

Pihak nafsu putroe bungong  
Habeh nyawong ngon hareuta  
Nyankeu rakan ingat keudroe  
Barangkasoe tuha muda

Peuturot nafsu malee han le  
Peuturot hate hilang nyawa  
Peuturot angen putoh taloe  
Peuturot putroe malee raja

Hamidasyah ka meusampe  
Dalam rante nantiasa  
Dum na rakan woe keumbali  
U keude bak teumpat nyang ka

Oh troh keudeh jikheun meunoe  
Ubak adoe banta muda  
Ampon maaf tuanku droe  
Bandum kamoe ka meugisa

Hamidasyah nyang samlakoe  
Ka jipasoe lam peunjara  
Habeh hareuta dum sinaroe  
Tueng le putroe nyang jroh rupa

Hareuta habeh ngon peukayan  
Geujok badan geupeuhamba  
Ban jideungo haba meunan  
Beungeh yoh nyan hu ngon mata

Jibeudoh le pantaih rijang  
Jipeuseunang dalam kuta  
Geujak laju banta seudang  
Sabab sayang keu seedara

Oh troh keudeh po samlakoe  
U meuligoe ek le sigra  
Janu Hate nyang sambinoe  
Di meuligoe meusuka-suka

Teungoh duek-duek tuan putroe  
Ka troh sampoe banta muda  
Oh sare troh u meuligoe  
Beudoh putroe po mulia

Jok ngon ranub mumat jaroe  
Ampon kamoe po meukuta  
Ho bu langkah payong nanggroe  
Nyang troh keunoe peue na haba

Banta seuot laju meunoe  
Wahe putroe nyang jroh rupa  
Lon ngo sinoe na peurasan  
Ulon tuan galak suka

Meunyo cit na bungong peukan  
Ngon lon tuan meuen dua  
Teuma seuot putroe intan  
Jeuet jonjongan han peue mara

Teuma meuen laju yoh nyan  
Cut budiman deungon banta  
Nyan pi talo miseue bunoe  
Han peue adoc lon calitra

Hana peue le lon hareutoe  
Buet cut putroe tipee daya  
Hingga ban peuet ka meupaloe  
Ka jipasoe lam peunjara

Tinggai rakan dum sinaroe  
Banta peuet droe ka binasa  
Uleebalang meuntroe wazi  
Woe keumbali dum u tangga

Bandum rakyat habeh cre bre  
Hana soe le nyang panglima  
Maseng-maseng ban nyang pike  
Ladom u gle jak meudama

Ladom u timu ladom barat  
Ladom rakyat jak seumuga  
Teuma ladom woe u teumpat  
Ladom meuhat meuniaga

Meunankeuh hai wahe sahbat  
Maseng rakyat ho nyang suka  
Bukon sayang taeu kandeh  
Boh jih habeh musang seuba

Teiduek oh noe saboh lapeh  
Jinoe keudeh lon calitra  
Seureuta lon balek ayat  
Deungo sahbat dum beurata

Meunyo sot-sot ujung ayat  
Kureueng mangat galak tabaca  
Bukon sayang bak seumantok  
Habeh pucok ulat seuba

Meuwoe kisah Tajul Muluk  
Bek le daok ngo beurata  
AMMA BAKDU kisah rawi  
Banta ahli ulon peugah

Tajul Muluk nyang juhari  
Dalam hati sangat gundah  
Oh leupah woe meuntroe wazi  
Hana sakri hate susah

Ingat aduen bungong giri  
Keunong taki putroe ceudah  
Sret ie mata tan beureunti  
Bak ilahi droeneuh seurah

Hana guna lon duek sinoe  
Hate lon nyoe sabé bicah  
Teuma beudoh po samlakoe  
Neujak sidroe seutot langkah

Neujak laju taloe jalan  
Troh u peukan bungong mirah  
Meuteumeung le sidroe insan  
Rupa na ban meuh keureutah

Nibak tuboh dum peukayan  
Pudoe intan hu meutatah  
Tajul Muluk ngieng lakuan  
Pike yoh nyan banta indah

Nibak adat lon eu bagoe  
Sang gob nyoe ureueng meutuah  
Bah le jinoe ulon peutoe  
Lon peugah proe jalan susah

Kadang cit na inseuh hate  
Geutem bri keu lon isyarat  
Meunan leumah dalam hate  
Neupeurab le keunan pantaih

Oh troh keunan po samlakoe  
Sujud jinoe deungon reundah  
Syeedaga ngieng meunan bagoe  
Ngon jaroe neusambot bagah

Oh ban neungieng banta muda  
Tanyong lanja pane langkah  
Datok meuntroe ureueng kaya  
Ngon hareuta that barullah

Ho bu langkah hai aneukda  
Lon eu rupa sang beulisah  
Tajul M<sup>ul</sup>uk seuot sigra  
Ngon ie mata peunoh limpah

Oh ka han le ayah bunda  
Jeueb-jeueb donya lon meulangkah  
Manyak lon kon meunan sabé  
Allah wahe teungku ayah

Ka grak Tuhan Rabbul Kade  
Meunan neubri lon paban bah  
Meunan neukheun bungong meulu  
Syeedaga eu sayang leupah

Teuka inseuh neungieng laku  
Neukheun laju meunoe ilah  
Meunyo meunan bungong geutoe  
Tadong sinoe sajan ayah

Gata lon tueng keu aneuk droe  
Sampoe dudoe hana ubah  
Meunan neukheun datok meuntroe  
Po samlakoe hate dasyah

Teuma seuot bungong keumbee  
Ateueh ulee ulon keubah  
Ubak Allah lon meulakee  
Bu meuteumee tanom ayah

Phon jinoe kon troh ngon page  
Bek Tuhan bri roh lon ubah  
Meunan narit banta muda  
Syeedaga hate that dasyah

Tajul Muluk nyang bagia  
Keu syeedaga neukheun ayah  
Teutab sinan bak syeedaga  
Banta muda nyang meutuah

Datok meuntroe ureueng kaya  
Dum hareuta han ek peugah  
Troph meusyeuhu jeueb-jeueb nanggroe  
Syeedaga nyoe kaya limpah

Sangat kaya datok meuntroe  
Lom jipujoe jeueb meunasah  
Teutab sinan po samlakoe  
Datok meuntroe nyang peurintah

Phon-phon geuyue jak sikula  
Geubri aja meuh meutatah  
Geuyue peubeuet jeueb-jeueb basa  
Bak keunira pi ka ceudah

Tuleh muleh dum peukara  
Pupoh angka utoh leupah  
Habeh maklum dum sigala  
Syeedaga ka galak leupah

Lheueh nyan geuyue meuniaga  
Banta muda nyang meituah  
Dum meuneukat keunan jiba  
Singapura nanggroe indah

Oh troh keunan habeh saja  
Syeedaga ka teuhah babah  
Han ek lawan banta muda  
Tiep peurkara deungon mudah

Padum lawet teuma akhe  
Leumah pike banta indah  
Keupeu guna lon duek sabe  
Malam hari hate dasyah

Ayah di lon lam nazaa  
Ubat hana lon seuleuah  
Lom ngon aduen lam peunjara  
Rok-rok masa keulu keusah

Allah Allah ya Rabbana  
Pakri daya deungon ilah  
Meunan neukheun po jroh rupa  
Ngon ie mata peunoh limpah

Ho ulon jak ya Rabbana  
Akai beuna keu lon tuan  
Bumeuteumeung Meungkawali  
Ubat duli teungku ayah

Tan pat laen ulon kheun ban  
Meulaenkan bak po ku Allah  
Aduen ulon nyang jitawan  
Neubri jalan beuek leupah

Ya Ilahi poku Tuhan  
Neubri jalan deungon mudah  
Meunan neukheun banta seudang  
Ie mata ban ujeuen bicah

Teungoh duek-duek banta muda  
Ureueng tuha sidroe langkah  
Oh ban neueu ureueng tuha  
Po jroh rupa meuhei pantaih

Ureueng tuha keunan peutoe  
Mumat jaroe neupeuindah  
Teuma marit po samlakoe  
Hajat kamoe poh beurakah

Nyang jeuet lon hei siat keunoe  
Deungo kamoe teungku ayah  
Lon meutanyong saboh haba  
Neupeunyata asaliah

Bek na bacut musom punca  
Neucalitra deungon ikhlaih  
Janu Hati putroe muda  
Pakri rupa teungku peugah

Teuma jawueub ureueng tuha  
Deungo hamba kheun sipatah  
Janu Hati nyang sambinoe  
Hana bagoe utoh leupah

Raja-raja wazi meuntroe  
Le that paloe nyak meutuah  
Nyang jak keunan hana le woe  
Beurangkasoe hina meugah

Habeh hareuta dum keu putroe  
Ladom droe-droe peusambot sah  
Le that ureueng ka meupaloe  
Hai aneuk droe tapabanbah

Teuma seuot po samlakoe  
Hai ayah droe lom neupeugah  
Janu Hati le hikeumat  
Neupeugah hat teungku ayah

Ureueng tuha teuma seuot  
Hai aneuk cut nyang meutuah  
Lahe baten got ngon jeuheuet  
Meung bacut hana tom leumah

Tan lon teupeue meung sigetu  
Aneuk teungku nyan peurintah  
Nyang na teupeue aneuk teungku  
Sidroe nek tu nyang meutuah

Nama geukheun nek Kubayan  
Nyang na tuban bungong lipah  
Cuba tajak gata keunan  
Troh bak gobnyan kadang leumah

Kamoe laen han troh juga  
Rahsia cut putroe indah  
Meunan narit ureueng tuha  
Seungab haba oh nan sudah

Tajul Muluk nyang bahgia  
Beudoh sigra neucock langkah  
Ngui peukayan ban sikada  
Bak nek tuha neujak bagah

Bak teumpat ni ka troh sampoe  
Asa uroe sampoe langkah  
Nek Kubayan teungoh manoe  
Po samlakoe neueu leumah

Neupeurab le po samlakoe  
Jak com jaroe laju pantaih  
Nek Kubayan tahe hireuen  
Neungieng bagoe banta indah

Oh sare lheueh mumat jaroe  
Nek tanyong proe meunoe ulah  
Wahe aneuk bijeh mata  
Pane teuka ho bu langkah

Pat bu gampong keunoe teuka  
Hai aneukda beuta peugah  
Banta jawueub meusom punca  
Wahe bunda nyang meutuah

Gampong nanggroe han lon tupat  
Lon ka treb that cre ngon ayah  
Habeh lon jak jeueb-jeueb donya  
Hingga teuma nyoe ho sudah

Meung na gaseh nek teungku droe  
Neutueng kamoe namiet nyang sah  
Meunan narit po samlakoe  
Po nek sidroe inseuh leupah

Teuka sayang dalam hate  
Neupeugah le meunoe ulah  
Wahe aneuk nyang samlakoe  
Tapeujok droe ubak Allah

Bek tajak keudeh keunoe  
Bah bak kamoe teuduek dasyah  
Poku Tuhan nyang peulara  
Hai aneukda bek le susah

Tajul Muluk jawueb sigra  
Nibak hamba ban nyang titah  
Ban nyang neukheun ulon rila  
Di jeumala ulon keubah

Hingga teuma banta muda  
Bak nek tuha neuduek dasyah  
Neukaseh that hana tara  
Dum hareuta gob nyan pabah

Bandum hareuta nek Kubayan  
Dalam tangan banta indah  
Hana sapeue keususahan  
Meulaenkan lam geuduek dasyah

Padum lawet teutap sinan  
Sajan nek nyan bungong kipah  
Bak siuroe bungong pade  
Ka teupike banta indah

Teuka susah dalam hate  
Ingat duli teungku ayah  
Ingat aduen lam peunjara  
Hana nyang sa hate susah

Bu neupajoh han meurasa  
Sret ie mata peunoh limpah  
Nek Kubayan tanyong sigra  
Hai aneukda pakon susah

Soe na carot soe dhot gata  
Nyang jeuet duka nyak meutuah  
Peue na hajat ta meunafsu  
Jinoe laju lon seuleuh

Nyang bek buleuen deungon uroe  
Laen sinaroe ek lon ilah  
Meunan po nek neupeugah proe  
Po samlakoe seuot bagah

Bek neutanyong ma teungku droe  
Hate lon nyoe sang ka bicah  
Han le teungeut malam uroe  
Sang bagoe teubiet aruah

Peuekeuh sabah bungong geutoe  
Bak kamoe bacut tapeugah  
Beuthat jarak jeuoh nanggroe  
Lon cok keunoe bek tagundah

Meunan narit Po nek tuha  
Seuot banta laju bagah  
Han lon peugah wahe po ma  
Meunyo hana neumeusumpah

Deumi Allah deungon Nabi  
Hai puteh di han lon ubah  
Meunglon peugah bak barangkasoe  
Beureuloh gigoe deungon babah

Wahe ma po ma teungku droe  
Hate lon nyoe keulu keusah  
Rindu hate malam uroe  
Ingam putroe bungong kipah

Silama cut meuen cato  
Han tom talo ma meutuah  
Cit lam meunang bungong keundo  
Padum na le uroe meugah

Meunyo cit ka jilhom taroh  
Jisampoh le putroe ceudah  
Meunan bandum ma teungku beh  
Ladom tuboh jipubloe sah

Peuekeuh sabab nyang jeuet meunan  
Hai ma badan cuba peugah  
Meunyo hana neupeugah nyan  
Bah le laman nyawong sudah

Meunan neukheun Tajul Muluk  
Nek teuseupok teuhah babah  
Ngon ulee meuanggok-anggok  
Po nek datok leupah sumpah

Yoh nyan po nek le hareutoe  
Deungo kamoe aneuk lidah  
Saboh tikoh sangat ragoe  
Kucing sidroe nyak meutuah

Janu Hati putroe ijo  
Panyot lampu peuduek bagah  
Ateueh ulee kucing ragoe  
Sambinoe panyot jikeubah

Oh troh watee talo putroe  
Kucing ragoe di isyarat  
Kucing lumpat sang teukeujot  
Tikoh jigrob keunan bagah

Panyot pi len teuka seupot  
Putroe carot han peue peugah  
Pura-pura peubeungeh droe  
Tikoh ragoe laen ulah

Lam seupot klam tikoh lalu  
Aneuk cato tuka pantaih  
Troh lom panyot deundayang ba  
Gadoh lanja tikoh indah

Meunankeuh buet rok-rok masa  
Putroe muda raya ilah  
Tajul Muluk deungo meunan  
Sikalian meuphom sudah

Banta kheun bak nek Kubayan  
Izin kaman lon meulangkah  
Euntreuk malam lom ulon woe  
Meungbek paloe teuka susah

Po nek seuot neukheun meunoe  
Hai samlakoe nyak meutuah  
Meunyo tajak bek treb tawoe  
Seupot uroe beutroh langkah

Meutan tawoe bungong pade  
Reuloh hate lon meutuah  
Insya Allah hai ma badan  
Ulon riwang keunoe bagah

Lheueh nibak nyan banta seudang  
Neutron rijang neucock langkah  
Bak seedaga troh neuriwang  
Banta seudang nyang meutuah

Seedaga neutanyong yoh nyan  
Aneuk badan pane langkah  
Pane tajak bungong peukan  
Ulon tuan hate bicah

Teuma seuot banta muda  
Payah raya lon seuleuah  
Meunan narit banta muda  
Syeedaga ka hate dasyah

Singoh uroe po jroh rupa  
Beudoḥ lanja neucock langkah  
Aneuk musang neujak mita  
Jeueb-jeueb rimba jak seuleuah

Meuteumeu le musang rimba  
Neupeulara jroh neupapah  
Ho nyang neujak bungong keumbee  
Dalam bajee nyan neukeubah

Han meusidroe na ureueng thee  
Dalam bajee han tom leumah  
Uroe malam sajan banta  
Musang rimba lam neupapah

Hingga utoh musang ragoe  
Geunap uroe bri isyarat  
Padum lawet teuma dudoe  
Bak siuroe banta indah

Laju neujak u meuligoe  
Ubak putroe sampe langkah  
Ban jikalon uleh putroe  
Rupa bagoe buleuen peuet blaih

Rupa elok hana nyang sa  
Han tom nyang ka meunan ulah  
Leubeh ribee aneuk raja  
Keunoe teuka lon kalon sah

Hana meunoe indah rupa  
Ube nyang ka lon eu leumah  
Janu Hati hate suka  
Sang beujiwa banta indah

Teuma leumah dalam hate  
Gotkeuh bah le lon jak seumbah  
Boh ngon ranub dalam bate  
Bungong pade jicok langkah

Ban sare rab banta muda  
Jaroe dua beuet pantaih  
Ampon meuah po meukuta  
Patek hamba ka dilangkah

Di leuen rumoh pula giri  
Di pasi geupula lipah  
Teurtib majlih han lon turi  
Ampon duli neupeumeuah

Meunan jikheun Janu Hati  
Po juhari jaweueb bagah  
Bak bineh blang pula campli  
Bak bineh gle pula birah

Ampon bak Allah deungon Nabi  
Bak lon cut ti hana salah  
Lheueh nibak nyan teuma dudoe  
Po samlakoe duek le bagah

Ateueh tilam nyang meusunjoe  
Kasab rumboe meuh meutatah  
Janu Hati jiduek le toe  
Miseue lakoe meunan ulah

Jijok ranub jiboh ꝓapu  
Keu tuanku suleueng pantaih  
Banta pajoh ranub sigapu  
Teuma meusu putroe ceudah

Suara sang buloh meurindu  
Soe deungo su pangsan reubah  
Cok beuliong koh ceundana  
Peusapat lha peugot rampah

Rindu hate hana tara  
Neupeunyata haba sipatah  
Pat bu nanggroe di tuanku  
Soe nan ibu deungon ayah

Nyang troh keunoe peue na nafsu  
Kheun sigeutu hai deelat syah  
Bek neutanyong hai adekda  
Hana guna ulon peugah

Tinggai ibu dalam rimba  
Ngon ie mata peunoh limpah  
Lon pi adek hate luka  
Lam rahnia lumpoe leumah

Jeub-jeueb tabib lon pi teuka  
Treh bak gata lon meulangkah  
Bit pi baek taeu rupa  
Lam dada sang-sang ka bicah

Bit pi lon jak jeueb-jeueb donya  
Siblah mata lon klam sudah  
Meutan ubat nibak gata  
Akhe masa nyawong sudah

Janu Hati laju seuot  
Ban nyang patot ulon peugah  
Peue tuanku na meukeusud  
Dalam laot lon seuleuah

Kadang-kadang ek ulon bri  
Peugah duli bak lon pantaih  
Seuot banta nyang juhari  
Deungo cut ti ulon peugah

Ubat mata cicem nuri  
Rajawali nyankeuh siwah  
Puleh hate lon meunggeubri  
Mata lagi peungeuh leupah

Cicem nuri pirak hupam  
Bulee itam paroh mirah  
Ngon suara jroh that lagam  
Hana macam rupa indah

Nyankeuh ubat hai sambinoe  
Harap kamoe taseuleuah  
Teuma seuot Janu Hati  
Keu lon neubri meungna leumah

Bak pœunyum lon wahe duli  
Keu lon neubri cicem indah  
Meunan di lon hate nyang brat  
Wahe deelat nyang meutuah

Bit pi meunan tuanku droe  
Na cit sinoe nuri indah  
Jinoe taren tuanku bri  
Bah le lon ci jak seuleuah

Siploh ribee ringget neuro  
Nireng cato nyan neukeubah  
Meunyo na nyan tuan ku e  
Nuri lalu keunan bagah

Jijak meuen ngon tuanku  
Meunan nafsu nuri indah  
Meunyo talo nuri ragoe  
Jipubloe droe keu khalifah

Jeuet neukeubah jeuet neupubloe  
Bah suka droe neupeurintah  
Meunyo talo ampon deelat  
Cok keu ubat nuri indah

Jiteureubang gadeh bakat  
Deungon siat han le leumah  
Tajul Muluk nyang juhari  
Dalam hate margat leupah

Neusuet ringget dalam bajee  
Bungong keumbee peuduek bagah  
Yoh nyan meuen po samlakoe  
Deungon putroe rupa ceudah

Tet ngon panyot miseue nyang ka  
Putroe muda mita ilah  
Keumeung tipee banta muda  
Bak jisangka sang ek keumah

Meuen laju sinan dua  
Talo banta nyang meutuah  
Pura-pura peutalo droe  
Sinyak putroe khem meuhah-hah

Teuma marit bungong teuprom  
Tameuen lom cut meutuah  
Taboh taroh siploh lakså  
Meunang gata hai cut indah

Jaweueb putroe ulon rila  
Ban nyang suka bak khalifah  
Meuen laju han peue kira  
Bandua ceureudek leupah

Tajul Muluk ceureudek han ban  
Sang tiwasan putroe indah  
Meunyum talo putroe muda  
Bak mie sigra jiisyarah

Kucing lumpat pantaih rijang  
Lampu nyang trang len le sudah  
Banta kalon meunan macam  
Musang agam peulheueh bagah

Musang tajo keunan curam  
Lam seupot klam bak mie juah  
Aneuk tikoh tajo rijang  
U hadapan putroe ceudah

Yoh nyan tikoh tahe mandang  
Jingieng musang sinan leumah  
That jitakot hana macam  
Leungo badan sang ka bicah

Aneuk tikoh jiminah le  
Keumbali bak asaliah  
Tajul Muluk narit meunoe  
Wahe putroe meuh meutatah

Saboh panyot han tamubloe  
Dum na rugoe putroe indah  
Putroe neuhei le deundayang  
Taba rijang lampu bagah

Troh le panyot keunan datang  
Ka trang bandrang meujeureulah  
Aneuk cato putroe pandang  
Hana leukang bak keuneubah

Dalam hate puteh leusoh  
Pakon tikoh han jipinah  
Aneuk cato mantong bak sot  
Cut putroe got hate susah

Saket hate bungong teuprom  
Jimeuen lom ngon khalifah  
Tikoh paleh bu mie teugom  
Ka ji meusom han le leumah

Padum na treb meuen cato  
Hingga talo putroe ceudah  
Pucat muka mandang tahe  
Bungong keundo hate susah

Bayeue taroh siploh laksa  
Sret ie mata bungong mirah  
Ban nyang nafsu putroe muda  
Panyang sahja bek tagundah

Meuen laju miseue nyang ka  
Hingga jula malam sudah  
Janu Hati lom ka talo  
Hate kuyu that geulisah

tuan putroe hate gigeng  
Ubak kucing jiisyarah  
Ka jiem droe hana jingieng  
Jiking-king hana muminah

Tuan putroe kalon meunan  
Hana lawan hate gundah  
Lom ka talo putroe intan  
Banta seudang khem meuhah-hah

Putroe malee hana bagoe  
Sang jitob droe sinan sudah  
Bayeue taroh dum sinaroe  
Sang ka jimoe putroe ceudah

Gadoh utoh han le ragoe  
Sinyak putroe malee leupah  
Tajul Muluk neukheun meunoe  
Hai sambinoe putroe indah

Tabri izin bungong geutoe  
Lon meujak woe hai meuh mirah  
Meung na umu buleuen peunoh  
Malam singoh lom lon langkah

Tameuen nyoe hana meuoh  
Han lon jinoh talo sudah  
Peue cit adek lon ngo bunyoe  
Jeueb-jeueb nanggroe meusyeuhu gah

Ramphak-ramphak cabeueng murong  
Oh angen cron habeh reubah  
Rancak bijak bungong tanjong  
Jeueb-jeueb gampong meusyeuhurah

Pakon meunan bak malam nyoe  
Sang-sang putroe han le aruah  
Miseue manok ka lheueh talo  
Ka teuseungko ulee beukah

Hana patot bungong keundo  
Sie ban tulo gah ban gajah  
Lom pi taroh gata bacut  
Hana bacut ulon ubah

Bak lon jak woe wahe po cut  
Di lon teungeut mata sudah  
Janu Hati teuma seuot  
Bungong rambot malee leupah

Bek le neukheun tuan putroe  
Adekneuh nyoe hate bicah  
Jinoe nyang na wahe duli  
Beumeusampe hai deelat syah

Tuanku jak teumpat kamoe  
Ka han rugoe bek na payah  
Bah tameuen lom sikali  
Mangat meuri meunang siblah

Meunyo talo Janu Hati  
Kuta neugri jipeujok sah  
Lom hareuta ngon meuligoe  
Laen bagoe lom lon seurah

Nyang laen lom tuanku droe  
Nyawong asoe darah gapah  
Neutueng ulon neupeuhamba  
Soe srah ija ngon neukeubah

Meunan jikheun putroe muda  
Yoh nyan banta jawueub bagah  
Taek u gle koh seumantok  
Peugot bidok nyang jroh indah

Nafsu hate Tajul Muluk  
Nyoe baro troh nyak meutuah  
Tapok tupeuen sutra ijo  
Peugot boh ru meuh nyang meuntah

Tajul Muluk meunyo talo  
Han le jieu ma ngon ayah  
Jeuet keu namiet Janu Hati  
Keu sipai nyang that reundah

Meunan neukheun po juhari  
Bak putroe ti rupa ceudah  
Meuen laju ban dua droe  
Janji sampoe deungon sumpah

Teungoh meuen Janu Hati  
Leumah pike putroe indah  
Mita akai tuan putroe  
Po samlakoe beuek kalah

Barangkari kubicara  
Beuek daya banta indah  
Meunyo talo banta muda  
Jeuet ban suka lon peurintah

Janu Hati meunan pike  
Dalam hate meunan leumah  
Bak jikira ek meusampe  
Sang ek hase bak jigagah

Han jitupeue panyot kande  
Hana sabe banta indah  
Aneuk geutue tho ka sret bak tapak  
Barangho jjak han jiboh kada

Tatob ngon rincong mata han meukleb  
Aneuk manok nieb meuen bak data  
Adat meungkon meunan untong  
Pat jieuet kong ureueng meugah

Janu Hati pat jituh  
Di rumoh han tom jiminah  
Meuen laju simalam beungoh  
Putroe mehmoh apoh apah

Meunyum talo cut putroe ti  
Dalam hate hanco bicah  
Tuan putroe susah hate  
Han jitukri mita ilah

Mie tiek iku leubab leuboh  
Han jeuet jigrob saboh langkah  
Tajul Muluk nyang analan  
Rahsia nyan neutupeue sah

Jimarit le deungon basa  
Musang rimba ngon mie juah  
Ateueh kucing musang pandang  
Matajih trang ijo mirah

Di kucing pi keunan mata  
Meunyum rasa ka meubantah  
Badan tuboh miseue geumpa  
Musang rimba jitakot leupah

Sinyak putroe nyang juhari  
Dalam hate that amarah  
Cukeh laju nibak badan  
Mie itam laju muminah

Panyot ka len seupot buta  
Di banta ka teuhah babah  
Aneuk tikoh jiplueng sigra  
U para laju meulangkah

Musang rimba that jitakot  
Po banta cut marit pantaih  
Pakon putroe peulen panyot  
Sang-sang han got meunan ulah

Putroe meuhei le deundayang  
Lampu nyang trang taba bagah  
Deundayang ba lampoe rijang  
Peungeuh bandrang meujeureulah

Meuen le lom miseue nyang ka  
Putroe muda hate susah  
Tan jituoh meuen cato  
Putroe tahe teuhah babah

Sinyak putroe bungong keundo  
Tahe gante hireuen dasyah  
Hana sapeue le jeuet meututo  
Ie mata ro peunoh limpah

Bukon sayang cicem ujeuen  
Keuñong peunadeuen gaki patah  
Janu Hati tahe hireuen  
Duek teujunun hate gundah

Tajul Muluk nyang juhari  
Neumarit le meunoe ulah  
Dileuen rumoh pula riwat  
Di ateueh jeurat pula lawah

Hai putroe cut pirak lipat  
Ka troh hajat ban neupeugah  
Peue lom taduek bungong keundo  
Ka sah talo putroe indah


Janu Hati malee han soe  
U meuligoe jiek pantaih  
Jicok gunci mat bak jaroe  
Yoh nyan peutoe ka jipeuhah

Meuh suasa intan pudoe  
Laen bagoe han peue peugah  
Peutron laju u seuramoe  
Sinyak putroe hate bicah

Jiangkat le deungon jaroe  
Ampon kamoe hai deelat syah  
Meuah ampon po jonjongan  
Patek laman namietneu sah

Ban peurintah po jonjongan  
Patek lama hana bantah  
Tajul Muluk jaweueb rijang  
Hai buleuen trang nyang meutuah

Bandum hareuta ka tapulang  
Dum sibarang buloh bicah  
Lom meuligoe deungon kuta  
Lom droe gata tapeujok sah



Bumeutuah cut putroe ti  
Ban nyang janji hana ubah  
Lon teurimong seunang hate  
Ka meusampe **cut** meutuah

Jinoe nyang got panyot kande  
Beujinoe le tajak keubah  
Bandum nyang na hareuta kamoe  
Tuan putroe nyang peurintah

Laen nibak nyan bungong riwat  
Ureueng lam glap tajak peuhah  
Nyang keuh jinoe nyang lon harap  
Bek rukha that cut meutuah

Maseng teumpat dum tayue woe  
Banta peuet droe nyang takeubah  
Tayue jak beulaju keunoe  
Lon meungieng soe pakri ubah

Putroe deungo haba meunan  
Dalam jeuem nyan jiyue peuhah  
Habeh bandum ka jiyue woe  
Banta peuet droe jiba pantaih

Oh troh keunan bak samlakoe  
Sujud jinoe deungon reundah  
Lheueh jisujud ubak raja  
Bandum sigra jimeu seumah

Banta peuet droe teukui ulee  
Sabab malee keu khalifah  
Sang ka judo bungong keumbee  
Hana jithee syeedara sah

Tajul Muluk tanyong meunoe  
Pat bu nanggroe bunda ayah  
Banta peuet droe seuot rijang  
Syarikatan nanggroe nyang sah

Kamoe ban peuet aneuk sulotan  
Hai jonjongan bungong kipah  
Dilee meujak saboh masa  
Meujak mita ubat ayah

Nyoe goh lom troh kamoe mita  
Silab mata hai khalifah  
Neubri bala uleh Rabbi  
Sabab janji ka meu ayah

Meunan narit banta peuet droe  
Bak samlakoe dum geupeugah  
Teuma seuot po samlakoe  
Neupeugah proe meunoe ulah

Jinoe taduek lam kuta nyoe  
Deungon kamoe taduek dasyah  
Teuma seuot banta peuet droe  
Nibak kamoe ban peurintah

Ban nyang sabda bak jonjongan  
Nibak laman hana ubah  
Lheueh nyan teuma po samlakoe  
U meuligoe neuek bagah

Neujok laju dum peukayan  
Peutron yoh nyan keu cut indah  
Peuet droe aduen neubri peukayan  
Saban-saban rupa gagah

Ban lakuan aneuk raja  
Duek lam tahta nyang that indah  
Teutap sinan peuet droe banta  
Putroe muda muwoe kisah

Ngon samlakoe nyang jroh rupa  
Lam astana teuduek dasyah  
Ureueng lam glap habeh jiwoe  
Malam uroe meusyahadah

Lakee doa malam uroe  
Keu samlakoe nyang meutuah  
Sabab leupah lam peunjara  
Pie banta nyang seuleuah

Adat kon na banta muda  
Seuntok masa apoh apah  
Sabab talo tuan putroe  
Dum geutanyoe han le susah

Beuseulamat po samlakoe  
Beujeuet dudoe keu khalifah  
Meunan narit dum sinaroe  
Oh troh jiwoe ubak zaujah

Teutap oh nan ureueng gisa  
Lon calitra banta indah  
Deungon putroe bintang kala  
Lam astana neuduek dasyah

Putroe meuhei syekh ulama  
Dalam kuta neuyue langkah  
Troh ulama keunan lhee droe  
U meuligoe putroe indah

Bri makanan peumulia  
Ban nyang kada ureueng meugah  
Oh lheueh makeuen dum sinaroe  
Neutron jinoe banta indah

Seureuta deungon tuan putroe  
Bandua droe keunan langkah  
Neupiyoh le laju sinan  
Di hadapan teungku syiah

Marit putroe bungong meulu  
Ubak teungku le neupeugah  
Wahe teungku guree hamba  
Kamoe dua neupeunikah

Marit putroe bungong meulu  
Ubak teungku le neupeugah  
Wahe teungku guree hamba  
Kamoe dua neupeunikah

Deelat ampon raja muda  
Jinoe banta jeuet keu zaujah  
Meunan narit po samlakoe  
Teungku jinoe kheun bismillah

Lon peunikah tuan putroe  
Ngon samlakoe nyang meutuah  
Banta seuot laju meunoe  
Kabui kamoe teungku syiah

Janu Hati judo kamoe  
Sambinoe dudoe han ubah  
Lheueh nyan teungku neubeuet doa  
Lheueh nyan teuma bri seudeukah

Oh ka hase dum seuleusoe  
Teuma neuwoe teungku syiah  
Teungku syiah ka leupah woe  
Tinggai putroe ngon khalifah

Uroe malam meuseusuka  
Deungon banta nyang meutuah  
Tajul Muluk nyang samlakoe  
Hana padoe pujoe Allah

Putroe hana neupaduli  
Sabab hate that beulisah  
Banta neueh sajan putroe  
Malam uroe hate gundah

Tan seutuboh deungon putroe  
Samlakoe lam apoh apah  
Janu Hati nyang sambinoe  
Malam uroe hate susah

Sabab nafsu hana sampoe  
Sinyak putroe hate bicah  
Hana teungeuet malam uroe  
Sabe putroe lam beulisah

Jimeunglahe bungong keumbee  
Sang-sang malee keu khalifah  
Teuma jikheun meunoe lagee  
Hai panghulee nyang meutuah

Na lon deungo geupeugah proe  
Ureueng lakoe deungan zaujah  
Han jeuet jarak meung sipade  
Hana jeuet cre meung silangkah

Bacut han jeuet saket hate  
Cit salah le nibak Allah  
Meulaenkan meusuka-suka  
Seuntok masa meunan ulah

Di tuanku lon eu rupa  
Keu lon hamba luat leupah  
Saleh peue na nyang meupaloe  
Tuanku droe beuneupeugah

Hana guna tinggal sinoe  
Jeuet keu rugoe hate khalifah  
Bak pihak tan pie budoe  
Keupeue sinoe lon neukeubah

Wahe deelat payong nanggroe  
Bak malam nyoe beuneupeugah  
Bek meupaloe ampon deelat  
Hana mangat meunan ulah

Lon boh miseue sidroe teungku  
Ulon jak eu bri seudeukah  
Hidang raya lon bet laju  
U keue teungku nyang meutuah

Lom lon peugah ampon duli  
Lon khanduri keureuna Allah  
Takoh bak jok tarah keulham  
Peugot kulam teumpat manoe

Jinoe adek balek ragam  
Dara agam bek taeh le  
Bunoe uroe sinja-sinja  
Hana gura haba cut ti

Nyoe lon peugah puteh licen  
Oh lheueh kawen Janu Hati  
Lam meuligoe han tom jitren  
Peulheueh meusyen ngon suami

Han sikeujab pi na jarak  
Meung sitapak hana tom cre  
Dalam hate jih that palak  
Jipeusak hidang khanduri

Meung jipreh preh geumat tabak  
Jitalak uleh putroe ti  
Di tuanku hana galak  
Geutulak sabe raseuki

Watee sinja ka geulimbot  
Geubalot jaroe ngon gaki  
Janu hate eh di likot  
That meupot pot bintang pari

Sinyak putroe jikheun panton  
Akhe ngon phon jipeumeuri  
Jikheun panton jiboh mise  
Keumeung lahe han beurahi

Bak u dara mate pucok  
Meureubok di nanggroe Hindi  
Wahe teungku po bintang sret  
Pakon likot keu lon neubri

Pakon beude han jitem tot  
Jitakot keu cicem nuri  
Saleh leumoh beusoe dalam  
Kon seunapang biek gumpeuni

Lon boh miseue sidroe teungku  
Ulon jak eu bri khanduri  
Hidang raya lon beuet laju  
Ukeu teungku nyang juhari

Nyang sa hidang ka teudu-du  
Di teungku hana paduli  
Pakrikeuh ek geutheun nafsu  
Nyang sa bau sang kasturi

Han tom lon eu ureueng lakoe  
Keu putroe malee han sakri  
Teuma seuot banta muda  
Bek that subra hai putroe ti

Lagi malam pi ka jula  
Teungeuet mata lon han sakri  
Peue takheun sabe keu teungku  
Han ek geuh bu laen tabri

Sabab gata han troh nafsu  
Habeh teungku tajak caci  
Kadang teungku geupuasa  
Han geubuka wahe nyak ti

Lagi uroe mantong jula  
Peue ka gila teungku haji  
Meunan narit banta muda  
Seuot sigra Janu Hati

Keumang-keumang bungong pandan  
Han ek pandang meutamah hanyi  
Di tuanku seuuem mantong  
Bungong neuprom ka bee basi

Di tuanku teungeut neueh  
Lon lam binteh kutiek gaki  
Bu lon pajoh ie na lon jeb  
Asoe udep keusoe lon bri

Meunan narit bungong ruseb  
Po banta dhiet jawueuh neubri  
Rame-rame keude Peudada  
Nyang gura di keude Pandrah

Pajoh ranub ngon boh pala  
Pineung muda nyang jroh seupah  
Adak kon na bacut cupa  
Hidang gata ka lon peuhah

Gunong manyang lon niet data  
Uteuen rimba lon niet reudah  
Meung goh lom troh nyang lon cinta  
Han lon kira nyawong sudah

Peue lom judo bungong geutoe  
Nyang sajan droe tan muminah  
Panakeuh ek lon theun hate  
Malam hari lon tapapah

Nyankeuh sabab bungong pade  
Malam hari lon that gundah  
Meunan narit teungku linto  
Ubak judo dum neupeugah

Teuma seuot dara baro  
Tuanku e pakon susah  
Wahe judo po meukuta  
Neupeuhaba meungsipatah

Masa neutren di rumoh tangga  
Neubungka peue na faidah  
Peue tuanku neujak mita  
Seuhingga sampoe bak sumpah

Tajul Muluk seuot sigra  
Deungo hamba hai meuh mirah  
Masa ulon tren di tangga  
Lon jak mita ubat ayah

Sabab ayah lon ka buta  
Han le mata ban dua blah  
Uroe malam neumoe rugha  
Seuntok masa apoh apah

Nujum peugah ubat duli  
Meungkawali bungong indah  
Ayeuem putroe nyang juhari  
Aneuk duli raja meugah

Nyankeuh putroe bangsa diwa  
Aneuk raja nyang that indah  
Meunan nujum nyang calitra  
Meunyo ek na puleh bagah

Akan teutapi ajaeb that  
Hana ek dapat meunan ulah  
Meunan nujum nyang riwayat  
Hate lon that sang ka bicah

Teuma lon kheun ubak abi  
Izin neubri lon meulangkah  
Lon jak mita Meungkawali  
Jeueb-jeueb nanggri lon seuleuah

Hareueum lon eh ngon isteuri  
Meunan janji lon cut indah  
Meunan narit lon teulanjo  
Wahe judo nyang meutuah

Tajul Muluk meunan tuto  
Ie mata ro peunoh limpah  
Teuma seuot putroe muda  
Bek meukuta jak seuleuah

Bek tuanku neujak mita  
Han ek daya bungong indah  
Meungkawali jarak teumpat  
Hana meuhat sampoe langkah

Di antara sideh teumpat  
Wahe deelat jeuoh leupah  
Nyankeuh raja nyang meupangkat  
Beusar deurajat deungon syaukah

Nyankeuh ayah Meungkawali  
Nan geurasi Muzafansyah  
Meusyeuhu that hana bagoe  
Aneuk sidroe rupa indah

Kulet puteh sang keululu  
Soe na nyang eu pangsan reubah  
Jeueb-jeueb nanggroe that meusyeuhu  
Tan sikufu putroe ceudah

Geupeuduek bak saboh teumpat  
Hana sapat deungon ayah  
Nyankeuh putroe nyang indah that  
Timu barat meusyeuhurah

Meuligoe jroh hana tara  
Lom ngon kuta sangat indah  
Sinan jiduek p'utroe muda  
Ureueng jaga han peue peugah

Bangsa milon bangsa diwa  
Biek rakksasa jin Hamilah  
Meuploh ribee bangsa diwa  
Biek rakksasa nyang that juah

Nyankeuh lon kheun po meukuta  
Han ek daya deungon ilah  
Bit pi meunan po meukuta  
Ulon cuba cit seuleuah

Tajul Muluk deungo meunan  
Han'meuban-ban hate bicah  
Wahe judo cut sambinoe  
Ngieng keu kamoe mata siblah

Ngon usaha tuan putroe  
Beuek sampoe ubat ayah  
Meunan neukheun po samlakoe  
Sinyak putroe hate bicah

Jipeugot le saboh surat  
Nyan alamat nama ayah  
Buni Yaman nama nanggroe  
Nyan teumpat droe putroe indah

Takzim horeumat meuribee kali  
Di yub gaki raja meugah  
Hadap tuanku meuribee kali  
Beureukat Nabi Muhammadiah

Di likot nyan ampon duli  
Nyoe suami ulon nyang sah  
Tajul Muluk nama raja  
Deungon hamba ka lheueh nikah

Nyankeuh raja nyang juhari  
Deungon nanggri sangat luah  
Ampon maaf nibak duli  
Keureuna hateneuh that gundah

Harap aneukda bak tuanku  
Meungsigeutu bek na ubah  
Wahe ayah meukuta nanggroe  
Narit lon nyoe bek na ubah

Habeh haba bak aneukda  
Saleuem sijahtera sambot hai ayah  
Meunan haba dalam surat  
Jiboh ngon cap putroe indah

Lheueh nibak nyan ka jilipat  
Jijok leugat keu khalifah  
Tajul Muluk sambot surat  
Hate mangat han peue peugah

Oh troh surat dalam jaroe  
Neukheun meunoe banta indah  
Wahe judo bungong geutoe  
Izin jinoe lon meulangkah

Doa beule geunap uroe  
Beuke sampoe nyang lon ilah  
Beu Tuhan bri ek seuleusoe  
Rijang lon woe hai meuh mirah

Gata lon jok ubak Rabbi  
Bek weueh hate bungong kipah  
Meunan narit banta ahli  
Janu Hati hate bicah

Janu Hati bungong keundo  
Ie mata ro ile limpah  
Sinyak putroe jimeubae  
Su meusye-sye han peue peugah

Bukon sayang bungong macang  
Lam keunarang layee sudah  
Han jan deuh ulon pandang  
Hai buleuen trang tiggai zaujah

Wahe judo nyang samlakoe  
Keupeue sinoe lon neukeubah  
Bak soe lojm lon peugah lumpoe  
Hai judo droe nyang meutuah

Bukon sayang bungong seuruni  
Ayeuem putri bungong indah  
Janu Hati hate rangoe  
Teuringat nyoe keu khalifah

Teuduek dilee putroe nyang moe  
Laen jinoe lon meungkisah  
Dalam paya pot bungong crot  
Pileh nyang got saboh tangke

Balek ayat bek lagee sot  
Supaya got panton syae  
Mise ureueng pajoh buleukat  
Pane mangat meunyo sabe

Oh sare troh dalam babah  
Masya Allah pujoe Rabbi  
Meunan keuh nyum wahe teungku  
AMMA BAKDU jinoe rawi

Tajul Muluk laju bungka  
Rot lam rimba laju peureugi  
U dalam gle neupeutupat  
Tan neulihat kanan kiri

Hana piyoh meung sikeujab  
Bungong kasab neujak sabe  
Gunong manyang neuke leugat  
Tan teuringat barang peue le

Neuke buket neutron paloh  
Cut banta bloh uteuen duri  
Hanco gaki duroe pajoh  
Luka tuboh keunong awe

Pat nyang malam sinan piyoh  
Oh ka beungoh lom peureugi  
Badan Lipeh sang peunyeukuet  
Sayang po cut bu han soe bri

Habeh neublooh lam-lam urong  
Treh lam lingkong alue asi  
Neujak laju bungong tanjung  
Muhan tulong nibak Rabbi

Lon nyang kalon teuka sayang  
Banta seudang nyang juhari  
Meujan-jan reubah seulinteueng  
Keunong kareueng darah ile

Neubeudoh lom mameung-mameung  
Bungong seumpueng lom peureugi  
Tujoh buleuen dalam rimba  
Banta muda neujak sabe

Sianeuk bu tan neurasa  
Bak nyum rasa nyawong ka cre  
Karonya po Ilahul hak  
Troh le ubak saboh nanggri

Leumah taman jroh meusigak  
Keunan neujak banta seudang  
Oh troh keunan banta seudang  
Neupandang saboh meuligoe

Po banta cut hireuen tahe  
Ucap syuko pujoe Rabbi  
Nyan raksasa nyang po rumoh  
Teubiet bagah jipeureugi

Jiteubiet le keunan bagah  
Jimeung ramah po juhari  
Raseuki kee nyoe ho teuka  
Troh bak masa kukhanduri

Padum na treb tan kurasa  
Nyoe baro na Tuhan neubri  
Keunan laju ka jipeutoe  
Bak samlakoe bintang pari

Jitanyong le bak samlakoe  
Peugah jinoe ho peureugi  
Banta seuot neukheun meunoe  
Keupeue kamoe gata sudi

Meunyo gata meupoh kamoe  
Peurab keunoe bek treb lawi  
Badan lon nyoe that seungsara  
Hana guna lon udep le

Oh ka mate gadoh nama  
Di gata ka seunang hate  
Meunan neukheun pirak lipat  
Deungon surat mat di jari

Raksasa ngieng leumah surat  
Peurab leugat jitanyong le  
Ka jitanyong pantaih rijang  
Jaweueb yoh nyan po juhari

Tajul Muluk peugah yoh nyan  
Kireman bak janu Hati  
Jilakee le teuma sigra  
Banta muda laju neubri

Jiploh surat yoh nyan lanja  
Jingieng haba peue geurawi  
Oh lheueh habeh baca surat  
Jaroe jimat bintang pari

Wahe aneuk bungong kasab  
Lon ka silab po juhari  
Tan lon turi putik langsat  
Aneuk deelat ceudieng pade

Tajul Muluk nan teuseubut  
Judo po cut janu Hati  
Ho keumeung jak bungong rambot  
Peugah bacut lon deungo kri

Tinggai ayah deungon bunda  
Peue jak mita bungong pade  
Tinggai judo lam astana  
Nyang jroh rupa Janu Hati

Nanggroe nyang toh takeumeung prang  
Peugah rijang hai boh hate  
Teuma seuot banta seudang  
Lon talo prang wahe duli

Meunyo geuprang lon that gundah  
Meung na ayah lon bek mate  
Nyang jeuet keunoe lon meulangkah  
Ubak ayah jak jok diri

Meunan neukheun banta muda  
Raksasa peunoh that hate  
Han tom lon eu dilee nyang ka  
Ureueng teuka mangat hate

Wahe aneuk buleuen peunoh  
Jak u rumoh ceudieng pade  
Banta muda laju beudoh  
U rumoh laju peureugi

Teutap sinan banta muda  
Bak raksasa malam hari  
Oh ka beungoh di raksasa  
Dalam rimba jipeureugi

Watee seupot jilob uroe  
Baro jiwoe jibeureunti  
Bak siuroe banta muda  
Peugah haba deungon abi

Raya hajat lon ayahanda  
Teupong neumita saboh guni  
Laen nibak nyan dum sibarang  
Leumo bawang minyeuk sapi

Kheun raksasa hai buleuen trang  
Deungon rijang ek ulon bri  
Hingga beungoh uroe faja  
Raksasa ka jipeureugi

Oh troh watee asa uroe  
Ka jipuwoe sigala be  
Tajul Muluk neucock keudroe  
Dum sinaroe cukop hase

Cit utoh that bak seumeugot  
Po bungong crot peugot ruti  
Sie leumo taguen ngon reundang  
Neuboh bawang siploh hati

Laen nibak nyan sie neupanggang  
Neureundang ngon minyeuk sapi  
Cukop hase sileungkapan  
Po bangsawan jok keuduli

Peiduek laju u hadapan  
Raksasa nyan teukab bibi  
Wahe aneuk bungong geutoe  
Makanan nyoe lazat han sakri

Peue geupeunan makanan nyoe  
Kheun bak kamoe bintang pari  
Teuma jawueub banta seudang  
Sie teureundang deungon ruti

Nyan makanan bangsa insan  
Pakri macam wahe duli  
Teuma jicok le jimakan  
Lazat han ban hai boh hate

Wahe aneuk bintang kala  
Han tom nyang ka miseue ini  
Jipajoh le ngon seureupha  
Tan jikira barang peue le

Pruet pi ka troe lazat teuka  
Ubak banta lom jisudi  
Wahe aneuk bungong tanjung  
Peugah bak lon bintang pari

Tacre nanggroe arong gunong  
Intan bungong peue tacari  
Peugah aneuk pirak lipat  
Peue na hajat bungong giri

Bak lon pike na peue hajat  
Sayang lon that keu boh hate  
Peugah bak lon jalan teupat  
Lon meuhat gantoe abi

Gata aneuk beulisah that  
Lon kalon brat bak laku ri  
Gata aneuk lon gaseh that  
Sang malakat Sulaiman Nabi

Walee beuthat laot meulinteueng  
Bungong seupeueng lon nyang cari  
Raksasa ka meunan jikheun  
Seuot mameung banta ahli

Han jeuet lahe haba teusom  
Meunyo goh lom sumpah abi  
Meunan janji dilee sudah  
Wahe ayah bek weueh hate

Po raksasa seuot bagah  
Deumi Allah deungon Nabi  
Meuhan lon peutroh hajat gata  
Jinoe sigra lon beumate

Lheueh raksasa jimeusumpah  
Banta peugah awai akhe  
Rindu hate lon hai ayah  
Lon meulangkah jeuoh nanggri

Seuntok hate lon teugoe-goe  
Taman putroe meungkawali  
Adak han treb sikleb mata  
Lheueh nyan teuma lon keumbali

Meunan narit banta muda  
Raksasa ka teuhing gigi  
Hana sapeue jeuet jipeugah  
Sinan reubah ka meugule

Teuma jikheun laju pantaih  
Hai meutuah bungong pade  
Ulon pike ka lheueh sumpah  
Leubeh tuah jantong hate

Han lon peutroh jeuet keu salah  
Nibak Allah deungon Nabi  
Jinoe aneuk saboh padan  
Hai intan tapeugot ruti

Bah lon jak tueng keunoe abang  
Ubak gob nyan gata lon bri  
Nibak gob nyan sang ek mudah  
Rijang leupah u taman sari

Teuma beudoh banta indah  
Peugot pantaih laju ruti  
Hana piyoh bungong geutoe  
Hingga sampoe cukop hase

Tajul Muluk marit meunoe  
Ka seuleusoe wahe duli  
Po raksasa jaweueb bagah  
Beumeutuah bintang pari

Teuma jihei sidroe rakan  
Troph le keunan jipeureugi  
Jipeugah le teuma rijang  
Jak eu abang siat mari

Teuma beudoh sidroe rakan  
Rot lam awan jipeureugi  
Han padum treb jibeurjalan  
Troph rijang bak raja Nahi

Deelat ampon teurpanggilan  
Deungon laman beusajan le  
Nahi deungo haba meunan  
Tatkala nyan le peureugi

Jiplueng laju bagah han ban  
Siat keunan teuma troh le  
Wahe aneuk bungong teuprom  
Tajak meusom hai boh hate

Sabab abang makeuen goh lom  
Bah tameusom bintang pari  
Oh lheueh makeuen teungku abang  
Ulon tuan nyang peugah kri

Nahi jiek laju keunan  
Banta seudang le peureugi  
Jiduek laju sinan dua  
Po raksasa deungon Nahi

Sie ngon ruti dum anika  
Ateueh mijka ka meuriti  
Adek raksasa marit rijang  
Makeuen abang sie ngon ruti

Teuma makeuen le ban dua  
Po raksasa dengon Nahi  
Nahi tanyong hai adoe beh  
Pajan troh sibagoe ini

Han tom di lon na kupajoh  
Peue adoe beh nan geurasi  
Teuma jawueb le raksasa  
Hai kakanda nyanteuh ruti

Nyoe makanan bangsa insan  
Lazat han han sie ngon ruti  
Sidroe insan teuka keunoe  
Keu kamoe jiseubut abi

Rupa indah that samlakoe  
Ubak kamoe jipeureugi  
Sayang lon that hana bagoe  
Sang aneuk droe baro lahe

Nahi tanyong laju rijang  
Pat aneuk nyan wahe akhi  
Aneuk gata aneuk laman  
Di lon meunan han ubah le

Raksasa hei teuma rijang  
Aneuk badan keunoe mari  
Teuma peurab banta indah  
Sujud bagah nibak gaki

Nahi kalon rupa ceudah  
Sayang leupah dalam hate  
Teuma jikheun meunoe haba  
Hai aneukda nyang juhari

Pat bu gampong bijeh mata  
Soe ayahanda nan geurasi  
Gata aneuk soe bu nama  
Peue tamita tinggai nanggri

Peue aneuk hajat gata  
Tayue mita ubak abi  
Nyang bek buleuen deungon bintang  
Laen sibarang ek ulon bri

Tajul Muluk jawueub rijang  
Ampon laman payong nanggri  
Zainul Muluk ayah laman  
Syarikatan gampong duli

Tajul Muluk nama hamba  
Treb ka lama lon peureugi  
Masa lon jak wahe ayah  
Leupaii sumpah lon duli

Meunyo goh troh nyang lon cinta  
Han lon gisa le keumbali  
Adak mate pi lon rila  
Hana guna hudep kami

Akan teutapi hai ayahanda  
Nyan rahsia han jeuet lahe  
Meulaenkan ka lheueh sumpah  
Beuthat ayah di lon duli

Meunan janji lon ka leupah  
Lon pabanbah wahe abi  
Meunan narit banta indah  
Jawueub pantaih teungku Nahi

Deumi Allah hai bangsawan  
Lon ubah han ban nyang janji  
Meunyo ka lheueh lon meusumpah  
Beureuloh babah teuhing gigi

Meunan Nahi ka jipeugah  
Banta indah jawueub neubri  
Meuna gaseh deelat ampon  
Neuba ulon u Taman sari

Nyan hajat lon po jonjongan  
Lon ngieng Taman Meungkawali  
Meuhan neuba ayah badan  
Got lon tuan neupoh mate

Meunan narit po samlakoe  
Sira neumoe bungong pade  
Nahi deungo meunan haba  
Pangsan sigra ka meugule

Oh ban puleh nibak pangsan  
Jikheun yoh nyan uleh Nahi  
Wahai aneuk lon pabanbah  
Leupah sumpah lon boh hate

Han lon peutroh ulon salah  
Nibak Allah deungon Nabi  
Kamoe aneuk sinoe dua  
Cit meujaga Taman sari

Han jeuet sidroe keunan teuka  
Oh meusua meuhat mate  
Le that aneuk ureueng jaga  
Raksasa ngon Milon deungki

Bangsa Milon ngon raksasa  
Meuploh laksa ribee kati  
Pakri aneuk rot kuilah  
Beuleupah lam taman cut ti

Meunyo geuthee le khalifah  
Kamoe ayah meuhat mate  
Bit pi meunan na bicara  
Hai aneukda jinoe lon bri

Bah lon intat jinoe gata  
Ubak cut da nyang juhari  
Di gob nyan na aneuk sidroe  
Ureueng binoe treb ka lawi

Nyan pi aneuk bangsa insan  
Rupaneuh ban bintang pari  
Bah le jinoe lon bri surat  
Lon yue intat bungong pade

Jipeugot le saboh surat  
Jiriwayat baten lahe  
Ka jipeugah saket mangat  
Dalam surat dum jirawi

Jihei rakan sidroe leugat  
Jiyue intat banta ahli  
Jinoe kajak keudeh siat  
Kajak intat aneuk kami

Deungon surat sajan kaba  
Beugot raya ka peugah kri  
Yoh nyan jihei banta muda  
Ek cong guda bungong giri

Jibaplueng pantah sigra  
Ngon siat ka troh peureugi  
Oh sare troh gaki kuta  
Tron cong guda po juhari

Tinggai sinan banta muda  
Tamong lanja si man pari  
Meuteumeung le ngon Hamilah  
Sujud pantah com di gaki

Jicok surat laju bagah  
Diwa Hamilah beuet seundiri  
Dalam surat jieu haba  
That meurasa hana sakri

Jitanyong le pantah sigra  
Jinoe ho ka bintang pari  
Taba keunoe laju sigra  
Banta muda jipeujok le

Si man Pari laju gisa  
Tinggai banta nyang juhari  
Hamilah ngieng teuhah babah  
Banta that ceudah bungong pade

Patot judo aneuk kamoe  
Bandua droe that juhari  
Meutuah that aneuk payong  
Jeuet keu tudong aneuk kami

Hamilah kheun meunoe haba  
He meutia jantong hate  
Sijuek hate lon aneukda  
Oh na gata bintang pari

Wahe aneuk bungong keundo  
Dara baro jinoe lon bri  
Aneuk kamoe tueng keu judo  
He aneuk e bek meuungki

Meunan narit bak Hamilah  
Jawueub pantah banta sidroe  
Nyawong tuboh darah gapah  
Cit milek sah wahe culi

Ban nyang hajat han soe teugah  
Cit milek sah patek ini  
Hudep mate laba rugoe  
Nibak lon nyoe han meuungki

Lheueh nibak nyan teuma dudoe  
Deungo jinoe lon peugah kri  
Lon kheun mantong nyang meukeusud  
Bek that lanjut kisah rawi

Lon seumurat seun seun bacut  
Jaroe kuweut han sakri  
Ulee ulon pi saket that  
Goh lom meupat meuie kupi

Jitren daweuet lambat-lambat  
Bak seunurat han got meuri  
Di gob geujak timu barat  
Geujak meukat itu ini

Oh sare lagot meuneukat  
Laba lipat han soe tukri  
Di lon gaduh muzakarah  
Lon kisah putroe ngon duli

Oh lon ingat keu faidah  
Han ek leupah meungkeu kupi  
Na keu kupi tan keu kueh  
Meungkeu payeh timphan boh bi

Bek antara rukok puteh  
Nyang that meuceh kumadori  
Alah he on bayam tuba  
On ara deungon on campli

Oh teuringat ro ie mata  
Meunan jeumba lon he akhi  
Bukon sayang bungong riwat  
Meusapat bungong keusturi

Bahkeuh oh nan haba seumur at  
Ulon sambat laen lagi  
Diwa Hamilah lon calitra  
Ngo seedara ulon rawi

Diwa Hamilah cit keupala  
Waki raja bangsa pari  
Jih keurajeuen di antara  
Peulinggoe Pura nama nanggri

Jeuet keu dumnan kisah raja  
Lon peugisa Hamilah siti  
Hana saboh nyang ek lawan  
Gadob ajam ngon sinya<sup>k</sup> siti

Tajul Muluk teutap sinan  
Lam seunangan malam hari  
Padumna treb bintang canden  
Ka lheueh kawen po juhari

Mahmuda nama cut intan  
Ka grak Tuhan na suami  
Oh lheueh kawen putroe lipat  
Peukek leugat u meuligi

Deungon putroe neueh sapat  
Banta deelat nyang juhari  
Soe nyang kalon lazat mata  
Sang cempala deungon nuri

Diwa Hamilah hate suka  
Ngieng aneukda nyang juhari  
Teutap putroe deungon banta  
Meuseusuka lam meuligi

Hate manyoh rindu deundam  
Uroe malam nyum sang bek cre  
Tajul Muluk pirak hupam  
Meung simalam tan paduli

Neueh mantong seungab diam  
Meung sigo han ringan seundi  
Meupura han neumuwayang  
Putroe bintang luka hate

Sinyak putroe bungong rambot  
Eh di likot rueng suami  
Dalam hate that meukrot-krot  
Sang-sang ka sret tuleueng seundi

Meung sigo hana meureunggott  
Bungong rambot weueh that hate  
Bukon sayang bungong tajok  
Sret meutumpok atueuh bumi

Nyan sa putroe sang meurubok  
Tajul Muluk han peuduli  
Bak simalam putroe indah  
Poh beurakah ngon suami

Keususahan han jipeugah  
Putroe indah malee hate  
Saleh ulon han got basa  
He meukuta tangglong nanggri

Di gob geueh deungon judo  
Hate rindu malam hari  
Nyoe lon kalon di tuanku  
Meung sigeutu han paduli

Kadang tuanku hana suka  
Sabab bangsa kamoe pari  
Walee meunan po meukuta  
Ubak hamba neupeugah kri

Tajul Muluk nyang bangsawan  
Jawueub rijang tuto siti  
He adek cut bungong peukan  
Deungo intan lon peugah kri

Meunyo kamoe bangsa insan  
Na kasihan ngon isteuri  
Hana jeuet cre he cut intan  
Cit beusajan sabe-sabe

Miseue sidroe ureueng tapa  
Suntok masa putoh hate  
Lam teuringat rok-rok masa  
Cit bahgia putroe siti

Akan teutapi han troh hawa  
Tuhan esa hana neubri  
Lon miseue sidroe ulama  
Lapar dahaga malam hari

Keunan sidroe ureueng datang  
Geuba hidang jroh han sakri  
Geupeudeuk le u hadapan  
Geupeugah nyankeuh khanduri

Ban lon deungo geukheun meunan  
Sang bak jeum nyan lon makeuen le  
Akan teutapi pakri daya  
Lon puasa goh troh hari

Nyankeuh nyang na bacut capa  
Ulama ie mata ile  
Sang geupajoh bateue puasa  
Teumeureuka lom bak Rabbi

Han geupajoh deuk hana ban  
Ngon sabab nyan reuloh hate  
Nyankeuh miseue he sambinoe  
Malam uroe that beureuhi

Oh lon kalon atueuh gata  
Sang lon wa-wa hai putroe ti  
Nafsu hate lon eh dua  
Lon meuscunda malam hari

Akan teutapi bacut cupa  
Hana rila nibak Rabbi  
Sabab sumpah lon ka habeh  
Hana lon eh ngon isteuri

Hareuem judo ulon peutoe  
Meung goh sampoe cinta hati  
Meunan janji yoh saboh roe  
Paban jinoe bintang pari

Teuma seuot tuan putroe  
Tuanku droe tapeugah kri  
Peue peunyaket that meularat  
Peue nan ubat nyang neucari

Tajul Muluk jawueub leugat  
Pirak lipat ngo lon rawi  
Deelat ayah saket mata  
Neumoe rukha malam hari

Teungku nujum nyang calitra  
Ubat mata Meungkawali  
Nyangkeuh bungong hai sambinoe  
Ayeuem putroe nyang juhari

Meung ek na nyan bungong putroe  
Puleh jinoe mata abi  
Ubat laen puteh lusoh  
Peue nyang geuboh hana rasi

Maken taboh meutamah brat  
Ampon deelat ajai mate  
Oh lon deungo haba meunan  
Lon tren yoh nyan he putroe ti

Habeh lon jak jeueb-jeueb donya  
Trok bak gata lon peureugi  
Nibak judo ulon ingat  
Lam meularat suntok sabé

Bu lon makeuen han tom mangat  
Gundah lon that hana sakri  
Meung goh meuteumeung bungong putroe  
Nyum beujinoe ulon mate


Oh ka mate ka lheueh adat  
Tan le ingat bunda abi  
Meunan narit banta muda  
Ngon ie mata laju ile

Cut Mahmuda seuot meunoe  
Ampon kamoe wahe duli  
Meunyo meunan ampon deelat  
Saba siat dalam hate

Piyoh dilua meung sikeujab  
Lon riwayat ubak umi  
Bek tuanku hate rukha  
Bicara dilee tacari

Meukarat that kheundak bungka  
Han neukira tinggai kamoe  
Hana neuweueh ube seuma  
Patot hamba tinggai sinoe

Meunan jikheun putroe muda  
Po cut banta seunang hate  
Teuma seuot po jroh rupa  
Hai adekda nyang juhari



Meunyo cit na gaseh gata  
Jak peuhaba ubak umi  
Meuhan meunan wahe putroe  
Izin jinoe lon peureugi

Adat han rijang meuseuki treb  
Adat han udep bahle mate  
Keupeue guna adat udep  
Malee aib hai putroe ti

Nibak ayah saboh bagoe  
Nibak putroe pi han meukri  
Narit timplak geunap uroe  
Bah lon boh droe mangat mate

Meunan neukheun banta muda  
Pura-pura le peureugi  
Teuma seuot cut Mahmuda  
Hai meukuta deungo kami

Pakon duli beungeh raya  
Hana saba ube pade  
Di lon judo lon meuseunda  
Di meukuta cit beungeh le

Lheueh nyan teuma putroe muda  
Beudoh lanja jak bak umi  
Tajul Muluk nyang bahgia  
Neukheun sigra bak isteuri

Wahe judo bungong meurak  
Gata tajak ubak umi  
Meunan neukheun haba sikrak  
Bungong meurak nyang juhari

Takheun ulon rindu sangat  
Keumeung lihat taman sari  
Meunan neukheun bungong riwat  
Bek panyang that bak tarawi

Jeuet keu teulah teuma dudoe  
Sinyak putroe ka jijak le  
Oh troh keudeh po sambinoe  
Tanyong meunoe uleh umi

Wahe aneuk bungong uroe  
Peue buet keunoe ho suami  
Peue na susah hai aneuk droe  
Han got bagoe lon kalon ri

Peugah rijang bijeh mata  
Ulon pi ka gundah hate  
Teuma seuot putroe muda  
Deungo hamba wahe umi

Laen dumpeue peunoh limpah  
Nyang lon gundah cit keuduli  
Geunap uroe apoh apah  
Cit lam susah hana sakri

Meunan jikheun putroe indah  
Diwa Hamilah jitanyong le  
Pakon aneuk hate gundah  
Cuba peugah ubak umi

Walee jeuoh lon seuleuah  
Cuba peugah bintang pari  
Sinyak putroe seuot rijang  
Banta seudang susah hate

Keureuna hate sangat bimbang  
Kheundak pandang taman cut ti  
Hate rindu uroe malam  
Neungieng taman Meungkawali

Diwa Hamilah deungo meunan  
Han muban-ban hanco hate  
Sikrak haña le suara  
Seungab sahja han le bunyi

Na sikeujab seungab haba  
Marit teuma Hamilah siti  
Wahe aneuk lon pabanbah  
Leupah sumpah ulon ini

Han lon peutroh takot salah  
Nibak Allah deungon Nabi  
Jinoe aneuk tajak gis  
Ubak banta tapeugali kri

Bek le susah banta muda  
Ban nyang cinta ulon nyang bri  
Meung na tulong nibak Allah  
Ek leupah lam taman sari

Meunan narit bak Hamilah  
Putroe indah woe keumbali  
Oh troh keudeh putroe muda  
Peurab sigra com suami

Putroe seumbah nibak teuot  
Banta sambot deungon jari  
Lheueh nibak nyan sinyak putroe  
Jiduek le toe ngon suami

Jipeugah le meunoe haba  
Hai meukuta tanglong nanggri  
Nibak duli lon eu rupa  
Nyang neucinta sang ek hase

Ban nyang hajat po jonjongan  
Na ubah han nibak umi  
Walee mate dalam jeuem nyan  
Hajat jonjongan neuturot le

Meunan narit nibak bunda  
Yueu peu haba ubak duli  
Bunda peugah ubak hamba  
Beuna saba dalam hate

Bek le susah dalam dada  
Preh meukuta tujoh hari  
Tajul Muluk hate suka  
Deungo haba bak putroe ti

Teuma seuot banta muda  
Hai aneukda bintang pari  
Nibak ulon that meurasa  
Di jeumala tuto umi

Sijuek hate lon hana tara  
Sang rupa ie krueng hayati  
Sang lon jeb ie krueng Kalkausa  
Sijuek rasa jeueb-jeueb seundi

Meunan narit banta muda  
Ubak nisa nyang juhari  
Teuduek dilee banta deelat  
Lon sambot Hamilah siti

Raja tikoh meuhei leugat  
Deungon siat keunan troh le  
Dua jaroe le jiangkat  
Jideelat Hamilah siti

Peue saleh buet na meularat  
Peugah leugat wahe duli  
Diwa Hamilah seuot bagah  
Hai meutuah deungo kami

Rahsia nyoe ulon peugah  
Beugot leupah troh lam hate  
Bak beurangsoe bek tapeugah  
Hai meutuah ngieng keukamoe

Hajat ulon beuta peutroh  
Wahe tikoh nyang bestari  
Takueh tanoh hai ulon beh  
Keudeh beutroh taman cut ti

Lom ngon gata pi bek jeuoh  
Oh ka takueh bek gob turi  
Ngon simalam beuseumeulhoh  
Beukek troh lam taman sari

Taboh tanoh u dalam krueng  
Bah jirayueng troh u pasi  
Ngon simalam tapeuruhung  
Tikoh tatueng sampe u gle

Tikoh seuot insya Allah  
Ngon meutuah po cut kami  
Raja tikoh jiwoe bagah  
Rakyat jikrah sampe u gle

Teutap tikoh rakyat jikrah  
Ngo lon peugah wahe akhi  
Badan mantong ube guda  
Dumnan raya tikoh cut ti

Teumpat jiduek dalam rimba  
Yoh nyan masa Sulaiman Nabi  
Nyankeuh watee lama masa  
Calitra hikayat ini

Meusapat nyang raya-rayo  
Meuploh laksa ribee kati  
Dumnan rame nyang meupangkat  
Laen rakyat hanpeue rawi

Raja tikoh marit pantah  
Jipeugah habaran tadi  
Geutanyoe dum jak seuleuah  
Beudoh pantah bek le nanti

Jibeudoh le dum sinaroe  
Tikoh pindoe kurek bumi  
Lam kuta phon jiboh punca  
Jalan raya hansoe tukri

Phon jikurek watee sinja  
Sampe faja woe keumbali  
Nyang di rakyat woe lam rimba  
Raja-raja u meuligi

Bandum rakyat habeh gisa  
Dalam rimba teumpat sunyi  
Raja tikoh u astana  
Jak peuhaba ubak duli

Angkat jaroe di jeumala  
Cukop langka hai putroe ti  
Ulon sidroe keunoe teuka  
Nyang laen ka woe keumbali

Diwa Hamilah peugah sigra  
Wahe raja nyang beustari  
Aneuk ulon jinoe taba  
Ubak tahta taman sari

Ulon harap nibak gata  
Bek na cupa ube pade  
Bek jituho le pari diwa  
Watee taba ngon seumbunyi

Beujroh sangat tapeulara  
Bek binasa aneuk kami  
Oh troh keudeh bineh taman  
Tadong sinan le beureunti

Tayue kalon mantong sinan  
Bek tabri tren ubak bumi  
Bek na bacut cupa asoe  
Beutroh sampoe puwoe mari

Meunyo ubah ban kukheun nyoe  
Ban sinaroe kupoh mate  
Peue nyang jikheun bek tabantah  
Bek na susah dalam hate

Raja tikoh jaweueb bagah  
Ampon maaf hai putroe ti  
Nibak ulon hai jonjongan  
Lon ubah han ube pade

Meunyo aneuk po cut laman  
Cit patot nyan po di kami  
Raja tikoh meunan kalam  
Pirak hupam seunang hate

Diwa Hamilah tatkala nyan  
Po bangsawan jimeuhe le  
Tajul Muluk bungong keumang  
Trok le keunan neupeureugi

Oh trok keunan banta seudang  
Neukek rijang u meuligi  
Teuot bunda laju seumbah  
Banta indah jroh that budi

Diwa Hamilah sambot bagah  
Bu meutuah jantong hate  
Jinoe aneuk tabeurjalan  
Bak taman putroe juhari

Raja tikoh cit ka sinan  
Haba yoh nyan jipeugah le  
Duek tuanku bak rueng kamoe  
Mangat jinoe tapeureugi

Tajul Muluk ek le rijang  
Neupasang tikoh beustari  
Tikoh jiplueng hana macam  
Pantah na ban kilat pagi

Han padumna treb jibeurjalan  
Trok bak taman Meungkawali  
Leumah taman jroh han bagoe  
Keunan keunoe jroh han sakri

Tajul Muluk kalon taman  
Hireuen mandang po juhari  
Raja tikoh marit rijang  
Sampe datang wahe duli

Hai tuanku po jonjongan  
Nyankeuh taman Meungkawali  
Tajul Muluk deungo meunan  
Neutron yoh nyan atueh bumi

Jimarit le raja tikoh  
Kalon beudeuh wahe duli  
Bek treb sinan dong neupiyoh  
Puteh lusoh takeumbali

Po bangsawan marit meunoe  
Deungo kamoe wahe akhi  
Meunyo sinoe teudong dasyah  
Han ek leumah taeu lahe

Nyang leubeh got bah le beutoe  
Laba rugoe ka lon turi  
Meunan neukheun po samlakoe  
Tikoh sinoe jipeugah le

Han jeuet tajak bungong meulu  
Marah ibu akan kami  
Tajul Muluk nyang meutuah  
Neukheun pantah hai beustari

Bek hai teelan hate gundah  
Beuna salah atueh kami  
Meuhan tapateh ban lon peugah  
Lon grob bagah mangat mate

Oh mate lon umu sampoe  
Gata tawoe ubak umi  
Meunan neukheun puteh lusoh  
Raja tikoh susah hate

Teumakot that hana tara  
Bek binasa bungong pade  
Teuma jikheun meunoe haba  
Hai meukuta deungo kami

Meunyo neujak tuanku droe  
Bek treb keunoe lom keumbali  
Teuma neujak po samlakoe  
Galak han soe bungong pade

Raja tikoh tinggai sidroe  
Susah han soe dalam hate  
Banta kalon taman putroe  
Hireuen laloe hana sakri

Tanaman le rupa-rupa  
Teupat banja jroh han sakri  
Bak sawo ngon peungata  
Laen pi na giri bali

Rambot langsat han ek kira  
Ka geupula dum geulheueng li  
Tajul Muluk pirak hupam  
Trok bak kulam neupeureugi

Neueu laku jroh that macam  
Bak kulam cut Meungkawali  
Yoh nyan banta tahe mandang  
Bak nyum sang-sang han jeuet jak le

Batee rukham bak boh beudak  
Jroh meusigak hana sakri  
Ijo biru hu meukilat  
Geusurat ngon jroh meuseundi

Bak tiek badan pi that cakap  
Hu meukilat hana sakri  
Soe nyang kalon hireuen mandang  
Nyum bek riwang po juhari

Rukun bungong le that macam  
Bee meudram-dram sangat wangi  
Jeumpa puteh bungong peukan  
Bungong rihan bee keusturi

Bungong meulu jeumpa mirah  
Nyan pi indah han ek kheun kri  
Bungong rum bungong geukarah  
Rinduh reundah dum meuriti

Jipot angen dirui mangat  
Han soe tupa sang bee wangi  
Tajul Muluk nyang meutuah  
Hireuen dasyah bintang pari

Sijuek hate manyoh deundam  
Lam seupot klam meunan sang ri  
Tatkala nyan muda seudang  
Bineh kulam duek beureungi

U dalam ie banta pandang  
Hana macam lale hate  
Bungong gadoh dalam kulam  
Meureundam di dalam tuwi

Naga raya sinan meuglong  
Lingka bungong Meungkawali  
Susah hate bungong tanjong  
Keumeung jeumeurang han beurani

Tajul Muluk panyot tanglong  
Mohon tulong nibak Rabbi  
Ya Ilahi poku Tuhan  
Muhammadan di lon Nabi

Beureukat Nabi akhe zaman  
Neubri jalan hai ya Rabbi  
Beureukat intu Nabi Adam  
Beureukat makam beureukat Nabi

Lheueh neukheun nyan banta indah  
Neueu leumah saboh meuligi  
Tajul Muluk nyang meutuah  
Laju pantah neupeureugi

A tueuh jalan neumeulangkah  
Meuh meutatah tan peuduli  
Bak meuligoe putroe indah  
Keunan langkah po juhari

Ubak rinyeun laju neuek  
Ka neutarek le sitangke  
Troph u rumoh bungong rubek  
Neungieng bilek jroh han sakri

Neueu ureueng tan meung sidroe  
Po samlakoe hireuen hate  
Saboh bilek nibak sagoe  
Kunci beusoe jroh han sakri

Tajul Muluk keunan neujak  
Ka neurinthak le boh gunci  
Habeh kuat banta beuot  
Han cit teulet kong han sakri

Lheueh nyan banta buet seuleusoh  
Habeh luroh gunci beusi  
Oh troh keunan banta lalu  
Neukalon hu na sang hari

Intan beulian dum meuhato  
Han ek teungku ulon rawi  
Macam-macam dum anika  
Ija sutra ngon lahuri

Lampu kande hu meucahyia  
Han peue kira buet jen pari  
Ngon keurus i jroh mubanja  
Tilam sutra peurmadani

Di teungoh nyan saboh peuratah  
Meujeureulah hu sang hari  
Oh takalon hate dasyah  
Sang-sang ulah syurga tinggi

Di ateueh nyan sidroe putroe  
Rupa bagoe budiadari  
Siurat beuneueng tan bak asoe  
Teueh sidroe bungong pade

Tajul Muluk nyang bahgia  
Keunan mata ngieng putroe ti  
Neungieng putroe jroh that rupa  
Hana nyang sa beurangkari

Leungo badan miseue geumpa  
Rab binasa bintang pari  
Cut putroe teueh teuhanta  
Nyum sang geuwa bungong pade

Muka jihu meucuaca  
Aneuk raja diwa pari  
Lom aurat leumah u lua  
Sang ka gila banta saidi

Hana bandeng dalam donya  
Nyang ek sama Meungkawali  
Soe nyang kalon ladat mata  
Sang beutawa wahe nyak ti

Nyang meuligoe han peue peugah  
Meutatah ngon jawareudi  
Gamba cicem jroh meuato  
Hireuen tahe teukab bibi

Ka teudong-dong meujiudo-judo  
Leuek ijo ngon mirahpati  
Laen nibak nyan han peue ato  
Jroh that laku teumpat cut ti

Tajul Muluk hireuen tahe  
Bungong keundo'pujoe Rabbi  
Adat meung kon bagah teuringat  
Rab ka sisat bungong giri

Tajul Muluk ingat untong  
Geucré gampong tinggai abi  
Lon jak mita ubat ayah  
Lon seuleuah jeueb-jeueb nanggri

Oh rab meuteumeung bungong indah  
Buet nyang salah lon jak cari  
Neupeulindong lon ya Allah  
Bek roh leupah buet nyang asi

Bungong kayee le putik han jimat  
Alamat kilat ujeuen sabe  
Neutob hate lon ya Malaikat  
Bek teuringat buet nyang keuji

Meunan neukheun putik langsat  
Peurab leugat bak putroe ti  
Oh troh keunan po samlakoe  
Leumah meunoe dalam hate

Bah lon keubah saboh jaroe  
Keu cut putroe bah le lon bri  
Meunan ingat po samlakoe  
Neumat jinoe ija cut ti

Lheueh nibak nyan mat bak jaroe  
Po samlakoe geunta hate  
Bak neumat nyan banta deelat  
Rasa lazat jeueb-jeueb seundi

Sang ka putoh jeueb-jeueb urat  
Dum nan lazat tangan cut ti  
Tajul Muluk nyang samlakoe  
Teuringat nyoe dalam hate

Hana hase lon pandang nyoe  
Akhe dudoe aib keuji  
Tinggai nyan po samlakoe  
Euncien putroe neutarek le

Nibak jaroe banta hila  
Han cit jaga cut putroe ti  
Oh lheueh neucok euncien putroe  
Di meuligoe ka neutron le

Neujak laju banta seudang  
Bineh kulam ka neutiti  
Na sikeujab banta sinan  
Leumah yoh nyan bungong cut ti

Ka jibeudoh bungong indah  
Jisangka sah Meungkawali  
Keunan laju ka meulab-lab  
Jipeurab bak bintang pari

Tajul Muluk bungong neumat  
Neupot leugat han le nanti  
Tinggai tangke nibak teumpat  
Neuwoe leugat banta saidi

Raja tikoh tanyong leugat  
Pakon treb that wahe duli  
Tajul Muluk seuot laju  
Na peue lon eu rindu hate

Nyan keuh sabab treb sigeutu  
Lheueh nyan laju lon keumbali  
Beukit meunan hai jonjongan  
Neuek rijang ateueh kami

Tajul Muluk banta seudang  
Neupasang tikoh beustari  
Jibaplueng le bungong keumang  
Hana lintang siat nanti

Wie ngon uneuen hana pandang  
Hingga datang u meuligi  
Dalam kuta tamong rijang  
Sajan- sajan deungon duli

Oh lheueh tamong troh u dalam  
Neuek curam u meuligi  
Diwa Hamilah nyang analan  
Duek teusimpan bak keurusi

Jieue banta ka meuriwang  
Hana macam suka hate  
Tajul Muluk nyang meutuah  
Seumbah bagah teuot umi

Teuma marit Diwa Hamilah  
Meutuah ka puleh hate  
Banta seuot alhamdulillah  
Ngon ijazah nibak umi

Ka lheueh lon eu wahe bunda  
Lazat mata puleh hate  
Hamilah kheun hai meutuah  
Jak woe pantah bak isteuri

Banta beudoh laju langkah  
Ubak zaujah neukeumbali  
Mahmuda ngieng banta indah  
Beudoh pantah com di gaki

Na meuteumeung bungong indah  
He khalifah tapeukong nanggri  
Tajul Muluk seuot bagah  
Ngon meutuah bintang pari

Deungon doa po jroh rupa  
Ka seumpureuna Tuhan neubri  
Putroe deungo meunan haba  
Hate suka hana sakri

Teuma jibet hidang raya  
Cok piala jisrah gaki  
Neumakeuen le sapat dua  
Hate suka po juhari

Oh lheueh makeuen pinah hidang  
Cut buleuen trang cok ceuradi  
Jicok ranub ka jisuleueng  
Le cut meugleueng keu suami

Sinan teutap po samlakoe  
Di meuligoe ngon isteuri  
Meusuka-suka malam uroe  
Bandua droe that beureuhi

Padum lawet akhe masa  
Banta muda leumah pike  
Peue keuh lon duek sinoe dasyah  
Teungku ayah saleh pakri

Ka treb ulon cre di tangga  
Bah lon gisa woe u nanggri  
Lom pi ibu dalam rimba  
Saleh peue ka Tuhan bri

Lagi judo di astana  
Jimoe rukha Janu Hati  
Meunan leumah dalam dada  
Sret ie mata tan beureunti

Uroe malam hate susah  
Apoh apah hana sakri  
Ie mata ro ile limpah  
Neuhei Allah tan beureunti

Putroe kalon meunan laku  
Tanyong laju bak suami  
Deelat ampon hai tuanku  
Pakon karu wahe duli

Pakon judo susah han soe  
Lon eu neumoe tan beureunti  
Teuma seuot banta seudang  
Judo badan ngo lon rawi

Masa dilee ulon bungka  
Tinggai bunda deungon abi  
Tinggai ayah lam nazaa  
Treb ka lama lon peureugi

Janji dilee mita ubat  
Oh noe lambat goh keumbali  
Saleh pakri deelat raja  
Saleh cit na saleh mate

Nyan keuh sabab hai sambinoe  
Hate lon nyoe sang ka cre bre  
Meung na izin bungong keutoe  
Bah le lon woe ubak abi

Bumangat hate putroe indah  
Keunoe pantah lon keumbali  
Meunan banta ka neupeugah  
Jawueub pantah bintang pari

Meunyo tuanku neujak gisa  
Patek hamba jinoe pakri  
Bek neukeubah sinoe hamba  
Sajan neuba wahe duli

Tajul Muluk jawueub sigra  
Hai adekda bungong giri  
Pakri tajak po jroh rupa  
Hana rila nibak umi

Meunyo hana izin bunda  
Han jeuet lon ba gata nyak ti  
Nyang got jinoe hai adekda  
Jak peu haba ubak umi

Meung ka izin nibak bunda  
Jadeh lon ba bintang pari  
Bah le tajak sajan hamba  
Hai adekda nyang juhari

Lon meulakee meuah deesya  
Peugah haba lon keumbali  
Meunan narit banta muda  
Neujak lanja ngon putroe ti

Tatkala nyan deelat ampon  
Laju neutron di meuligi  
Sinyak putroe panyot tanglong  
Buka payong meujeuradi

Soe nyang kalon hireuen tahe  
Jroh siuko bandua si  
Putroe jijak leuntek leuntok  
Ulee baho jroh han sakri

Hingga troh bak pinto kuta  
Tamong lanja po juhari  
Jiek laju u astana  
Sigo dua deungon duli

Hamilah ngieng troh aneukda  
Lapang dada ube guci  
Diwa Hamilah tanyong sigra  
Hai aneukda tangke hate

Peue na hajat hai aneukda  
Peugah sigra ubak umi  
Peue na galak nafsu hawa  
Putroe muda neujawueub le

Meuah ampon wahe bunda  
Lon nyoe dua deungon duli  
Lon meuhajat ngon meukuta  
Sang-sang rasa reuloh hate

Sabab teuringat keu ayahanda  
Po meukuta kheundak keumbali  
Teuma jinoe wahe bunda  
Pakri daya lon disini

Sabab banta keumeung bungka  
Neujak gisa woe u nanggri  
Neujak saweue ayah bunda  
Treb ka lama neupeureugi

Neukheun sajan ulon neuba  
Meung na rila nibak umi  
Meunan narit putroe muda  
Ubak bunda dum jirawi

Diwa Hamilah seuot leugat  
Kru seumangat bungong pade  
Ban nyang suka pirak lipat  
Di lon mangat dalam hate

Jroh that meunan hai aneukda  
Han got basa tinggai sini  
Keupeue guna tinggai cuntra  
Meunyo hana cicem nuri

Keupeue guna meuh peurmata  
Meunyo hana ampon duli  
Bukon sayang gapeueh panjoe  
Angen tampoe sret u pasi

Patot aneuk seutot lakoe  
Bungong uroe bu meusampe  
Bukon sayang lon eu peutoe  
Nibak sagoe ka meugule

Gata aneuk seutot lakoe  
Ulon sinoe reuloh hate  
Bukon sayang cicempala  
Jisama le rajawali

Bukon sayang u ke muda  
Ka jiseuba le tupe gle  
Han meusampe lon peulara  
Hai aneukda tinggai umi

Jinoe taten po jroh rupa  
Pajan masa ta keumbali  
Tinggai ulon ureueng tuha  
Ro ie mata malam hari

Wahe aneuk Tajul Muluk  
Nyoe sion ok nibak umi  
Nyoe keuh nyang na hai samlakoe  
Nibak kamoe ureueng faki

Akan teutapi lon peuingat  
Nyoe hikeumat hai putehdi  
Watee hajat tameunasu  
Seubut laju nama umi

Bek talupa keu lon sidroe  
Hai samlakoe bintang pari  
Cit troh ulon ubak gata  
Deungon tandra lon peureugi

Nyan wasiet lon bek taubah  
Hai meutuah malam hari  
Nyoe pat judo hai aneukda  
Bah le taba woe u nanggri

Bek takeubah sajan hamba  
Susah teuka bungong pade  
Sabab ulon ureueng tuha  
Han ek jaga po juhari

Lagi pi jih aneuk dara  
Jimeuhawa jeueb-jeueb nanggri  
Nyan keuh aneuk lon kheun taba  
Mahmuda bek tinggai sini

Bek jeuet aib lon ngon gata  
Hai aneukda jantong hate  
Diwa Hamilah meunan haba  
Seuot lanja banta saidi

Insya Allah wahe bunda  
Di jeumala narit umi  
Sinyak putroe jadeh lon ba  
Meunyo bunda mangat hate

Teuduek di lua Diwa Hamilah  
Laen ulah ulon ratoh  
Meunyo sot-sot saboh ulah  
Hana ceudah hai teungku beh

Bah le jinoe balek macam  
Laen ragam ulon saloh  
Jipot angen raja padang  
Kapai prang jiwoe di Susoh

Tajul Muluk banta seudang  
Hate seunang lazat tuboh  
Seumbah bunda laju rijang  
Kheundak pulang nanggroe jeuoh

Hamilah kheun teuma leugat  
Tapreh siat puteh lusoh  
Jicipta saboh hikeumat  
Guda siat keunan ka troh

Hamilah jok keu bangsawan  
Sang buleuen trang hu seumeuloh  
Cukop peulana deungong keukang  
That analan guda utoh

Nyoe keuh nyang na bak lon tuan  
Laen cit tan hai aneuk beh  
Beusoe Awan nama guda  
Hai aneukda sangat utoh

Nyan keuh aneuk bak Hamilah  
Lon bri sah keu puteh lusoh  
Tajul Muluk nyang jroh rupa  
Hate suka ma teungku beh

Lakee izin banta muda  
Ban dua ngon putroe Aloh  
Wahe bunda bungong meurak  
Di lon kujak nanggroe jeuoh

Doa beule keubajikan  
Keu lon tuan hai po ma beh  
Diwa Hamilah seuot yoh nyan  
Izin laman meuh seuneupoh

Oh lheueh izin nibak bunda  
Neutren lanja puteh lusoh  
Neuba judo putroe seudang  
Hate seunang lazat tuboh

Ateueh guda ka neupasang  
Jiteureubang dalam leusoh  
Siat meuyub siat manyang  
Ban seulayang guda utoh

Pakri ngon su macam-macam  
Dalam awan tango kiroh  
Watee meuyub sang su canang  
Oh ka manyang miseue guroh

Ka muble-ble dalam awan  
Guda jalan hana teudoh  
Duek di ateueh banta seudang  
Ngon cut intan nyang seumeuloh

Troh u nanggroe keunan datang  
Buni Yaman nama geuboh  
Sabab guda meupeurasan  
Sulotan neuwoe di jeuoh

Ateueh kuta jiteureubang  
Su meukrang-krang tango kiroh  
Dalam nanggroe sare kiam  
Sang-sang macam langet runtoh

Habeh karu dara agam  
Lam seupot klam salah saloh  
Ladom jiplueng lam beurawang  
Ladom u blang keudeh ka troh

Han meuho le meutang ilang  
Ladom riwang ma teungku beh  
Sang-sang bala keunan datang  
Dara agam sare riox

Dalam kuta teubiet tamong  
Miseue langong tango kiroh  
Ubak raja ladom kheun ban  
Pakri macam tuanku beh

Meunan keudum tanyong manyong  
Ureueng inong nyang that riox  
Teutap rakyat ulee mumang  
U manyang jinoe lon ratoh

Yoh nyan guda jipo tajam  
Rimba itam keudeh piyoh  
Beungoh uroe han le malam  
Seungab kiam han le riox

\*  
Asoe nanggroe ngieng u manyang  
Ulee mumang hai cuda beh  
Hana sapeue na mubayang  
Tahe mandang bandum layoh

Geusyik waki uleebalang  
Dum sibarang salah saloh  
Geutanyong le meunoe macam  
Meusu beuklam peue that riox

Ladom jikheun han lon tuban  
Bala Tuhan kadang ka troh  
Bukon meunan hai syeedara  
Bak keunira lon nyang putoh

Kadang cit ka troh geureuda  
Manusia jimeung sampoh  
Seuot laen teuma sigra  
Nyang kon haba tajak ratoh

Hana got niet dalam dada  
Waba puta rimueng pajoh  
Kon talakee nyang sijahtera  
Nibak bala beuek jeuoh

Seuot laen teuma sigra  
Bit nyo gata nyang di baroh  
Lon meututo pura-pura  
Peue nyang subra gata riolah

Takheun keugob han takira  
Tathee raya teuga tuboh  
Tunyok meununyok han got gura  
Lam-lam mata jaroe ka roh

Meudeh meunoe kameudawa  
Kiam subra meugeurupoh  
Bandua droe beungeh raya  
Nyak kuala ngon nyak baroh

Tajo sidroe ureueng tuha  
Geukheun teuma peue nyang kiroh  
Seungab keudeh bek le dawa  
Got tasaba bek le riolah

Hana guna tameudawa  
Seungab teuma han le gaduh  
Jeuet keu dumnan haba dawa  
Lon peugisa puteh lusoh

Sideh piyoh dalam rimba  
Banta muda nyang seumeuloh  
Seupot uroe teuka sinja  
Beudoh lanja meuh seuneupoh  
Leupah magrib teuka isya  
Ateueh kuta keunan ka troh  
Deungon bunyoe sang geureuda  
Miseue rupa langet runtoh

Mise beuklam meunan rupa  
Ngon suara ureueng jeuoh  
Tujoh uroe tujoh malam  
Sabe kiam hana teudoh  
Hana peue le lon peugah ban  
Hana macam subra rioh  
Lheueh nibak nyan teuma dudoe  
Jitron jinoe guda utoh

Neupeurab le po samlakoe  
Sajan putroe teumpat jeuoh  
Di teungoh blang neupioh droe  
Ureueng nanggroe keunan ka troh

Teujak teudong tahe gante  
Ureueng nyang le teubiet reuoh  
Teuma leumah dalam dada  
Pane teuka meuh seuneupoh  
Han tom lon eu meunan rupa  
Cit bandua hu seumeulhoh  
Saleh cit nyan budiadari  
Tuhan neubri keunan ka troh  
Neukaronya uleh Tuhan  
Dalam awan keunan jatoh  
Meunan-meunan dum jipeugah  
Rakyat barullah keunan ka troh

Nyang ladom woe dalam kuta  
Jak peuhaba bak cut aloh  
Janu Hati putroe muda  
Di astana han tom jeuoh

Nyang ladom woe dalam rimba  
Jijak mita puteh lusoh  
Troh le sidroe ureueng teuka  
Ampon hamba hai po cut beh

Jeh pat di blang saboh peurasan  
Dalam awan keunan jatoh  
Oh lon kalon hai cut intan  
Hana meunan ureueng that jroh

Han tom lon eu meunan macam  
Inong agam hu seumeuloh  
Putroe deungo meunan haba  
Meuntroe sigra le jisuroh

Janu Hati peugah sigra  
Ho ka gata nyang ka na troh  
Cuba tajak u blang raya  
Tapareksa taeu beudeueh

Beurijang keunoe tagisa  
Peugah haba keunoe beutroh  
Peurdana plueng laju bagah  
Bajee basah teubiet reuoh

U blang laju geuplueng pantah  
Bak cut indah keudeh ka troh  
Oh troh keudeh lem peurdana  
Ban geungieng keu puteh lusoh

Sujud laju peumulia  
lem peurdana sangat utoh  
Ampon meuah po meukuta  
Pateh teuka keunoe ka troh

Lon ngo duli ka neugisa  
Tan lon kira payah tuboh  
Jinoe deelat nyang meurasa  
Bah tagisa keudeh beutroh

Bek le sinoe po meukuta  
Hana guna sinoe piyoh  
Han got meujeulih kureueng basa  
Sabab neuba puteh lusoh

Oh gob kalon han got rupa  
Tan mulia putroe jeuoh  
Tajul Muluk jawueeb sigra  
Ngon suara sangat peunoh

Hai peurdana leungkiek sabon  
Deungo ulon peugah beutroh  
Beudoh dilee tajak gisa  
Dalam kuta keudeh tabloh

Peugah ubak putroe muda  
Peugah hamba woe di jeuoh  
Lagi lon ba po sambinoe  
Sajan kamoe nyoe ho ka troh

Meunan neukheun ubak putroe  
Lon sinoe dilee piyoh  
Teuma beudoh le peurdana  
Laju gisa bak cut aloh

Oh troh keudeh peugah haba  
Ampon hamba hai po cut beh  
Ka troh lon jak bungong jeumpa  
Lon pareksa keudeh ka troh

Oh ban lon eu leumah rupa  
Po meukuta woe di jeuoh  
Deungon putroe sajan neuba  
Lon eu rupa that seumeuloh

Lon jak laju peu mulia  
Bandua ngon puteh lusoh  
Neuyue peugah bak putroe ti  
Neukheun duli woe di jeuoh

Sajan neuba po juhari  
Ubak cut ti yue peugah troh  
Janu Hati deungo meunan  
Lazat ba'dan sijuek tuboh

Buka peutoe cok peukayan  
Ngui u badan puteh lusoh  
Oh lheueh meungui bungong keumang  
Dum deundayang keunan ka troh

Boh ngon ranub dalam puan  
Keudeh u blang laju jiblo  
Jiba laju keunan lam blang  
Ngon deundayang leubeh utoh

Soe nyang kalon tahe mandang  
Cahya subang hu seumeuloh  
Peuhah payong bandum rata  
Po jroh rupa sangat utoh

Oh troh keudeh ubak raja  
Santeuet banja dong di jeuoh  
Janu Hati putroe muda  
Di jeumala jaroe jibet

Jimarit le po jroh rupa  
Ngon suara manyoh layoh  
Soe deungo su putroe muda  
Sret ie mata han ek sampoh

Cit teuka weueh dalam dada  
Lazat rasa sang ka layoh  
Ie on kayee lam piala  
Cit peunawa sijuek tuboh

Jipeureutek ateueh banta  
Beu sijahtera tuanku beh  
Lom' breueh pade dihambo ka  
Ngon suara lom' jitumpoh

Bungong sitahon hu meukilat  
Kru seumangat puteh lusoh  
Meuah po cut puteh lumat  
Jak bak teumpat nak tapiyoh

Peugot tumpoe teumon buleukat  
Pisang brat peugot peunajoh  
Tuhan neubri ek seulamat  
Meusampe that payah tuboh

Pisang nu keu eumpeuen musang  
Pade di blang eumpeuen tikoh  
Wahe adek putroe seudang  
That lon sayang puteh lusoh

Udeh po cut u astana  
Ubak cuda tajak piyoh  
Rumoh lon na saboh sagoe  
Udeh jinoe hai adek beh

Akan teutapi hai sambinoe  
Cuda teunyoe han saho roh  
Tan sapeue na lon hai nyak ti  
Bek weueh hate puteh lusoh

Lheueh jikheun nyan Janu Hati  
Ka jimat le putroe ban troh  
Jiba laju u astana  
Tinggai raja sinan piyoh

Oh troh jiba pirak hupam  
Ateueh tilam jipeuduek troh  
Got that putroe peu mulia  
Bek upat ceula ateueh tuboh

Oh troh watee asa uroe  
Po samlakoe neuwoe le troh  
Janu hati putroe muda  
Ie lam gaca ka lheueh jiboh

Jipeurab le cok seurahi  
Jak srah gaki puteh lusoh  
Oh lheueh jisrah gaki duli  
Nibak jaroe jimat le troh

Jimat laju keumbang ijo  
Dara baro jak pupiyoh  
Puduek laju atueh kaso  
Dara baro keunan ka troh


Jiseumbah le gaki jaroe  
Raja neuwoe nanggroe jeuoh  
Teuma jiduek putroe meugleung  
Ranub seuneuleueng ka lheueh jiboh

Akan banta kajisuleueng  
Bungong seumpueng sangat utoh  
Bandua droe putroe meugleueng  
Wie ngon uneun hana jeuoh

Tajul Muluk that sukaan  
Ngon cut intan puteh lusoh  
Na sikeujab piyoh sinan  
Ngon hidangan keunan ka troh

Janu Hati buka hidang  
Angkat tangan cut seumeuloh  
Wahe adek bungong keumang  
Makeuen rijang hai po cut beh

Makeuen adek peue mudah na  
Rumoh cuda banda jeuoh  
Lagi adek han soe mita  
Sabab raja treb ka gadoh



Nyoe keuh baro lon eu rupa  
Grak Rabbana hai po cut beh  
Lheueh nyan teuma geusrah jaroe  
Ureueng lhee droe makeuen sunggoh

Geupajoh bu sibuju jaroe  
Nikmat ka troe lazat tuboh  
Oh lheueh makeuen lhee seureuta  
Putroe muda ranub jiboh

Teungoh duek-duek peugah haba  
Malam pi ka laju jeuoh  
Teuma beudoh laju sinan  
Bak tidoran geujak piyoh

Banta neueh bak malam nyan  
Dua sajan putroe utoh  
Rot deh rot noe putroe muda  
Di teungoh banta hai adek beh

Manyoh meusyen hana tara  
Cit maklum ka hai cupo beh  
Ka padum treb ka puasa  
Hidang raya keunan ka troh

Jinoe ka troh watee buka  
Peue lom cuda malam jeuoh  
Makeuen minom laju sigra  
Lazat rasa badan tuboh

Teutap sinan po samlakoe  
Deungon putroe nyang seumeuloh  
Hana sapeue keususahan  
Meulaenkan lam tawajoh

Grak teukeudi nibak Allah  
Ingar ayah puteh lusoh  
Saleh mantong saleh hanle  
Masa lon cre saket tuboh

Padum zaman lon beurjalan  
Rimba Tuhan habeh lon bloh  
Mita ubat ayah laman  
Saket badan seunang tuboh

Rasa badan sang ka mate  
Han lon turi seupot beungoh  
Lon peujok droe ubak Allah  
Nyum sang sudah nyawong gadoh

Dumnan yakin lon jak mita  
Bak ayahanda lon woe beutroh  
Ka meuteumeung Meungkawali  
Ngon putroe ti na dua boh

Tan lon ingat aib keuji  
Dumnan duli saket tuboh  
Di lon laloe ngon isteuri  
Malam hari seunang tuboh

Ibu bapak bah le mate  
Asai hate lon tawajoh  
Meunan pike banta muda  
Sret ie mata ban ujeuen toh

Meunan ingat dalam dada  
Han meurasa bu neupajoh  
Janu Hati tanyong sigra  
Hai meukuta meuh seuneupoh

Pakon tuanku hate rukha  
Ubak hamba neupeugah troh  
Tajul Muluk peugah rijang  
Hai buléuen trang nyang seumeuloh

Di lon hate sangat gundah  
Ingar ayah saket tuboh  
Saleh mantong saleh hanle  
Han lon tukri hai intan beh

Harap jinoe nibak' gata  
Izin hamba puteh lusoh  
Ulon jak woe sikleb mata  
Mangat sigra puleh tuboh

Janu Hati seuot rijang  
Ulon sajan tuanku beh  
Bek neukeubah ulon sinoe  
Akhe paloe ateueh tuboh

Meunan narit po sambinoe  
Banta sidroe hate seungkoh  
Bak lon judo suka hate  
Bu meusampe payah tuboh

Meunyo hajat lon meugisa  
Dua gata lon ba beutroh  
Lon mupayah bu meusampe  
Hai boh hate puteh lusoh

Meunan narit po samlakoe  
Sinyak putroe hate manyoh  
Yoh nyan putroe jimeuhase  
Jipeugot le ngon peunajoh

Dum makanan hase lingka  
Beukai bungka nanggroe jeuoh.  
Hingga cukop dum anika  
Po jroh rupa hate seungkoh

Teuma jikheun putroe muda  
Ulon beuna tuanku beh  
Tajul Muluk seuot sigra  
Bekle rukha puteh lusoh

Nibak ulon hana dawa  
Ikot sahja nyawong tuboh  
Tajul Muluk kheundak gisa  
Bak syeedara neupeugah troh

Hai kakanda ulon peuet droe  
Jinoe tawoe nanggroe jeuoh  
Tajak saweue ayah bunda  
Treb ka lama tameurawoh

Jinoe patot tajak gisa  
Ubat mata puwoe beutroh  
Tajul Muluk meunan peugah  
Hamidasyah hate seungkoh

Hamidasyah seuot pantah  
Ban nyang titah puteh lusoh  
Nibak kamoe hana dawa  
Ikot saja ban nyang suroh

Hamidasyah meunan haba  
Po jroh rupa hate manyoh  
Neubeudoh le po samlakoe  
U meuligoe neukek ka troh

Neupeugah le ubak putroe  
Hai sambinoe meuh seuneupoh  
Singoh putroe jadeh bungka  
Bak ayahanda tawoe beutroh

Bak malam nyan eh beuradu  
Sajan bungsu nyang seumeuloh  
Teuka beungoh teubiet faja  
Jak srah muka deungan tuboh

Banta peugah ubak putroe  
Hai sambinoe meuh seuneupoh  
Beudoh judo tajak bungka  
Bek le lama sinoe piyoh

Janu Hati ngon Mahmuda  
Beudoh sigra hate seungkoh  
Teubiet laju bungong keumang  
Kapai sinan jilhom saoh

Tajul Muluk nyang bangsawan  
Peukek intan lam kapai troh  
Oh troh dalam kapai raya  
Duek le lanja keumeu piyoh

Tajul Muluk peugah haba  
Hai adekda puteh lusoh  
Bah rot laot gata gisa  
Rot lam rimba di lon kubloh

Gata adek han ek bungka  
Gunong raya manyang lusoh  
Di lon judo bah rot rimba  
Bak Rabbana lon jok tuboh

Beule doa po jroh rupa  
Dalam rimba di lon kubloh  
Meungna tulong bak Rabbana  
Bah lon lingka gunong tujoh

Teuma seuot putroe muda  
Ampon hamba tuanku beh  
Bek tuanku woe ret rimba  
Gunong raya manyang lusoh

Peunyaket le han peue peugah  
Badeuk gajah rimueng buloh  
Laen tuanku singa gajah  
Lam-lam paya sinan piyoh

Lagi susah hana bagoe  
Gaki jaroe duroe pajoh  
Meunyo tuanku woe ret rimba  
Kamoe dua ret nan meubloh

Saket mangat sama rasa  
Hai meukuta puteh lusoh  
Lagi mangat kamoe rasa  
Kamoe dua ka meutuoh

Lom tan mupat dairah nanggroe  
Hai samlakoe meuh seuneupoh  
meunan narit putroe dua  
Ngon ie mata ban ujeuen toh

Teuma seuot banta muda  
Hai adekda puteh lusoh  
Bek tagundah po jroh rupa  
Cit na tanda teumpat piyoh

Oh meuteumeung saboh tanda  
Kapai raya jilhom saoh  
Nyang ulon nyoe bek takira  
Tuhan peulara nibak musoh

Tajul Muluk meunan haba  
Tron le sigra tan le piyoh  
Oh ban leupah neutron banta  
Kapai raya jibet saoh

Meulayeue lam laot raya  
Teutap bungka meuh seuneupoh  
Teutap bungka dua putroe  
Kisah muwoe banta utoh

Deungon aduen Hamidasyah  
Neucok langkah rimba neubloh  
Laju geujak uroe malam  
Neukira tan payah tuboh

Teungoh neujak po samlakoe  
Banta peuet droe lakee piyoh  
Tajul Muluk ngon aduen droe  
Piyoh jinoe dang tho reuoh

Dang-dang piyoh puleh payah  
Hamidasyah marit utoh  
Wahe adek intan bungong  
Lon teumanyong hai adek beh

Jinoe adek kheun beukeunong  
Lon that bingong hai intan beh  
Na meuteumeung Meungkawali  
Ubat abi tapeugah troh

Hajat cinta hana sakri  
Lon teupike dalam tuboh  
Meunyo cit na Meungkawali  
Ubak abi lon woe beutroh

Meunyo hana Meungkawali  
Bahle kamoe hilang tuboh  
Sabab ka lheueh sumpah janji  
Deungon duli hai adek beh

Tajul Muluk seuot sigra  
Hai kakanda bek le rioh  
Lon jak mita jeueb-jeueb donya  
Meuteumeung ka hai dalem beh

Po jih hana hai kakanda  
Lam astana teungoh layoh  
Teuma lon jok pantah sigra  
Puwoe teuma keunoe ka troh

Hana peue ci hai kakanda  
Puleh sama oh ka taboh  
Sabab payah lon jak mita  
Ulon bungka nanggroe jeuoh

Manyak lon kon dalam rimba  
Jeueb-jeueb rimba habeh lon bloh  
Seureuta ulon sambe nyawa  
Hai kakanda puteh lusoh

Lon jak mita Meungkawali  
Nak meusampe aneuk geubeh  
Deungon ibu lonpih sama  
Tuhan peulara hai dalem beh

Bah le jinoe lon balah guna  
Keu ayahanda jinoe beutroh  
Tajul Muluk meunan peugah  
Hamidasyah jawueub utoh

Wahe aneuk bungong jeumpa  
Buet ka lama bek le rior  
Keureuna ayah ureueng tuha  
Akai bicara habeh gadoh

Jinoe adek nyang taingat  
Bungong ubat puwoe beutroh  
Meunan narit Hamidasyah  
Seuot pantah puteh lusoh

Kon lon upat hai kakanda  
Proe hai haba lon meuteuoh  
Hana lon tueng saket hate  
Bek Allah bri nyang meunan roh

Adat meung na hate lon brok  
Han lon jak jok nyawong keu musoh  
Meung na hajat neukeumeung ci  
Jak cari nyang saket tuboh

Pat nyang na ureueng nyang buta  
Neujak mita toe ngon jeuoh  
Hamidasyah deungo meunan  
Geujak yoh nyan hana piyoh

Teungoh jak-jak banta muda  
Ureueng buta keunan ka troh  
Meuheu laju keunan sigra  
Hai nek kuya keunoe piyoh

Ureueng buta peurab laju  
Han deuh geueu meuh seuneupoh  
Hamidasyah mat bak jaroe  
Bak samlakoe geuba le troh

Oh troh keunan bak bangsawan  
Ie lam cawan ka lheueh geuboh  
Neureundam le Meungkawali  
Teuma neubri boh bak tuboh

Oh lheueh geuboh ubat mata  
Puleh sigra dum geusampoh  
Deungon siat puleh mata  
Ureueng tuha hate manyoh

Ucap syuko pujoe Tuhan  
Bak bangsawan geusujud troh  
Lheueh nibaknya laju geuwoe  
U rumoh droe laju ka troh

Tajul Muluk ngon aduen droe  
Ban sinaroe han le piyoh  
Geujak sabé hana padoe  
Gaki jaroe kareueng pajoh

Bit pi meunan teupat kasad  
Hana ingat dalam tuboh  
Banta peuet droe laen kira  
Banta muda jikeumeung poh

Meung kon meunan malee mata  
Bungong hana tawoe jeuoh  
Nibak ayah tan meuguna  
Nyang na gob ceula atueh tuboh

Habeh pakat banta peuet droe  
Bak samlakoe lakee piyoh  
Tajul Muluk deungo meunang  
Piyoh yoh nyan puteh lusoh

Na sikeujab sinan lama  
Po jroh rupa mata layoh  
Teungeut laju po samlakoe  
Banta peuet droe mat bak tuboh

Jipoh laju bungong geutoe  
Reumok asoe sang ka luroh  
Nyang ladom poh deungon kayee  
Ladom batee lom jitumpoh

Reumok asoe bungong keumbee  
Sang ka pade nyawong putoh  
Banta peuet droe meunan pike  
Nyawong ka cre nibak tuboh

Jijok bungong Meungkawali  
Jiteungoh le gunong lusoh  
Padum buleuen jibeurjalan  
Sikeujab tan na jipiyoh

Geujak laju uroe malam  
Bineh padang keunan ka troh  
Ka meuteumeung saboh rangkang  
Ureueng meuladang sinan piyoh

Hamidasyah marit yoh nyan  
Tajak kaman siat beutroh  
Ureueng meuladang jijak sigra  
Dalam kuta keudeh ka troh

Jipeugah le ubak raja  
Banta muda woe di jeuoh  
Raja deungo meunan haba  
Bak peurdana le neusuroh

Geujak tueng le teuma rijang  
Tot meuriam sare riuh  
Meusu meuriam leungo alam  
Siulah sang geuprang musoh

Oh troh keudeh dalam kuta  
Lam astana laju piyoh  
Meuteumeung le deungon raja  
Seumbah sigra puteh iusoh

Raja nanggroe sret ie mata  
Basah ija han ek sampoh  
Wahe aneuk bintang kala  
Pakon lama hai intan beh

Teukeudi ulon ajai teuka  
Putoh asa apon tuboh  
Banta peuet droe seuot sigra  
Hai ayahanda lon jak jeuoh

Lon jak mita Meungkawali  
Lam glap cut ti ulon piyoh  
Ban meuteumeung ubat abi  
Lon keumbali keunoe ka troh

Deungon doa syahi alam  
Ban cintaan Tuhan peutroh  
Jilakee ie saboh cawan  
Troh le rijang hai teungku beh

Meungkawali dalam tangan  
Jiboh keunan lam cawan troh  
Geugeusuek le nibak mata  
Ngon siat ka puleh tuboh

Hana sapeue pi na ceudra  
Allah taala sangat utoh  
Kakeuh meuwoe miseue nyang ka  
Teutap raja lam tawajoh

Ucap syuko pujo Allah  
Khalifah hate that manyoh  
Teuma mariṭ po teuraja  
Tuah gata hai aneuk beh

Adat kon na peuet droe gata  
Ulon nyoe ka han saho roh  
Meutuah that bijeh mata  
Ka seumpureuna payah tuboh

Meunan neukheun raja nanggroe  
Aneuk peuet droe hate manyoh  
Sang gaki han jab bak bumoe  
Meunan keuh proe hai teungku beh

Lheueh raja meung khanduri  
Bungong giri woe di jeuoh  
Uroe malam mupeurasan  
Peh bunyi-bunyian sare rioh

Subhanallah han peue tanyong  
Agam inong geupah geupoh  
Rame rakyat miseue langeng  
Baroh tunong keunan dum troh

Han ek peugah buet khanduri  
Meubuet duli han peue teuoh  
Teutap raja meung khanduri  
Laen rawi ulon saloh

Taek ugle koh seumantok  
Peuget bidok jampang tawoe  
AMMA BAKDU jinoe ka troh  
Tajul Muluk lon hareutoe

Oh lheueh jipoh le syeedara  
Dalam rimba tinggai sidroe  
Jitiiek sinan dalam rimba  
Di jih sigra laju jiwoe

Teukeudi Tuhan Maha suci  
Bungong giri ingat keudroe  
Meung goh habeh langkah raseuki  
Han Tuhan bri ajai sampoe

Beuthat jipoh deungon bate<sup>e</sup>  
Bah jiseubee dalam bumoe  
Han cit mate Tuhan neubri  
Meung goh janji ajai sampoe

Bungong meulu bee meudrû-dru  
Putroe ijo lam meuligoe  
Ban teukeujot bungong keundo  
Tahe gante po samlakoe

Ucap syuko Alhamdulillah  
Pujoé Allah po teu sidroe  
ngon ie mata ile limpah  
Banta indah pike keudroe

Teuringat fie syeedara  
Jipupana po samlakoe  
Lom teuringat putroe muda  
dalam bahtra bandua droe

Tatkala nyan po jroh rupa  
Sret ie mata ngon meulangoe  
Teungoh bae banta muda  
Deuh suara mangat han soe

Wahe aneuk Tajul Muluk  
Bek le daok hai samlakoe  
Peue nyang wasiet bak Hamilah  
Hai meutuah nyan tapakoe

Banta deungo haba meunan  
Neungieng yoh nyan keudeh keunoe  
Hana sapat leumah ureueng  
Tan haba nyan beurangkasoe

Tatkala nyan Tajul Muluk  
Ka teuseupok po samlakoe  
Banta ingat wasiet bunda  
Yoh masa neukeumeung jak woe

Ureueng hana leumah nyata  
Cit suara neungo bunyoe  
Ka teuringat putik langsat  
Malaikat nyang troh keunoe

Nibak ulon geubri ingat  
Ban amanah yoh saboh roe  
Bak masa nyan bungong tajok  
Neumat le ok nibak jaroe

Neupoh le pha ka neuantok  
Hamilah troh jithee keudroe  
Ka jitupeue le Hamilah  
Banta indah pangge kamoe

Jideumpek le su meutaga  
Troph le teuka jen sinaroe  
Nyang bangsa jen pari diwa  
Ngon siat ka keunan sampoe

Oh troh keunan bak Hamilah  
Ka jipeugah hai samlakoe  
Ka jipeugah dum peue lahe  
Jibeudoh le dum sinaroe

Jiteureubang dalam awan  
Ngon siat nyan ka troh sampoe  
Jeueb-jeueb uteuen troh jiteuka  
Jak pareksa po samlakoe

Saboh saho jiteureubang  
Jijak pandang banta nyang woe  
Teuma leumah jieu rupa  
Kayee raya that seureuloe

Laju keunan jipo teuka  
Leumah nyata po samlakoe  
Banta pandang atueh bunda  
Sret ie mata dum meataloe

Keumeung beudoh po mulia  
Han kuasa po samlakoe  
Oh neubeudoh lom ka reubah  
Diwa Hamilah pi ka jimoe

Wahe aneuk nyang meutuah  
Bek ta langkah gata keunoe  
Hamilah peurab laju keunan  
Bungong keumang pakon meunoe

Wahe aneuk banta seudang  
Peugah rijang soe pupaloe  
Ho ka judo hai aneukda  
Peugah bak ma hai samlakoe

Peugah laju bijeh mata  
Lon tueng bila bak uroe nyoe  
Tapeugah hai bungong peukan  
Jen ngon insan atawa soe

Lon eu tuboh ka binasa  
Habeh luka gaki jaroe  
Peugah aneuk laju rijang  
Bah lon muprang bak uroe nyoe

Han kukeubah mate geujang  
Han kuriwang le u nanggroe  
Meung goh kutueng bila intan  
Deumi Tuhan han le kuwoe

Meunan jikheun diwa Hamilah  
Sira peugah sira jimoe  
Tajul Muluk seuot pantah  
Ma meutuah deungo kamoe

Sinyak putroe bungong rambot  
Ka ret laot ulon yue woe  
Dilon bunda nyoe ho ka ret  
Ngon grak makbud po alam nyoe

Bek hai bunda hate gundah  
Ubak Allah neujok kamoe  
Meung na umu ma meutuah  
Tuhan balah uroe dudoe

Hana guna ulon peugah  
Jeuet keu salah hai ma putroe  
Tajul Muluk meunan peugah  
Hamilah ka muphom keudroe

Nyang jeuet bunda lon yue langkah  
Kon beunalah ulon muproe  
Hana hajat ulon meunan  
Meulaenkan ulon neupuwoe

Ubak nanggroe Syarikatan  
Hai ma badan napsu kamoe  
Akan teutapi wahe bunda  
Bek lam kuta lon neupuwoe

Neukeubah lon dalam uteuen  
Bak tan mideuen raja nanggroe  
Neupeugot keu lon saboh taman  
Beusaban ngon meuligoe putroe

Bek na sapeue keukurangan  
Hai ma badan hajat kamoe  
Tajul Muluk meunan peugah  
Diwa Hamilah jaweueb meunoe

Meunyan aneuk bek tagundah  
Potallah nyang peusampe  
Diwa Hamilah jimeukeumah  
Peurab bagah bak samlakoe

Cok peunawa dalam keudah  
Jiboh pantah nibak asoe  
Oh ban keunong nibak badan  
Puleh rijang po samlakoe

Lheueh nibak nyan jiteureubang  
Banta seudang jiba jinoe  
Oh ban leumah Syarikatan  
Tron lam uteuen jipiyoh droe

Hana jarak mideuen raja  
Kira-kira jak siuroe  
Keunan geutron laju sigra  
Dalam rimba bineh sungoe

Teumpatpi jroh hana tara  
Banta muda marit meunoe  
Sinoe bunda peugot teumpat  
Sabab rab that bineh sungoe

Hamilah deungo haba meunan  
Teukui yoh nyang ngieng u bumoe  
Teukui uyub ngieng u manyang  
Putroe intan reutek jaroe

Dalam hate meugeulumbang  
Jipandang bak taman putroe  
Oh ban teupet mata dua  
Teudong kuta ngon meuligoe

Cukop asoe kuta sakti  
Lom sipai han peue kheun proe  
Mat di jaroe dum sinapang  
Ikat sajan ngon geureupoe

Ngon meuligoe sangat indah  
Meutatah ngon batee pudoe  
Dileuen meuligoe saboh taman  
Soe kalon nyan mata laloe

Cukop leungkap buet Hamilah  
Sangat indah hana bagoe  
Miseue taman Meungkawali  
Hana sakri that seureuloe

Nyankeuh nanggroe Diwa Sakti  
Hana peue le lon hareutoe  
Lheueh marit banta seudang  
Neukheun yoh nyan bak ma putroe

Wahe bunda gaseh sayang  
Putroe intan jak tueng keunoe  
lagi ka treb dalam bahtra  
Sabab hamba ka mupaloe

Teuma seuot Diwa Hamilah  
Insya Allah hai samlakoe  
Jimeuheui le Pari Diwa  
Trok le sigra keunan sampoe

Jipeugah le meunoe haba  
Putroe muda jak jok keunoe  
Bah le sideh dalam bahtra  
Deungon sigra keunoe puwoe

Diwa Hamilah meunan haba  
Jipo lanja dum sinaroe  
Jeueb-jeueb laot jipareksa  
Jieu pat na kapai beusoe

Oh ban leumah jieu rupa  
Pari Diwa keunan pantah  
Dalam kapai jitron sigra  
Meuteumeung ka po sambinoe

Jiangkat le jaroedua  
Ampon hamba hai po cut droe  
Mahmuda ngieng Pari Diwa  
Tanyong lanja haba meunoe

Hai man pari peue teuh haba  
Lon eu gata ka troh keunoe  
Kamoe meujak suroh raja  
Dalam rimba neupioh droe

Neuyue jak tueng putroe muda  
Ngon sigra beutroh lon puwoe  
Habeh haba siman pari  
Cut putroe ti jicok jinoe

Jibapo lam awan ijo  
Putroe tahe bandua droe  
Ateueh kuta troh jilalu  
Bungong keundo peutron jinoe

Diwa Hamilah kalon rupa  
Hai aneukda ka troh tawoe  
Peurab laju putroe muda  
Seumbah bunda gaki jaroe

Diwa Hamilah hate suka  
Geucom geuwa bandua droe  
Hai meutuah cahya mata  
Beuseumpureuna sampie dudoe

Meung na hajat bungong jeumpa  
Troph lon teuka laen uroe  
Wahe aneuk jeh pat judo  
Bungong keundo lon kujak woe

Meung na nafsu hai aneuk . . . e  
Troph lon laloe keunoe sampie  
Lheueh nibaknyan Diwa Hamilah  
Jipo pantah laju jiwoe

Tinggai sinan putroe indah  
Ngon khalifah nyang samlakoe  
Uroe malam meuseusuka  
Deungon raja tangglong nanggroe

Hana sapeue keukurangan  
Lam seunangan malam uroe  
Tajul Muluk ngon putroe dua  
Lon pumada dilee oh noe

Ulon peugah laen punca  
Putroe muda nyang sambinoe  
Treb ka hana lon meuteuoh  
Masa gadoh bungong putroe

Jinoe baro ulon satoh  
Cut putroe jroh baek budoe  
AMMA BAKDU treb ka lambat  
Deungo sahbat lon hareutoe

Meungkawali aneuk deelat  
Teungoh mangat lam meuligoe  
Hana sapeue pi na tuban  
Mantong pangsan sinan sidroe

Tajul Muluk cok peukayan  
Bungong sajan ka neupuwoe  
Tan jitupeue po juhari  
Teungeut sabe malam uroe

Oh leupah woe banta ahli  
Jaga cut ti di meuligoe  
Jibeudoh le bungong keumang  
Tren bak taman jijak manoe

Oh troh keunan putroe intan  
Bineh kulam jipiyoh droe  
Preh jibeudoh Meungkawali  
Keunan sabe mata putroe

Hireuen tahe cut putroe ti  
Meungkawali hana sampoe  
Meungkawali bungong indah  
Hana leumah bak uroe nyoe

Adat dilee cit troh bagah  
Oh meulangkah ulon keunoe  
Teuma leumah jieu nyata  
Tangke bunga sinyak sinoe

Tatkala nyan po jroh rupa  
Hate rukha dum geutampoe  
Putroe jimoe ro ie mata  
Jiwoe lania u meuligoe

Jiek laju u astana  
Jak cok ija po sambinoe  
Oh ban jieu bungong jeumpa  
Tan le ija neupuwoe putroe

Lheueh nibak nyan lom ka jingieng  
Han le euncien nibak jaroe  
Bak masa nyan bungong pade  
That teupike hana bagoe

Hana sapeue jimirit le  
Dalam hate meusoegemoe  
Pane ureueng keunoe teuka  
Jeuet jibuka pinto kuta

Han tom lon eu meunoe rupa  
Jijak hila euncien bak jaroe  
Lom ngon ija pi han le na  
Beuhe raya pancuri nyan

Meuploh ribee ureueng jaga  
Pakri daya jijak keunoe  
Bungong indah ka jibawa  
Ya Rabbana pakri kamoe

Teuma leumah dalam hate  
Kon pancuri buet nyang meunoe  
Nyoe keuh ureueng pangkat tinggi  
Aneuk duli saboh nanggroe

Lagi gagah that beurani  
Le that sakti bak ri bagoe  
Meung kon ureueng leubeh tuah  
Han ek langkah teumpat kamoe

Bah le jinoe lon jak mita  
Ulon bungka jeuoh nanggroe  
Meunan leumah dalam hate  
Tan jilahe bak beurangsoe

Meunyo lon iem meunoe sabe  
Di akhe meuteumeung rugoe  
Get bah jinoe lon peureugi  
Lon cari sigala nanggroe

Han lon peugah ubak abi  
Ngon bak umi ma lon pakri  
Meung lon peugah keumeung bungka  
Hajat hamba han ek sampoe

Meunan pike putroe muda  
Beudoh sigra peukeumah droe  
Oh lheueh cukop ngon peukayan  
Beudoh rijang bungong uroe

Jipo laju ret lam awan  
Putroe intan nyang sambinoe  
Karonya po sidroe Tuhan  
Troh yoh nyan bak saboh nanggroe

Jieu banda jroh hana ban  
Rame sinan malam uroe  
Jitron keunan meungkawali  
Peujeuet droe laen bagoe

Siulah sang ureueng haji  
Sang-sang faki tungkat di jaroe  
Rupa indah hana lawan  
Dalam peukan jijak sidroe

Soe nyang kalon pirak hupham  
Rupa agam kon le putroe  
Sinan teutap putroe intan  
Dalam peukan jibloe publoe

Dalam nanggroe Syarikatan  
Sinan intan jipiyoh droe  
Bit pi teiduek po jroh rupa  
Dalam dada laen bagoe

Uroe malam hate luka  
Rasia hana meubunyoe  
Allah hai po ya Rabbana  
Pat lon mita po samlakoe

Pakri ilah ngon bicara  
Beuek nyata nibak kamoe  
Meunyo han ek sinoe nyata  
Bah lon bungka laen nanggroe

Ya Ilahi wa ya Rabbi  
Keu lon neubri hajat sampoe  
Bu meuteumeung nyang lon cari  
Beureukat abi ngon ma putroe

Lheueh meulakee putroe muda  
Bak muka jirahob jaroe  
Teukeudi Allah po yang esa  
Troph le teuka ureueng sidroe

Jipeurab le keunan pantah  
Poh beurakah meudeh meunoe  
Hingga troh bak saboh haba  
Calitra bak raja nanggroe

Phon awai kon hingga akhe  
Habeh sare jihareutoe  
Meungkawali deungo meunan  
Tanyong yoh nyan sigra meunoe

Peugah bak lon hai syeedara  
Peue nan raja lam nanggroe nyoe  
Nanggroe nyoe peue nan geurasi  
Aneuk duli na padum droe

Peugah bak lon hai syeedara  
Peue keurija rame han soe  
Bak lon kalon keulakuan  
Sang peurasan malam uroe

Saboh sagoe sang khanduri  
Ulee ili ureueng jak woe  
Peue keureuna nyang jeuet meunan  
Peugah tuan ubak kamoe

Teuma seuot le ureueng nyan  
Deungo kaman lon hareutoe  
Zainul Muluk nan sulotan  
Syarikatan nama nanggroe

Peuet droe aneuk saboh bunda  
Bandum sama ureueng lakoe  
Nyang sidroe treuk hai syeedaga  
Saboh bunda gob nyan sidroe

Hana sinan sajan raja  
Treb ka lama cre di nanggroe  
Tajul Muluk geuheu nama  
Yoh masa na gob nyan sidroe

Jinoe raja meungkhanduri  
Nyang jeuet rame malam uroe  
Saboh bagoe mupeurasan  
Arak intan nyang baro woe

Sabab dilee hai syeedara  
Seupot mata raja nanggroe  
Neumoe sabe po teuraja  
Sabab mata ka meupaloe

Padumna treb lama masa  
Troh peundita u meuligoe  
Nujum peugah meunoe haba  
Puleh sigra raja nanggroe

Meunyo ek na Meungkawali  
Ayeuem cut ti di meuligoe  
Cit puleh le mata duli  
Meunan syaikhi neuhareutoe

Akan teutapi meuseuke that  
Jeuoh teumpat hana bagoe  
Ureueng kawai pi rame that  
Payah dapat keunan sampoë

Ban neudeungo meunan haba  
Ubak banta neukheun meunoe  
Tajak mita bungong indah  
Ta meulangkah jeuoh nanggroe

Padum lawet banta bungka  
Nyoë keuh masa baro geuwoe  
Geupeuwoe ngon bungong indah  
Ubat ayah po samlakoe

Oh na bungong Meungkawali  
Mata duli puleh jinoe  
Oh ban geuboh nyan peunawa  
Nibak mata raja nanggroe

Nyankeuh sabab ka khanduri  
Uleh duli raja kamoe  
Syuko nekmat nibak Rabbi  
Mangat hate hana bagoe

Nyankeuh sabab hai syeedara  
Rame banda malam uroe  
Meungkawali deungo meunan  
Tanyong yoh nyan teuma meunoe

Peugah bak lon syeedara jroh  
Saleh nyang toh banta peuet droe  
Nak lon turi hai syeedara  
Singoh lusa ka lon tusoe

Teungoh marit Meungkawali  
Keunan troh le banta peuet droe  
Geuduek atueuh guda puteh  
Baplueng keudeh baplueng keunoe

Jipeugah le teuma sigra  
Nyankeuh banta nyang baro woe  
Meungkawali kalon rupa  
Dalam dada meusoe gumoe

Beuthat gob nyan aneuk raja  
Han kuasa cok bungong nyoe  
Kon nyan rupa cok bungong lon  
Bineh keubon tan jipeutoe

Bineh nanggroe han troh jijak  
Meunyan curak hana bagoe  
Meunan leumah dalam dihen  
Na soe laen cok bungong nyoe

Bah le lon jak ubak raja  
Jak peuhamba tuboh kamoe  
Meunan pike putroe muda  
Habeh haba seupot uroe

Ureueng bunoe woe u teumpat  
Bungong riwat tinggai sidroe  
Leuk jikutru cong keutapang  
Siwah datang kheundak pupaloe

Teubiet uroe cahya bandrang  
Putroe bintang beudoh jinoe  
Tamong laju dalam kuta  
Ubak raja ka jipeutoe

Sujud laju po mulia  
Ampon hamba tuanku droe  
Zainul Muluk kalon rupa  
Ureueng teuka jroh han bagoe

Neutanyong le pantah sigra  
Pane gata pat bu nanggroe  
Ho keumeung jak peue tamita  
Peue na haba tajak keunoe

Meungkawali jawueub sigra  
Ampon hamba tuanku droe  
Lon nyoe titek bagoe ie mbon  
Angen peutron dalam nanggroe

Nama ulon Peurakoeson  
Ka na sithon ulon keunoe  
Gampong ulon dalam duson  
Treb ka ulon cre di nanggroe

Ulon sidroe mita raseuki  
Soe na tem bri bu siseun troe  
Suntok masa meunan sabé  
Wahe duli payong nanggroe

Nyoepi keunoe lon peureugi  
Ubak duli lon peujok droe  
Meungna gaseh po meukuta  
Bri keu hamba bu siseun troe

Neubri ngon buet peue-peue nyang na  
Lon keurija tuanku droe  
Raja deungo teuka sayang  
Keu cut intan nyang sambinoe

Teuma raja neukheun macam  
Hai bangsawan deungo kamoe  
Bek le tajak bungong husen  
Puteh licen teudong sinoe

Gubeue guda gata lon bri  
Geunap hari nyan tapakoe  
Teuma seuot putroe indah  
Ban nyang titah tuanku droe

Teutap sinan po jroh rupa  
Gubeue guda geunap uroe  
Bungong rom ngon bungong rihan  
Bungong peukan neungui putroe

Teiduek dilee bungong peukan  
Lon peuriwang keu samlakoe  
Bukan sayang cicem batok  
Keutok-tok nyang teungeut uroe

Teutap dilee bungong tajok  
Lael pakhok teuma jinoe  
Ulon kisah Tajul Muluk  
Sideh daok lam meuligoe

Bak siuroe teukeudi Tuhan  
Troph le keunan ureueng sidroe  
Ureueng nanggroe syarikatan  
Sisat jalan hana muho

Oh sare troh keunan teuka  
Jieu kuta that seureuloe  
Rupa indah hana lawan  
Pucak intan indah han soe

Meuploh ribee ureueng jaga  
Pawang rusa sinan laloe  
Tahe mandang sang geupula  
Ureueng jaga laju peutoe

Jidrob laju pawang rusa  
Ubak raja jiba sampoe  
Oh troh keudeh jijak lanja  
Peugah haba bak samlakoe

Tajul Muluk tanyong bagah  
Ho bu langkah pane nanggroe  
Pawang rusa laju peugah  
Ampon meuah tuanku droe

Nanggroe di lon syarikatan  
Sisat jalan troh lon keunoe  
Meukeusud woe rumoh tangga  
Ka roh hamba bak teumpat nyoe

Meunyo meunan pawang rusa  
Bah le gata tadong sinoe  
Peue nyang hajat ulon peuna  
Bek tagisa le u nanggroe

Lon bri rumoh gampong ngon blang  
Dum sibarang ateuah kamoe  
Jinoe tawoe dilee u gampong  
Tajak tueng aneuk ngon binoe

Karong wali wareh kaom  
Taba bandum bak teumpat nyoe  
Banta cok meuh na sibaha  
Nyoe keuh nyang na beukai tawoe

Mangat hate pawang rusa  
Geuwoe lanja troh u nanggroe  
Oh troh geuwoe peugah haba  
Bak syeedara dua lhee droe

Miseue nyang ka jieu rupa  
Jipeuhaba dum sinaroe  
Ban jideungo dum calitra  
Jijak lanja rab soh gampong

Aneuk peurumoh jiba sajan  
Jijak keunan han le jiwoe  
Oh troh keunan dum sineuna  
Hate suka hana bagoe

Aneuk peurumoh habeh jiba  
Deungon doa po samlakoe  
'Jroe malam hana teudoh  
Keunan dum troh rame han soe

Syarikatan nanggroe luah  
Rab na siblah han le asoe  
Padum lawet teuma meugah  
Ubak ayah po samlakoe

Meuthee ubak Zainul Muluk  
Ureueng nyang troh jak peugah proe  
Habeh jijak dalam rimba  
Ubak raja baek budoe

Wase laot wase darat  
Jijak intat hana padoe  
Raja deungo haba meunan  
Neuheu yoh nyan peurdana meuntroe

Neupeugah le meunoe haba  
Hai peurdana lon deungo proe  
Ureueng nanggroe syarikatan  
Sikalian ka jiboh droe

Saboh nanggroe dalam rimba  
Indah rupa hana bagoe  
Nanggroe baro mupeurmata  
Sidroe raja that seureuloe

Ureueng nanggroe keunan teuka  
Han jikira le keu kamoe  
Meunan lon ngo saboh haba  
Saleh beuna tan lon pakoe

Meunan sabda nibak raja  
Lem peurdana seuot meunoe  
Meuah ampon po meukuta  
Bah lon cuba kalon jinoe

Lon jak eu ngon mata dua  
Bek peucaya barangkasoe  
Meunan narit bak peurdana  
Po teuraja ka neuiem droe

Lheuh nyan teuma geubeurjalan  
Ngon angkatan dum sinaroe  
Oh troh keudeh dalam rimba  
Geungieng rupa jroh han bagoe

MILIK KEPUSATAN  
DIREKTORAT PENGETAHUAN  
BITJEN NBSF DENGKELAPANG

Laju geujak pantah sigra  
Dalam kuta ka geupeutoe  
Oh troh keunan ubak kuta  
Hireuen raya teukab jaroe

Hana sapeue le na haba  
Keudeh mata bak meuligoe  
Teuma meugah ubak raja  
Ureueng teuka rame han soe

Lom seureuta bala tandra  
Ngon sinjata nibak asoe  
Raja deungo meunan haba  
Bak peurdana neupeugah proe

Cuba tajak troh u lua  
Jamee teuka tatanyong soe  
Peurdana jak laju sigra  
Jieu tandra rame han soe

Keunan meuntroe jipeureugi  
Jitanyong le pane nanggroe  
Ureueng teuka peugah rijang  
Syarikatan teumpat kamoe

Meujak keunoe bak jonjongan  
Hajat laman jak com jaroe  
Meung na izin bak sulutan  
Kamoe tuan tamong jinoe

Teuma jawueub le peurdana.  
Teungku dumna piyoh sinoe  
Lon jak peugah bak meukuta  
Rijang gisa ulon keunoe

Peurdana jak laju bagah  
Geujak peugah jamee bunoe  
Banta deungo meunan ulah  
Jak tueng pantah u meuligoe

Peurdana riwang le pantah  
jak peugah haba samlakoe  
Wahe teungku nyang meutuah  
Udeh langkah u meuligoe

Ban geudeungo meunan haba  
Tamong sigra dum sinaroe  
hingga troh le bandum keunan  
Geucom tangan raja nanggroe

Jamee teuka geubri horeumat  
Seumbah deelat nyang samlakoe  
Lheueh meuteumeung deungon deelat  
Geubri teumpat bak peurdana

Miyub manyang kureueng leubeh  
Tan peue daleh buet samlakoe  
Na sikeujab duek mupiyoh  
Hidang ka troh keunan sampoe

Tajul Muluk marit yoh nyan  
Makeuen tuan nibak kamoe  
Bek neumalee dalem payong  
Keureuna ulon jeuoh nanggroe

Teuma makeuen sikalian  
Han peue panyang lon hareutoe  
Oh lheueh makeuen pinah hidang  
Banta yoh nyan tanyong meunoe

Hai peurdana nyang seutia  
Saboh haba lon hareutoe  
Lon nyoe miseue ureueng jamee  
Brat han sabe tuboh asoe

Nyum manyak kon asoe krot-kruet  
Tan mubacut mangat asoe  
Ureueng nyoe saleh ka seumpurna  
Di lon pi ka lon eu jinoe

Mangat hate hana nyang sa  
Keuraja nyang tanglong nanggroe  
Lon meulangkah han kuasa  
Sabab hamba hina tuloe

Uroe malam lon meucinta  
Deungon raja mumat jaroe  
Adat mate ajai teuka  
Putoh asa ulon sidroe

Han lon teumeung po meukuta  
Nyang lon cinta geunap uroe  
Keupeue nanggroe mupeurmata  
Keupeue kuta ngon meuligoe  
Keupeue jeuet na intan mutia  
Po teuraja han troh keunoe  
Lon keumeung jok sianika  
Lon meungbungka jeuoh nanggroe

Sia payah lon cak rimba  
Lon usaha peuget nanggroe  
Jinoe nyang get hai peurdana  
Tajak gisa dilee tawoe

Saleuem seumbah lon keu raja  
Beutroh teuka siat keunoe  
Jawueub meuntroe laju sigra  
Ampon hamba tuanku droe

Bek le susah dalam dada  
Po teuraja lon ba keunoe  
Cok peukayan sianika  
Po jroh rupa salen meuntroe

Neubri ngon meuh ban sikada  
Lem peurdana laju geuwoe  
Deungon rakyat dum sineuna  
Laju gisa woe u nanggroe

Oh troh keudeh ubak raja  
Peugah sigra dum sinaroe  
Deelat ampon po meukuta  
Deungo hamba peugah jinoe

Sangat beuna ban nyang kata  
Dalam rimba jroh meuligoe  
Nanggroe indah mupeurmata  
Hana nyang sa tuanku droe

Lam nanggroe nyan saboh kuta  
Sidroe raja that seureuloe  
Ngon sipai kawai kuta  
Meuploh laksa ribee katoe

Lon tamong troh dalam kuta  
Lon eu rupa that samlakoe  
Geubri teumpat po mulia  
Lheueh teuma geukheun meunoe

Hai peurdana tajak gisa  
Po teuraja beutroh keunoe  
Lon meungpulang dum anika  
Lon meungbungka jeuoh nanggroe

Meunan geukheun ubak hamba  
Lon woe lanja teuma keunoe  
Jinoe tuanku nyang meurasa  
Jak cok jeumba intan pudoe

Bek tuanku hate lupot  
Bek teumakot keu samlakoe  
Saleh hate bungong keumang  
Kon lon canang nyang haba nyoe

Ban raja ngo haba meunan  
Neukheun yoh nyan ubak meuntroe  
Jinoe peuget saboh surat  
Tayue intat keu samlakoe

Taboh haba dalam surat  
Lon beurangkat keudeh jinoe  
Meung na izin po hadarat  
Geujak intat laju jinoe

Oh troh keudeh ubak banta  
Sambot sigra dua jaroe  
Teuma neuploh le neubaca  
Muphom haba dum sinaroe

Habeh maklum haba surat  
Hate mangat po samlakoe  
Sabab ka troh ban nyang hajat  
Raja deelat neujak keunoe

Lheueh nibak nyan banta muda  
Pari Diwa neuhei jinoe  
Oh troh keunan peugah rijang  
Peuget jalan atueh pudoe

Di sinoe kon tamulaan  
Syarikatan beutroh sampoe  
Tajul Muluk meunan kata  
Ubak Diwa dum sinaroe

Bak masa nyan Pari Diwa  
Peuget sigra jalan pudoe  
Jipeuteupat nanggroe raja  
Ngon siat ka hase sampoe

Jeumbatan meuh peuget sigra  
Hu meucahya langet bumoe  
Troph bak kuta Zainul Muluk  
Keunan pucok jalan pudoe

Subhanallah hireuen tahe  
Rakyat nyang le mabok keudroe  
Han tom taeu meunan rupa  
Sang syuruga uroe dudoe

Cukop hase dumpeue leungkap  
Deungon siat ka seuleusoe  
Tatkala nyan raja deelat  
Neubeurangkat deungon meuntroe

Uleebalang ireng deelat  
Lom ngon rakyat dum sinaroe  
Po teuraja neubeurjalan  
Ateueh jeumbatan intan pudoe

Deungon rakyat sikalian  
Hireuen mandang mata laloe  
Jeueb-jeueb teumpat peurheuntian  
Jeb minoman peue galak droe

Cukop leungkap dum sibarang  
Buet bangsawan nyang samlakoe  
Zainul Muluk hireuen mandang  
Han tom meunan neungieng bagoe

Raja-raja uleebalang  
Hireuen mandang mabok keudroe  
Ajab keudroe dum teurceungang  
Rasa mumang hireuen laloe

Oh troh keunan po teuraja  
Banta muda eumpeueng jinoe  
Teubiet laju po jroh rupa  
Ngon lasyeuka dum sinaroe

Oh sare troh po juhari  
Seumbah duli gaki jaroe  
Zainul Muluk tahe hireuen  
Neueu buleuen sang meuk uroe

Tajul Muluk yoh nyan neukheun  
Deelat ampon payong nanggroe  
Deelat ampon po meukuta  
Tamong lanja u meuligoe

Lon gade langkah sroe pada  
U astana tapiyoh droe  
Zainul Muluk seuot pantah  
Insya Allah bungong uroe

Tatkala nyan duli khalifah  
Tamong pantah u meuligoe  
Neupeukek le u astana  
Nibak tahta nyang meusujoe

Duek bak teumpat maseng kada  
Nyang di raja intan pudoe  
Peurmadani meuh peurmata  
Intan mutia indah han soe

Nyan keuh teumpat po teuraja  
Laen teuma ban kada droe  
Maseng-maseng neubri teumpat  
Mulia that hana bagoe

Na sikeujab piyoh sinan  
Troh hidangan keunan sampoe  
Géupeuduek le ukeue deelat  
Nyang indah that hana bagoe

Di ateueh nyan geuboh seuhab  
Bintang kasab meuh sinaroe  
Laen bandum pi hidangan  
Miyub manyang ban kada droe

Cukop hase keunan datang,  
Banta seudang angkat jaroe  
Deelat ampon po meukuta  
Sikada hase bak kamoe

Makeuen deelat peue mudahna  
Kamoe rimba tuajku droe  
Tabeue masen leukiet caye  
Bek weueh hate tanglong nanggroe

Cok boh kuyuen taboh kulet

Peunyaket jiduek bak asoe

Tuanku peusinget geupet

Makeuen siblet nibak kamoe

Teuma seuot raja deelat

Kru seumangat bungong geutoe

Nibak ulon mulia that

Goh lom lon mat rasa ka troe

Meunan narit bak sulotan

Makeuen yoh nyan dum sinaroe

Oh lheueh makeuen pinah hidang

Putroe intan peukeumah droe

Janu Hati ngon Mahmuda

Bandua ka peuhase droe

Cukop hase sianika

Laen teuma banta peuet droe

Tajul Muluk sajan raja

Bandua bak bantai pudoe

Sinan neuduek sapat dua

Laen teuma banta peuet droe

Meuntroe wazi ngon peurdana

Rab ngon raja dum sinaroe

Janu hati ngon Mahmuda

Rab ngon raja dum sinaroe

Putroe teudong nibak pinto

Leumah neueu banta peuet droe

Janu Hati bungong keundo

Sang ka hanco tuleueng asoe

Dum nan saket dalam dada

Sabab banta yoh saboh roe

Jipoh mate jienanya

Dalam rimba ka jiengkhoe

Deungon tulong Hamilah Siti  
Tuhan neubri udep dudoe  
Adat kon na sidroe umi  
Meuhat mate banta seudang

Meunan leumah dalam hate  
Han jitron le u seuramoe  
Nibak pinto sinan teudong  
Jingieng mantong raja nanggroe

Han le jijak meung sipade  
Sabab hate jih that seungkoe  
Raja kalon jroh sang kande  
Neutanyong le bak samlakoe

Hai samlakoe bungong meulu  
Soe bak pinto jeh dua droe  
Tajul Muluk peugah laju  
Nyan tuanku judo kamoe

Nyankeuh judo patek laman  
Hai jonjongan tanglong nanggroe  
Po teuraja deungo meunan  
Neukheun yoh nyan bak sambinoe

Peurab keunoe tangke bunga  
Lon ayahanda teuh hai putroe  
Zainul Muluk meunan haba  
Putroe muda seuot meunoe

Deelat ampon syahi alam  
Cit ka beuklam leumah lumpoe  
Ban jaga lam seupot clam  
Rindu deundam hana bagoe

Meujak com kaoh jonjongan  
Meung lon preh jan beungoh uroe  
Ban lon deungo ka troh duli  
Lon ka hase di meuligoe

Laju sigra lon meuhase  
Sabab hate lon teugoe-goe  
Oh troh keunoe ulon lalu  
Hireuen tahe hana bagoe

Han tom nyang ka meunoe lon eu  
Phon bak intu troh ngon jinoe  
Han tom leubeng geuboh geutah  
Han tom agah geuboh taloe

Han tom namiet duek ngon duli  
Meuseune gaki bak bantai pudoe  
Nyoe keuh baro lon eu rupa  
Hai meukuta ureueng peuet droe

Ureueng lon bloe saboh masa  
Meukuta peuduek sajan droe  
Hana patot po jonjongan  
Euncien intan bak jih beusoe

Nyan keuh sabab hai jonjongan  
Han jeuet keunan ulon peutoe  
Han lon adu batee kaca  
Ngon mutia intan pudoe

Meunan jikheun Janu Hati  
Neuseuot le raja nanggroe  
Wahe aneuk nyang juhari  
Aneuk duli banta peuet droe

Kon hai aneuk na miet gata  
Aneuk raja lam nanggroe nyoe  
Adat meung kon aneuk raja  
Pane lon ba duek sajan droe

Raja seuot meusom basa  
Dalam dada dum geutampoe  
Teuka harok po teuraja  
Sabab banta jikheun jibloe

Hana patot putroe muda  
Jibuka narit nyang seungkoe  
Adat bak jeuet lawan ngaza  
Han lon gisa le u nanggroe

Meunan leumah dalam Fuad  
Banta nyang peuet leungo asoe  
Sabab putroe ka jituri  
Seureuta lagi po samlakoe

Sabab nyan malee han sakri  
Aib keuji bak uroe nyoe  
Banta teukui jisom muka  
Putroe muda jikheun meunoe

Peue keuh guna tasom basa  
Ban peuet gata ka kutusoe  
Ka lheueh lon bloe dilee masa  
Ka sah gata namiet kamoe

Meunan narit Janu Hati  
Raja duli beungeh han soe  
Leungo badan jeueb-jeueb seundi  
Han kutukri le peuglah droe

Barangkari pi han rila  
Sabab raja akai sampoe  
Neumeung beungeh hana daya  
Neueu tandra ka meupadoe

Teuma neukheun po meukuta  
Putroe muda tapeugah proe  
Jih nyang mita ubat mata  
Ban peuet banta aneuk kamoe

Dalam kuta Pari Diwa  
Jih useuha jak cok keudroe  
Nama bungong Meungkawali  
Ayeuem cut ti di meuligoe

Nyan keuh banta nyang jak cari  
Jalan pakri takheun tabloe  
Peue alamat namiet gata  
Peugah sigra hai aneuk droe

Peugah beutrang bungong jeumpa  
Asai mula tahareutoe  
Janu Hati seuot sigra  
Peugah haba sang leukek ragoe

Deelat ampon po meukuta  
Tan meutuka ban lon kheun nyoe  
Meung ka lon kheun namiet hamba  
Cit na tanda tuanku droe

Ka lheueh lon boh dilee tanda  
Bak uram pha jih nyan peuet droe  
Meunyo tuanku han peurcaya  
yue silak pha kalon jinoe

Cit na tanda ka meusurat  
Alamat cap nama kamoe  
Lon boh nama Janu Hati  
Kalon duli mata droe

Nyokeuh ulon jipeukeuji  
Aneuk duli raja nanggroe  
Janu Hati meunan jikheun  
Bandum ureueng tahe keudroe

Banta peuet droe sangat malee  
Takue ulee ngieng bak bumoe  
Po teuraja muka reudee  
Sabab malee deungon putroe

Han sapeue le jeuet neupeugah  
Hate bicah dum geutampoe  
Neungo narit putroe indah  
Jikheun ka sah namiet jibloe

Teuma neukheun le peurdana  
Ampon hamba payong nanggroe  
Jinoe tuanku nyang meurasa  
Ban peuet banta tayue jak woe

Oh ka jarak ban peuet banta  
Tapareksa ubak putroe  
Meunan geukheun le peurdana  
Lheueh nyan teuma ka neuyue woe

Yoh nyan beudoh peuet droe banta  
Laju gisa u meuligoe  
Lheueh nyan jitron Janu Hati  
Jak com gaki raja nanggroe

Ngon Mahmuda nyang juhari  
Seumbah duli gaki jaroe  
Oh lheueh seumbah po teuraja  
Duek bandua sinan rab toe

Deungon ranub cit ka lase  
Dalam bate intan pudoe  
Putroe muda jok keuduli  
Neusambot le dua jaroe

Lheueh nyan marit putroe muda  
Ampon hamba payong nanggroe  
Ranub uteuen pineung awe  
Han meusampe rasa jih nyoe

Bek tuanku saket hate  
Bek neuruhe aib kamoe  
Cit ka maklum nibak duli  
Gampong lam gle jeuoh nanggroe

Kru seumangat bungong pade  
Bak lom mise seulaseh droe  
Bak gata na ranub uteuen  
Bak lon beuleuen sapeue tan roe

Ateueh ulee lon cut meugleueng  
Meunan neukheun raja nanggroe  
Raja pajoh ranub sigapu  
Lheueh nyan laju neutanyong proe

Wahe aneuk bungong jeumpa  
Lon ayahanda teuh hai putroe  
Rindu hate lon han tara  
Saboh haba lon ngo bunyoe

Peugah aneuk bijeh mata  
Asai punca banta peuet droe  
Nyan keuh aneuk nyang lon cinta  
Bak ayahanda neupeugah proe

Adat teukeudi lon troh masa  
Po haréuta ka keuh masa  
Janu Hati peugah yoh nyan  
Ampon laman payong nanggroe

Sidroe raja masa jameun  
Jeueb-jeueb alam meugah han soe  
Lagi gagah that beurani  
Hana sabe jeueb-jeueb nanggroe

Seureuta ade lom keuramat  
Bandum rakyat that jipujoe  
Di raja nyan wahe duli  
Na isteuri sidroe putroe

Peuet droe aneuk bak putroe nyan  
Sikalian ureueng lakoe  
Mangat hate po jonjongan  
Pujoë Tuhan malam uroe

Padum lawet teuma akhe  
Leumah pike raja nanggroe  
Bah le jinoe lon meukawen  
Putroe canden aneuk meuntroe

Lheueh nyan teuma po teuraja  
Bak peurdana neupeugah proe  
Peurdana jak keuteulangke  
Jak peugah le ubak putroe

Jeuet le laju han peue pike  
Meukawen le raja nanggroe  
Oh lheueh kawen raja deelat  
Sinan teutap malam uroe

Sajan putroe pirak lipat  
Raja deelat sinan laloe  
Manyoh meusyen hana tara  
Meuseusuka malam uroe

Hana neuwoe dalam kuta  
Suntok masa sinan dudoe  
Teukeudi po Rabbul kade  
Putroe hame lam meuligoe

Troh nam buleuen pu<sup>t</sup>roe hame  
Raja duli susah han soe  
Han tom teungeut po teuraja  
Ret ie mata geunap uroe

Sayang neuthat putroe siti  
Kadang pakri teuma dudoe  
Meunan leumah dalam hate  
Raja pangge nujum sidroe

Troh le nujum keunan teuka  
Ubak raja tanglong nanggroe  
Po teuraja beudoh laju  
Deungon teungku mumat jaroe

Teuma neuduek le bandua  
Ngon siat ka hidang sampoe  
Teungku nujum makeuen sigra  
Deungon raja bandua droe

Meunan narit Janu Hati  
Jigisa le cok rampagoe  
Pura-pura puliek pineueng  
Sinyak meugleueng utoh han soe

Zainul Muluk tanyong lanja  
Peugah sigra bungong geutoe  
Janu Hati lom riwayat  
Wahe deelat deungo jinoe

Oh lheueh makeuen raja deelat  
Tanyong leugat takbi lumpoe  
Wahe aneuk bungong jeumpa  
Peugah lanja ubak kamoe

Han tom lon ngo dilee nyang ka  
Ajab raja biet haba nyoe  
Meunan neukheun uleh raja  
Putroe muda lom hareutoe

Deelat ampon po meukuta  
Lheueh nyan raja peugah lumpoe  
Wahe teungku guree hamba  
Leumah rasia malam baroe

Han lon tupeue takbi makna  
Hai syekhuna peugah jinoe  
Uroe Jum'at oh rab paja  
Sang-sang geumpa leungo nanggroe

Teuka reudok ngon seupot klam  
Tujoh malam tujoh uroe  
Ujeuen leubat ngon geulanteue  
Kilat suseue dalam nanggroe

Kuyut hate lon hana tara  
Deungon ija ulon tob droe  
Teutap ulon dalam rukha  
Lheueh nyan jaga ulon sidroe

Oh ban jaga lon hai syaikhi  
Susah hate hana bagoe  
Saleh peue-peue keu lon neubri  
Uleh Rabbi po geutanyoe

Teungku kalon jinoe siat  
Peue bu nekmat ateueh kamoe  
Teungoh marit raja deelat  
Neumoe sangat raja nanggroe

Teuma nujum buka kitab  
Neukalon bab takbi lumpoe  
Leumah neueu dalam kitab  
Aneuk deelat lahe jinoe

Meutuah that po jroh rupa  
Jeuet keu raja jeueb-jeueb nanggroe  
Diyub langet ateueh donya  
Nyan keuh raja teuma dudoe

Raja laen taklok keunan  
Bak budiman nyang samlakoe  
Salah bacut po meukuta  
Seupot mata teuma dudoe

Oh neupandang bak aneukda  
Po teuraja roh meupaloe  
Meunan tuanku leumah nyata  
Nyan keuh makna takbi lumpoe

Ban raja ngo meunan haba  
Sret ie mata ban neumanoe  
Tatkala nyan po teuraja  
Neukheun sigra haba meunoe

Kon meutuah aneuk hamba  
That cilaka jih nyan sidroe  
Meunan neukheun po teuraja  
Ubak nisa han le neuwoe

Teutap putroe lam nazaa  
Sret ie mata geunap uroe  
Peukek peusan bak peurdana  
Beutroh raja neuwoe keunoe

Han cit neuwoe po teuraja  
Hingga nyata po samlakoe  
Oh ban lahe po jroh rupa  
Teuma sabda raja nanggroe

Hai peurdana nyang seutia  
Dalam rimba jak boh jinoe  
Bek le tinggai di astana  
Tajak lanja wahe meuntroe

Oh lheueh titah nibak raja  
Peurdana beudoh le jinoe  
Kaba laju po jroh rupa  
Deungon bunda bandua droe

Teutap sinan dalam rimba  
Ngon aneukda sabe neumoe  
Wazi meuntroe ngon bentara  
Habeh gisa bandum geuwoe

Lawet lawan akhe masa  
Po jroh rupa rayek keudroe  
Sinan teutap dalam rimba  
Neupeulara malam uroe

Teuma beudoh po teuraja  
Jak meuruska bak siuroe  
Jak meuramien paroh rusa  
Deungon tandra dum sinaroe

Uleebalang ngon bentara  
Ireng raja rame han soe  
Padumna treb dalam rimba  
Saboh rusa han meubunyoe

Daok raja mita rusa  
Meureumpok ka ngon aneuk droe  
Oh ban neungieng bak aneukda  
Seupot mata raja nanggroe

Meunan narit putroe muda  
Po teuraja hireuen laloe  
Janu Hati cok ceurana  
Pura-pura mat bak jaroe

Pajoh ranub po jroh rupa  
Po teuraja ingat keudroe  
Sang-sang manyoh dalam hate  
Neupeurab le keunan rab toe

Peugah laju bungong pade  
Lheueh nyan pike cut sambinoe  
Janu Hati seuot bagah  
Insya Allah tuanku droe

Yoh nyan putroe laju peugah  
Miseue indah hana bagoe  
Lheueh nibak nyan po meukuta  
Banta muda jiboh taloe

Ka jiikat jaroe gaki  
Lam arong gle jitiek dudoe  
Ateueh gunong phon jigule  
Lheueh jirante gaki jaroe

Tinggai sinan po jroh rupa  
Jicok raja ka jipuwoe  
Teutap buta raja deelat  
Mita ubat jeueb-jeueb nanggroe

Nibak puleh lom maken that  
Raja deelat susah han soe  
Teuma neukheun le peundita  
Ubat hana dalam nanggroe

Akan teutapi po jonjongan  
Lam nanggroe nyan ubat jinoe  
Meung kon bungong Meungkawali  
Han puleh le raja nanggroe

Barangkasoe han ek daya  
Ureueng jaga meuploh katoe  
Bak masa nyan hai meukuta  
Beudoh bungka aneuk peuet droe

Geupcuteubiet dalam rimba  
Geujak lanja malam uroe  
Mita ubat keu ayahanda  
Laju bungka dum sinaroe

Aneuk geupoh saboh masa  
Mate hana tuanku droe  
Beudoh laju bungong keumang  
Dilikot nyan jijak sidroe

Jijak laju lam kawan nyan  
Bandum rakan han jitusoe  
Padum lawet geujak sabe  
Hingga troh le saboh nanggroe

Bak nanggroe nyan le peurasan  
Peurmainan tuan putroe  
Banta peuet droe lalu keunan  
Bak peurasan malam uroe

Meuen cato peutarohan  
Mabok sinan banta peuet droe  
Hingga talo bandum gob nyan  
Habeh peukayan dum geupubloe

Habeh peukayan publoe tuboh  
Bak pha geuboh cap le putroe  
Oh lheueh geuboh cap nibak pha  
Lam peunjara geuyue pasoe

Beudoh aneuk nyang ceulaka  
Tuntut bila aduen peuet droe  
Putroe talo deungon muda  
Buet cut indah nyang samlakoe

Hingga talo putroe muda  
Peuet droe banta puleh jinoe  
Teuma beudoh po jroh rupa  
Neujak sigra laen nanggroe

Neujak mita ubat ayah  
Bungong indah ayeuem putroe  
Deungon sangat susah payah  
Jak seulaah ubat bunoe

Geucok nyawong ubak Tuhan  
Payah badan han peue kheun proe  
Meungkawali dalam taman  
Banta keunan neujak sampoe

Pihak yakin keu ayahanda  
Sambe nyawa po samlakoe  
Mangat meusampe aneuk geuboh  
Bek gob teuoh jeueb-jeueb nanggroe

Deungon limpah rahmat Rabbi  
Meungkawali troh lam jaroe  
Oh meuteumeung Meungkawali  
Neukeumbali laju neuwoe

Oh troh ubak putroe muda  
Neucok banta le ban peuet droe  
Neuwoe laju bungong kuyuen  
Deungon aduen ban limong droe

Oh troh nibak teungoh uteuen  
Peuet droe aduen jipoh adoe  
Jitiek sinan dalam gunong  
Jicok bungong le jipuwoe

Hingga puleh mata raja  
Ngon bahgia banta peuet droe  
Meunan jikheun rakyat dumna  
Get bak raja tanglong nanggroe

Tan geutupat asai punca  
Nyang buet banta meunan bagoe  
Oh nan kisah putroe muda  
Yoh nyan raja neupoh-poh droe

Dumnan mangat dalam dada  
Neungo haba nibak putroe  
Janu Hati putroe muda  
Pura-pura ngieng u bumoe

Paleng uneun cok ceureupa  
Neusom basa bungong geutoe  
Wazi meuntroe ngon peurdana  
Dum sineuna teukap jaroe

Jingo haba putroe muda  
Tan geusangka meunan bagoe  
Raja tanyong teuma sigra  
Jinoe ho ka po samlakoe

Bit ka mate dalam uteuen  
Saleh mantong udep jinoe  
Peugah laju hai cut buleuen  
Lon that hireuen hana bagoe

Teuma seuot Janu Hati  
Ampon duli payong nanggroe  
Dudoe teuma wahe duli  
Diwa Pari teuka siuroe

Nama geukheun Diwa Hamilah  
Meusyeuhurah sigala nanggroe  
Geucok banta nyang meutuah  
Sampoh darah nibak asoe

Geuboh ubat nibak badan  
Puleh pangsan po samlakoe  
Oh ban puleh nibak pangsan  
Geucok yoh nyan bapo jinoe

Geupeutron bak saboh data  
Dalam rimba peuget nanggroe  
Nanggroe indah mupeurmata  
Nyankeuh raja tuanku droe

Raja deungo meunan haba  
Laju geuwa po samlakoe  
Wahe aneuk bijeh mata  
Lon ayahanda bungong uroe

Seureuta ngon geucom geuwa  
Ngon ie mata sret meutalœ  
Han lon turi tangke nyawa  
Lon ka tuha buta tuloe

Raya salah lon aneukda  
Lon boh gata yoh saboh roe  
Luput hate silab mata  
Syetan daya ulon sidroe

Tapeumeuah bungong suson  
Nyang salah lon bak samlakoe  
Tajul Muluk pi ka neumoe  
Neukheun meunoe bak ayah droe

Meuah ampon nibak Allah  
Hana salah nibak lon nyoe  
Lheueh nyan teuma banta indah  
Seumbah ayah gaki jaroe

Wazi meuntroe ngon peurdana  
Dum sineuna beudoh jinoe  
Mumat jaroe deungon banta  
Galak suka dum sinaroe

Po teuraja mangat hate  
Aneuk han le ka troh jiwoe  
Meutuah that bungong pade  
Mangat hate lon han bagoe

Teutap raja hate dasyah  
Nyoe lon peugah po samlakoe  
Tajul Muluk jak tueng bunda  
Nyang lam rimba yoh saboh roe

Oh troh keudeh ubak bunda  
Seumbah sigra gaki jaroe  
Putroe sambot ngon ie mata  
Neucom neuwa po samlakoe

Wahe aneuk cahya mata  
Oh noe masa baro tawoe  
Dilee tajak sikleb mata  
Jak eu rusa pakri bagoe

Tapeungeut lon hai bentara  
Tabungka ho laen nanggroe  
Oh lon ingat hanco rasa  
Han meuho ka bungong geutoe

Han tom teungeut lon aneukda  
Suntok masa lam teugoe-goe  
Aneuk lutong pot boh jambee  
Aneuk cagee plah bak geutoe

Bak lon sangka bungong keumbee  
Han meuteumee tanom kamoe  
Bukan sayang lon eu azimat  
Bak lon mat-mat gadoh keudroe

Wahe aneuk meutuah that  
Grak hadarat ka troh geuwoe  
Bukon sayang meulu cina  
Angen tampa reubah keudroe

Bu meutuah bijeh mata  
Doa bunda keu samlakoe  
Teungoh bae ro ie mata  
Putroe dua troh le sampie

Peurab laju po jroh rupa  
Seumbah bunda gaki jaroe  
Teuma marit Tajul Muluk  
Bungong tajok neukheun meunoe

Wahe bunda bek le daok  
Putroe ka troh teuka keunoe  
Nyan keuh judo lon hai bunda  
Nyang ulon ba jeuoh nanggroe

Lom neumarit banta muda  
Jeh ayahanda hai po ma droe  
Putroe peurab keunan leugat  
Seumbah deelat raja nanggroe

Buet ka leupah bek le ingat  
Saket mangat bek tapakoe  
Po teuraja sambot pantah  
Bu meutuah hai sambinoe

Tapeumeuah jinoe leugat  
Lon salah that deungon putroe  
Salah ulon bungong keumbee  
Hana lon thee hai sambinoe

Bek hai judo tapeumalee  
Syeetan tipee lon saboh roe  
Meunan neukheun po teuraja  
Seuot sigra tuan putroe

Meuah bak Allah po meukuta  
Hana deesya nibak kamoe  
Bukon sayang bungong meulu  
Meujampu ngon bungong riwat

Teuduek oh noe saboh laku  
Laen buhu ulon surat  
Bungong rom bungong kasturi  
Bungong giri nyang puteh that

Muwoe kisah Meungkawali  
Deungo akhi rakan sahbat  
AMMA BAKDU hai syeedara  
Lon calitra puteh lumat

Masa jitron di rumoh tangga  
Jibungka han meuho bakat  
Padum lawet akhe masa  
Troh lam kuta raja deelat

Dalam kuta Zainul Muluk  
Keunan ka troh putik langsat  
Uroe malam hate murka  
Sabab goh troh ban nyang hajat

Goh meuteumeung nyang cok ija  
Sret ie mata ban ujeuen ret  
Nyan keuh sabab susah hate  
Tan jilahe beurangkapat

Teukeudi Allah Rabbul Kade  
Raja duli neubeurangkat  
Putroe muda sajan neuba  
Deungon guda saboh jimat

Han soe turi putroe muda  
Sabab rupa ka laen that  
Miseue agam bangon rupa  
Kon le dara rupa get that

Troh bak nanggroe mupeurmata  
Dalam kuta tamong leugat  
Raja neuek u meuligoe  
Cut sambinoe duek bak rambat

Tajul Muluk nyang samlakoe  
Jak com jaroe raja deelat  
Ban jikalon uleh putroe  
Indah han soe puteh lumat

Rindu hate hana bagoe  
Sang beujinoe laju jimat  
Lheueh nibak nyan hana lama  
Putroe dua jitron leugat

Janu Hati ngon Mahmuda  
Jitron sigra seumbah deelat  
Oh lheueh seumbah raja nanggroe  
Jiduek le toe bungong riwat

Ka jipeugah awai akhe  
Meungkawali jiriwayat  
Masa geucok dalam taman  
Le bangsawan puteh lumat

Ka jideungo sikalian  
Putroe intan duek bak rambat  
Ban jideungo meunan rawi  
Meungkawali hate mangat

Baro meuho ija cut ti  
Euncien lagi pi ka mupat  
Bungong indah pi hana le  
Ka jicuri bungong riwat

Meunan leumah dalam hate  
Lom ka lahe bak jilihat  
Lom Mahmuda puteh licen  
Ka lheueh kawen deungon deelat

Diwa Hamilah nyang peukawen  
Sabab ngeuren rupa jroh that  
Meunan leumah dalam hate  
Meungkawali jitron leugat

Sira jitron meunoe kata  
Ya Rabbana Rabbul Ibad  
Neubri beutroh pinta hamba  
Bek deuh rupa soe nyang lihat

Meunan pinta putroe indah  
Potallah kabui leugat  
Meungkawali bungong kipah  
Rupa ubah deungon siat

Jeuet keu nuri cicem ragoe  
Jipo jinoe ukeue deelat  
Tajul Muluk nyang samlakoe  
Nuri ragoe deuh neulihat

Nuri jidong nibak pinto  
Banta laju keunan peurab  
Tajul Muluk hate rindu  
Sabab neueu rupa jroh that

Banta tajak bacut-bacut  
Nyang meukeusud neuukeumeung mat  
Oh sare rab banta seudang  
Jiteureubang pantah leugat

Nuri jipo hana jeuoh  
Jipiyoh bak sagoe rambat  
Banta neujak keunan ka troh  
Nuri utoh sang ek dapat

Beudoh sinan nuri ragoe  
Ubak bumoe jidong siat  
Ka jidong di leuen meuligoe  
Hana sidroe sinan rakyat

Banta keunan ka troh teuka  
Nuri teuma pantah lumpat  
Jidong nibak cabeueng jeumpa  
Nuri rimba marit mangat

Tajul Muluk nyang jroh rupa  
Keunan lanja ka neukarat  
Keumeung leugot cabeueng jeumpa  
Nuri teuma marit leugat

Jimarit ban manusia  
Hai meukuta piyoh siat  
Deelat ampon syahi alam  
Patek laman raya hajat

Lon boh gampong tinggai makam  
Pirak hupam nyang lon sasat  
Ban meuteumeung tuanku droe  
Hate lon nyoe seunang siat

Uroe malam lon teugoe-goe  
Jeuoh nanggroe lon beurangkat  
Meunan jikheun cicem nuri  
Hireuen hate banta deelat

Tahe hireuen po juhari  
Jaroe gaki sang lam ikat  
Puleh tahe hireuen jaloe  
Po samlakoe jawueub leugat

Wahe nuri nyang that ragoe  
Pat bu nanggroe gampong teumpat  
Ho bu langkah hai ulon droe  
Nyang troh keunoe peue na hajat

Soe nyang suroh gata keunoe  
Ubak kamoe kheun beuteupat  
Teuma seuot cicem nuri  
Miseue bangsa suara mangat

Soe nyang deungo hireuen hate  
Jikheun syae utoh jithat  
Alhamdulillah pujoe seumata  
Leupah hamba lam meularat

Beurapa susah hamba beurjalan  
Habeh tahun meugantoe buleuen  
Neukek gunong turon keu hutan  
Malam dan hari dalam laparan

Wahe tuanku bijak beustari  
Hamba ini jauh seukali  
Tidak nyang suroh datang keumari  
Meulaenkan hamba manyoh kan hati

Hujan leubat turon keu bumi  
Rakyat di nanggri naek keu gunong  
Dari jaoh datang keumari  
Buatan laki jadi teubingong

Ceundana gaharu baunya harum  
Banyak urang ambil manpaat  
Rasia ini tuanku maklum  
Keureuna hamba ka teuringat

Meunan jikheun cicem nuri  
Banta ahli ka teuringat  
Tahe hireuen gaduh pike  
Weueh that hate puteh lumat

Teuma leumah dalam hate  
Get bah le lon bri nasihat  
Tajul Muluk meunan neukira  
Goh neulahe nyang muslihat

Oh ban keumeung buka babah  
Cicem indah beuet hekeumat  
Jeuet le rupa miseue insan  
Indah han ban sang malakat

Ka teudong bak cabeueng jeumpa  
Putroe muda rupa jroh that  
Soe nyang kalon reubah pangsan  
Cahya badan hu meukilat



Tajul Muluk sang ka gila  
Nyum beuneuwa laju leugat  
Sangat rindu dalam hate  
Meungkawali indah sangat

Hana sapeue jeuet marit le  
Neungieng sabe bungong riwat  
Meungkawali marit meunoe  
Deungo kamoe wahe deelat

Bukon sayang lon eu peutoe  
Han le asoe dum lat batat  
Manyoh meusyen malam uroe  
Lon com keudroe bungong riwat

Akan teutapi hai meukuta  
Hana rila bak hadarat  
Nyang mangat bee bungong peukan  
Nyang mangat nan bungong riwat

Neubri izin hai jonjongan  
Patek laman woe u teumpat  
Sabab ka treb cre di nanggroe  
Izin lon woe wahe deelat

Bungong jeumpa bee meudru-dru  
Bungong meulu puteh lumat  
Lon beurjalan jinoe laju  
Hai tuanku do'a seulamat

Meunan narit Meungkawali  
Jieu duli cicem siat  
Lheueh nibak nyan po juhari  
Cit gadoh le deungon siat

Sikleb-siklen han meuho ka  
Putroe muda miseue kilat  
Tajul Muluk nyang jroh rupa  
Sret ie mata ban ujeuen brat

Neutumbok droe banta muda  
Sang ka gila bungong riwat  
Sira neumoe neukheun yoh nyan  
Wahe Tuhan putoh rahmat

Goh lom sapeue lon peugah ban  
Putroe intan gadoh bakat  
Ya ilahi po lon Tuhan  
Putroe intan neubri lon lihat

Adat han treb sikutika  
Apon mata lon hadarat  
Bukon sayang aneuk rusa  
Sret lam paya bak jilumpat

Wahe putroe nyang jroh rupa  
Pakon gata gadoh bakat  
Teungoh bae po samlakoe  
U meuligoe neuek leugat

Neucok ija ka teutob droe  
Neueh sidroe putik langsat  
Uroe malam neumoe tukha  
Sayang raya soe nyang lihat

Sianeuk bu tan neurasa  
Hate luka banta deelat  
Putroe dua susah hate  
Jieu duli lam meularat

Teuma marit Janu Hati  
Pakon duli susah neuthat  
Peugah bak lon tuanku droe  
Peuena paloe wahe deelat

Bek na susah hai meukuta  
Meung na hamba mantong hayat  
Janu Hati gusuek dada  
Mahmuda jak peuget ubat

Tajul Mūluk tan le haba  
Sret ie mata ban ujeuen brat  
Tan neulahe salah beuna  
Putroe dua susah jithat

Meungkawali putroe muda  
Jiwoe lanja troh u teumpat  
'Oh troh jiwoe putroe indah  
Hamilah jimeuhei leugat

Troh le keunan Diwa Hamilah  
Bak cut indah sujud leugat  
Meungkawali marit bagah  
Hai Hamilah nyang khianat

Hana patot buet di gata  
Tapeutuka ban amanat  
Nyan dum di lon kuusaha  
Keu gata lon bri deurajat

Lon pubuet got jeuheut balah  
Hai Hamilah han taingat  
Hana patot meunoe bagoe  
Gata sidroe nyang lon harap

Tapeutamong manusia  
Bungong hamba ka jiangkat  
Habeh euncien deungon ija  
Lom ngon hamba teuhah eerat

Padum rugoe deungon malee  
Buet meulintee kah he laknat  
Pihak ka jeuet keu meulintee  
Patot keu kee kakhianat

Kabri bungong nyang lon rindu  
Meung sigeutu han kaingat  
Jinoe patot kausaha  
Bek kusula kah hai laknat

Meunyo hana ek tapeuna  
Jinoe sigra kuboh pangkat  
Nyang cok bungong deungon ija  
Beutroh taba deungon siat

Diwa Hamilah seuot sigra  
Ampon hamba pirak lipat  
Meung udep gohlom mate  
Beuek hase ban nyang hajat

Bek hai putroe marah hate  
Seubab lon bri nyan hekeumat  
'Oh ban lon eu po samlakoe  
Miseue uroe rupa got that

Patot judo po sambinoe  
Meunan bagoe ulon ibarat  
Keu meulintee lon tueng dudoe  
Mangat sinoe deuh jilihat

Meuka jieu tuan putroe  
Meuhat dudoe roh teuingat  
Meunyo ka treb dong bak kamoe  
Tuan putroe deuh jilihat

Meunyo han ek jitheuen hate  
Keunoe troh le deungon siat  
Bahle jinoe rugoe hareuta  
Dudoe teuma laba lipat

Miseue ureueng maniaga  
Boh beulanja dilee siat  
Meuna umu dudoe teuma  
Muploh laksa laba lipat

Meunan miseue bungong keumee  
Piyoh dilee bek beungeh that  
Bek marah that po cut ampon  
Seubab di lon teupat kasad

Lon peugot buet got cut meuubon  
Teuma keu lon takheun laknat  
Beuthat taeu han got rupa  
Dalam dada puteh that-that

Meukon meunan han lon lahe  
Tapoh mate lon ngon siat  
Pakon po cut marah hate  
Han tapike nyang muslihat

Saket payah lon usaha  
Lon jak mita keu cut intan  
Nyan dum di lon hajat cinta  
Meunoe teuma nyang lon dapat

Meunyo meunan po jroh rupa  
Bahle hamba cre di teumpat  
Bahle lon jak peutroh hate  
Bahle mate baranggapat

Diwa Hamilah meunan haba  
Putroe muda seuot leugat  
Di lon mantong kumeuseunda  
Di gata ka amarah that

Hai Hamilah nyang seutia  
Pakon gata beungeh sangat  
Meunyo gata taboh nanggroe  
Ulon sidroe siploh lipat

Adat lon duek di meuligoe  
Hate lon nyoe hana mangat  
Meunyo han troh ban lon cinta  
Lon bungka han meuho bakat

Bitpi taeu ulon sinoe  
Nyawong lon nyoe saboh teumpat  
Lon peujok droe ubak Tuhan  
Meung lon preh jan troh malaikat

Meuna gaseh nibak gata  
Cuba mita keu lon ubat  
Meunan narit putroe indah  
Hamilah beudoh le leugat

Jiteureubang sangat tajam  
Troh lam hutan han jan siat  
Tamong laju dalam kuta  
Meuteumeung ka puteh lumat

Tajul Muluk panyot kande  
Ubak umi sujud leugat  
Diwa Hamilah jimarit le  
He boh hate putik langsat

Beudoh laju he aneukda  
Keudeh sigra tabeurangkat  
Jak pot aneuk bungong jeumpa  
Yoh goh mala jak cok leugat

Yoh goh mala nibak tangke  
He boh hate jak beurangkat  
Teuma seuot banta muda  
Bak lon bunda ban nyang pakat

Ban nyang titah nibak bunda  
Nibak hamba ikot pakat  
Akan teutapi wahe po ma  
Bak ayahda lon woe siat

Lon jak lakee meuah deesya  
Bek meureuka bak halarat  
Tajul Muluk beudoh sigra  
Bak ayahda neuwoe leugat

'Oh troh keudeh bak meukuta  
Peugah haba meung beurangkat  
Idin keu lon he ayahda  
Lon meung bungka 'euoh teumpat

Nyan pat kuta deungon mideuen  
Neukeurajeuen ban nyang adat  
Bek na aeb deungon keuji  
Wahe doli beule ingat

Nyan pat judo lon dua droe  
Tuanku droe ingat beuthat  
Teuma neukheun ubak judo  
Bungong kundo lon jak siat

Lon neujak tueng uleh ibu  
Saleh peue-peue na meularat  
Saleh peue na teuka mara  
Idin gata bungong riwat

Meunan neukheun banta indah  
Han neupeugah jalan teupat  
Neusom basa hana lahe  
Bek weueh hate cut ti kasab

Habeh wasiet banta seudang  
Beudoh rijang le beurangkat  
Troph u mideuen banta langkah  
Cut Hamilah sambot leugat

Bapo laju dalam awan  
Hingga datang troh u teumpat  
Troph lam kuta Meungkawali  
Ka jibeuet le saboh hekeumat

Jeuet le rupa miseue nuri  
Po tallah bri troh ban hajat  
Bulee kuneng ban meuh meuntah  
Paroh mirah hitam kilat

Lom azimat nibak dada  
Indah rupa sang malakat  
Jipeulheueh le keunan bagah  
Diwa Hamilah jiwoe leugat

Cicem nuri indah han soe  
Lam meuligoe jipo teupat  
Nibak tingkap jidong keudroe  
Sinyak putroe deuh jilihat

Putroe jak le keunan rap toe  
Po sambinoe hate mangat  
Jikeumeung drob nuri raghoe  
Jipo sampoe troh bak rambat

Putroe meuhei le dendayang  
Tadrob kaman he da siat  
Troh dendayang keunan ka toe  
Jipo jinoe le bagah that

Ka jidong di leuen istana  
Dayang dumna keunan peurab  
Jipo sinan nuri raghoe  
Lam meuligoe jipo teupat

Ka jidong lom nibak bunoe  
Tuan putroe beudoh leugat  
Tan jipo le cicem nuri  
Cut putroe ti hate mangat

Jicok cicem mat di jaroe  
Po sambinoe galak jithat  
Nuri indah tan teuladan  
Miseue intan hu meukilat

Rindu hate pirak hupam  
Uroe malam cit lam jimat  
Teukeudi po 'Azizon Ghafor  
Leumah jieu saboh teumpat

Nibak takue cicem nuri  
Cut putroe ti laju jimat  
'Oh ban jimat surat indah  
Rupa ubah deungon siat

Muwoe rupa banta seudang  
Cahya badan hu meukilat  
Tajul Muluk nyang samlakoe  
Sinyak putroe that beurminat

Sang beujiwa le ngon jinoe  
Tuan putroe gadoh ingat  
Rindu hate galak mate  
Han ek saba puteh lumat

Laju jicom po samlakoe  
Sinyak putroe sinan ladat  
Pihak napsu gadoh malee  
Bungong keumbee tueng ibarat

Han le pike nyan keu malee  
Ka meuteumee bacut nekmat  
Teuma marit Meungkawali  
Ampon kami wahe deelat

Tan lon tusoe ampon doli  
Lon kheun nuri rupa got that  
Pakon tuanku peungeut ulon  
Meuah ampon wahe deelat

Kayee raya jroh hijo on  
Meuhimpone rampuneue le that  
Bek neuhaloh nyang salah lon  
Meuah ampon wahe deelat

Bukon sayang meulu cina  
Lam piala hana soe mat  
Tapumeuah po meukuta  
Saboh haba lon riwayat

Aneuk got-got di cong ara  
Patah pha keunong hekeumat  
Hana patot po meukuta  
Lon jak mita jeueb-jeueb teumpat

Leuek bangguna di cong kayee  
Jiseumalee le siwah barat  
Lon tuanku seb ka malee  
Dum ka meuthee teuhah urat

Meuna hajat pot boh pupu  
Tajak laju gampong barat  
Peue na salah he tuanku  
Peugah laju nyang muslihat

Bukon sayang boh peungata  
Dalam bangsa jiduek ulat  
Neucok euncien deungon ija  
Teutap hamba lam meularat

Neucok bungong dalam tangan  
Lheueh nibak nyan neuwoe leugat  
Hana patot he jonjongan  
Keu ulon han tatem ingat

Trieng beutong reubong lam tanoh  
Sithon saboh teubiet u lua  
Hajat ka troh napsu ka peunoh  
Patot neuboh lon he deelat

Bukon sayang cintra mula  
Cicem pala po u barat  
Habeh rasa lon peurasa  
Meuraba-raba jeueb-jeueb teumpat

Bukon sayang lon eu pade  
Hujeuen han le mate le that  
Jeueb-jeueb gampong lon teubade  
Seubab pie ampon deelat

Tuanku teutap di meuligoe  
Sajan putroe puteh lumat  
Lon teueng bayeueng jeueb-jeueb nanggroe  
Malam uroe lam meularat

Sampoe lon jak geubeue guda  
Bak ayahda ampon deelat  
Rindu hate lon han tara  
Nyang cok ija lon meung lihat

Ngon seubab nyan po meukuta  
Tan lon kira šaket mangat  
Nasib tuboh lon ka meunan  
Ulon paban grak halarat

Dumnan di lon meuraba-raba  
Siblah mata han soe lihat  
Han neusayang ube seuma  
Seubab ka na pirak lipat

Meunyo ka na beude dama  
Keupeue guna saruek ulat  
Meunyo ka na putroe muda  
Keupeue guna nyang po ubat

Asai bungong ka lam jaroe  
Ka troh sampoe ban nyang hajat  
Meunan pike tanglong nanggroe  
Pihak kamoe hana pangkat

Lagi ulon kon biek po cut  
Panekeuh jeuet peutimang adat  
Meunan jikheun sambinoe cut  
Ie mata sret ban ujeuen brat

Sira marit sira jimoe  
Sinyak putroe rugha sangat  
Tajul Muluk nyang samlakoe  
Jaweueb meunoe pantah leugat

Wahe putroe tangke nyawa  
Bek le keuh na tariwayat  
Tanoh lhok tapula lipah  
Pula lawah di ateueh jeurat

Tajul Muluk jeuet troh langkah  
Putroe indah keumeung hajat  
Bukon sayang lon eu lada  
Pucok hana soe tem ikat

Meuna mantong udeb nyawa  
Lon umpama pirak lipat  
Laba rugoe han lon weueh le  
Meuka mate ka lheueh adat

Nyawong tuboh darah gapah  
Lon publoe sah keu halarat  
Lon boh gampong dengan nanggroe  
Sinyak putroe lon meuhajat

Lon seutot wasiet saboh roe  
Wasiet putroe bungong riwat  
Masa teudong di cong jeumpa  
Habeh rasa saket mangat

Nyankeuh sebab troh lon teuka  
He meutia puteh lumat  
Bak lon sangka ek meusampe  
Na ban janji pirak lipat

Hana lon thee po juhari  
Teuka beunci troh u teumpat  
Bak pihak lon kureueng bangsa  
Ngon gata han sabe pangkat

Jinoe nyang got po jroh rupa  
Idin gata lon beurangkat  
Lon dong sinoe hana laba  
Sebab gatapi ka luat

Got keuh jinoe bahle lon jak  
Bek jeuet rusak he cut ubat  
U gampong pi han le lon woe  
Bak ri bagoe hana mangat

Lon dong sinoe hana meukri  
Bahle mate baranggapat  
Meuka rusak papeuen bahtra  
Padumkeuh na tabeurangkat

Meuka beunci po istana  
Padumkeuh na teuka mangat  
Nibak dudoe teuka cupa  
Bah lon bungka yoh goh lom brat

Bukon sayang cicempala  
Bulee dada sion sapat  
Seulamat tinggal bungong jeumpa  
Lon bungka do'a seulamat

Tajul Muluk beudoh pantah  
Keumeung langkah yoh nyan leugat  
'Oh ban sare neubet langkah  
Putroe indah laju jimat

Jimat laju gaki banta  
Ngon ie mata ban ujeuen brat  
Putroe jimoe hana reuda  
Sangka raja gadoh ingat

Sira jimoe jikheun yoh nyan  
Hai junjungan piyoh siat  
Takoh igeueh keu deungong suwe  
Di ateueh gle peugot teumpat

'Oh lheueh neupoh lon bu mate  
Jeuet hai doli neubeurangkat  
Meukon meunan deelat ~~pon~~  
Han lon bri tren meung 'oh rambat

Meunan jikheun bungong sukon  
Droe jisumpom ateueh deelat  
Tajul Muluk deungo meunan  
Hana lawan hate mangat

Meunyo cit na ban tapeugah  
Silangkah han lon beurangkat  
Jibeudoh le putroe muda  
Jicinta saboh hekeumat

Deungon tulong Tuhan Nyang Esa  
Teungku Tapa troh le leugat  
Sajan neuba ngon dua droe  
Nyan pi meusoe malem utat

Teuma marit sinyak putroe  
Ulon teunyoe raya hajat  
Neupeunikah ulon jinoe  
Ngon samlakoe aneuk deelat

Lheueh wakilah nibak putroe  
Teungku jinoe,marit leugat  
Insya Allah bungong geutoe  
Tuhan sidroe putroe hajat

Yoh nyan teungku kheun bismillah  
Seuot pantah bungong riwat  
'Oh lheueh ijab kabui nikah  
Teungku syiah neuwoe leugat

Syiah neutren laju neuwoe  
Tinggai putroe deungon deelat  
Teutap sinan tuan putroe  
Ngon samlakoe pirak lipat

'Oh ka uroe jeuet keu nuri  
Malam hari laen pakat  
'Oh ka seupot jilop hari  
Sajan cut ti sinan sapat

Geumeucom-com geumeuwa-wa  
Peue nyang suka pubuet leugat  
Suntok sabe meusuka-suka  
Putroe muda deungon deelat

Cit ka maklum he syeedara  
Asoe kaya teumon bu leukat  
Ka na nekmat bandua droe  
Keudeh keunoe meugaseh that

Hingga teuma padum lama  
Ubak bunda meuthee leugat  
Lompih meugah bak ayahda  
Putroe muda buet jeuheut that

Teuma marit poteu raja  
Ubak nisa neukheun leugat  
Meungkawali nyang jroh rupa  
Dalam kuta laen pakat

Cuba tajak jinoe sigra  
Tapareksa peue alamat  
Kadang cit na ban gop peugah  
Tajak pantah bek le lambat

Hamilah Katon beudoh pantah  
Bak cut indah jijak leugat  
Nyankeuh bunda Meungkawali  
Judo doli nyang indah that

Jijak laju u istana  
Bak aneukda bungong riwat  
'Oh troh keudeh u meuligoe  
Beudoh putroe puteh lumat

Jijak seumbah teuot bunda  
Ban nyang kada bri horeumat  
Teuma geuduek le bandua  
Ateueh geuta nyang indah that

Hamilah Katon peugah haba  
Ngon aneukda bungong riwat  
Padumna treb tan tagisa  
Saleh peue na nyang meularat

Hanco hate dalam dada  
Aneukda han tom lon lihat  
Nyankeuh sebab lon jak keunoe  
He aneuk droe putik langsat

Ayah gatapi ka wawoe  
Di lon sidroepi tan mangat  
Saleh peue na teuka bala  
Meunan rupa bak lon lihat

Peue na salah he aneukda  
Peugah sigra pirak lipat  
Soe na carot ngon dhot gata  
Bak bunda han tawoe siat

Teuma jaweueb putroe muda  
Pakon bunda sosahneuh that  
Hana saket lon hai bunda  
Cit lam teuga badan sehat

Hamilah Katon that ceureudek  
Jitilek bak putik langsat  
Di miyub phon troh u ateueh  
Jikalon deuh nyan alamat

Jeuep-jeuep teumpat habeh ubah  
Muka ubah lagee pucat  
Ujong mata pi ka beukah  
Dada mirah hu meukilat

'Oh ban jieu meunan ulah  
Di Hamilah beungeh jih that  
Akan teutapi hana lahe  
Bek weueh hate putroe ubat

Hamilah Katon tamong lanja  
Dalam kama keudeh leugat  
Meungkawalipi seureuta  
Sajan bunda jibeurangkat

Muka pucat hate lia  
Seubab cintra sinan meulhat  
'Oh troh keunan dalam kama  
Jipareksa jeuep-jeuep teumpat

Jijak mita ureueng lakoe  
Jeueb-jeueb sagoe jikalon pat  
Tan meuteumeuengpi meusidroe  
Tuan putroe sosah jithat

Lheueh nibak nyan teuma laju  
Leumah jieu cintra meulhat  
Dalam cintra cicem nuri  
Putroe sudi teuma leugat

Pane cicem that juhari  
He boh hate rupa got that  
Jawueub putroe Meungkawali  
Ubak umi jiriwayat

Lon peulara he bunda droe  
Seubab raghoe galak lon that  
Hingga teuma malam uroe  
Sinyak putroe eh bak teumpat

Bitpih jieh putroe muda  
Dalam dada han le mangat  
Seubab jieh sajan bunda  
Bandua sinan meusapat

Han le teungeut Meungkawali  
Keu nuri sabe teuingat  
Hamilah Katón utoh han soe  
Peuteugeut droe jipeurasat

Bak jisangka po sambinoe  
Bunda sidroe teungeut mangat  
Nakeuh watee teungoh malam  
Pirak hupam beudoh leugat

Jitamong laju lam kama  
Peuhah cintra nuri got that  
Ngon azimat ka jileukang  
Banda seudang teudong meuhat

Putroe seumbah nibak teuot  
Banta sambot ngon horeumat  
Teuma piyoh po jroh rupa  
Bandua sinan meusapat

Putroe suleueng ranup sigapu  
Teuma meusu banta deelat  
Wahe judo bungong meulu  
Nyoe lon meusu ngon nasehat

Bak lon peunyum wahe putroe  
Bunda sidroe amarah that  
Lon eu bunda bunoe teuka  
Jeh lam kama teungeut mangat

Nyankeuh sebab geujak keunoe  
Ulon sidroe geujak sasat  
Ka deuh lon eu bunoe uroe  
Jeueb-jeueb sagee geumita pat

Bak pike lon bungong keumbee  
'Oh meuteumee jeuet meularat  
Saleh ulon roh mupaloe  
Kadang lon nyoe nyawong teurangkat

Meunan leumah dalam hate  
Bungong pade pakri pakat  
Di lon putroe nyang meurasa  
Bah lon bungka dilee siat

'Oh ka puleh hate bunda  
Ulon gisa keunoe leugat  
Meukon meunan po jroh rupa  
Akhe masa jeuet meularat

Miseue narit ureueng tuha  
He adekda ingat beuthat  
Turot napsu malee han le  
Turot hate nyawong teurangkat

Peuturot angen putoh taloe  
Seulayang nyoe sret han mupat  
Seulayang sret han meuho le  
Reuloh hate ureueng nyang mat

Meunan adek geuboh mise  
He putroe ti puteh lumat  
Ulon peugah laba rugoe  
Maklum keudroe putik langsat

Toh nyang mangat nibak gata  
He adekda jaweueb leugat  
Di lon judo tan lon kira  
Ikot saja ban nyang pakat

Beuthat mate lon troh masa  
He adekda han lon ingat  
Meuka seunang nibak gata  
Rugoe laba rela lon that

Tajul Muluk meunan haba  
Putroe muda jaweueb leugat  
Takoh dandan pula dandan  
Di yub asan sinyak pot kulat

Meunyo mate ampon laman  
Lonpi sajan lon beurangkat  
Meunyo meunan he adekda  
Ban nyang kada bak halarat

Adat mate sampoe masa  
Deungon gata bungong riwat  
Bukon sayang putik kumbang  
Lam keunarang ka meuulat

Adat teukeudi lon geubuang  
He buleuen trang do'a seulamat  
Tajul Muluk meunan haba  
Beudoh lanja eh bak teumpat

Sajan putroe cahya mata  
Bandua sinan meusapat  
Teungoh-teungoh meusuka-suka  
Teuka bala nyang raya that

Hamilah Katon keunan teuka  
Jieu rupa banta deelat  
'Oh ban jieu banta muda  
Beungeh raya muka hu that

Jijak laju keunan ka toe  
Po samlakoe laju jimat  
Sira jimat po juhari  
Jideumpek le su raya that

Jimarit le su meutaga  
He ceulaka kah nyang laknat  
Hana patot buet kah meunoe  
Deungon putroe kaeh sapat

Aneuk raja nyang juhari  
Kajak taki wahe laknat  
Beurani that keunoe teuka  
Ubak dewa nyang beurpangkat

Han kathee droe manusia  
Nibak kada nyang hina that  
Kupoh mate kah uroe nyoe  
Aneuk kamoe kapeucacat

Cuba peugah ubak kamoe  
Peue buet keunoe kabeurangkat  
Tajul Muluk jawueb sigra  
Meunoe haba banta deelat

Meunyo cit na bungong jeumpa  
Kumbang dumna troh meusapat  
Meunyo cit na putroe muda  
Nakeuh teuka aneuk deelat

Han peue tanyong panyang raya  
Ban nyang suka pubuet leugat  
Tajul Muluk meunan peugah  
Hamilah ka beungeh jihthat

Hamilah Katon that amarah  
Jicok bagah banta deelat  
Dalam awan jisrom sigra  
Bintang kala sayangteuh that

Gadoh ingat bungong pade  
Sang ka mate putik langsat  
Nibak adat taeu lahe  
Bungong pade han le hayat

'Oh lheueh jisrom po samlakoe  
Sinyak putroe jimat leugat  
Ka jiikat gaki jaroe  
Jikheun meunoe bak cut ubat

Hana patot he aneukda  
Manusia tameuhajat  
Tabri aeb nama diwa  
Raja-raja nyang mupangkat

Sinyak putroe han le haba  
Seubab bundajih beungeh that  
Hingga jiba putroe muda  
Bak ayahda keudeh leugat

'Oh troh keudeh bak khalifah  
Jipeugah haba nyang teupat  
Hamilah Katon nyang seumeugah  
Mula Fasyah deungo leugat

Ban geudeungo meunan haba  
Beungeh raya raja deelat  
Bit paleh that kah ceulaka  
Kemeuhawa nyang kon teumpat

Jinoe kubri keu kah seksa  
Lam peunjara kuyue ikat  
Sujud putroe Meungkawali  
Com di gaki raja deelat

Meuah ampon wahe abi  
Ban nyang rali bak lon mangat  
Ban nyang suka nibak doli  
Hudep mate grak halarat

Akan teutapi he ayahda  
Buet lon peuna kon buet jahat  
Ka lheueh tuanku lon meunikah  
Hana salah ube lalat

Lagi gagah that beurani  
Le that sakti aneuk deelat  
Beuthat neusrom dalam awan  
Di lon tuan judo meuhat

Bek antara raja nanggroe  
Baranggasoe han troh dapat  
Nyankeuh sebab lon meunikah  
Beuthat marah ampon deelat

Bek antara neuboh rante  
Adat mate bak lon mangat  
Laba rugoe hudep mate  
Nyankeuh doli nyang lon hajat

Beuthat neusrom dalam laot  
Neusanbot le malaikat  
Insya Allah wahe abi  
Keumbali keunoe lom meuhat

Meunan ayah neueu lahe  
Bek beuncu le bagah that-that  
Dudoe telah tuanku droe  
'Oh troh neuwoe pirak lipat

Meunan jikheun sinyak putroe  
Raja nanggroe lom beungeh that  
Geucok putroe nyang jroh rupa  
Lam peunjara pasoe leugat

Sinan teutap putroe muda  
Ro ie mata ban hujeuen brat  
Bukon sayang bungong meulu  
Meatabu bak sagoe rambat

Sayangteu that meuna taeu  
Bintang timu jiboh lam glap  
Bukon sayang bungong kundo  
Jimoe bae dalam ikat

Putroe jimoe that meusyu-syu  
Soe deungo su mayoh ladat  
Bukon syang bungong jeumpa  
Habeh mala hana soe mat

Wahe judo ayeuem mata  
Neubungka han meuho bakat  
Meunan-meunan dum jiato  
Sebab judo han le mupat

Jeuetkeuh 'oh nan haba bae  
Laen lom le han ek surat  
Tapumeuah he syeedara  
Malam jula teungeut lon that

Singoh uroe lom lon mula  
Meuna kuasa bri halarat  
Puteh-puteh bungong jeumpa  
Nyang that gura bungong peukan

'Oh ban beungoh uroe faja  
Laju sigra lon mat kalam  
Tan peue laen nyang lon kira  
Cit keu banta nyang ka hilang

Sayangteu that aneuk raja  
Jigeulawa dalam awan  
Deungo beugot wahe akhi  
Nyoe ulon ci mula kalam

Nyoe baro phon lon mulai  
Lheueh jeb kipi saboh cawan  
Keupeue laen tan lon kira  
Asai ka na kipi hitam

Cit ka laju teubleut mata  
Ubit raya wahe rakan  
AMMA BAKDU laen ulah  
Muwoe kisah banta seudang

Tajul Muluk nyang bahgia  
Jigeulawa dalam awan  
Han saho sret banta muda  
Dalam hawa meutang-ilang

Gadoh ingat po jroh rupa  
Bak nyum rasa nyawong hilang  
Keudeh keunoe meugisa-gisa  
Angen peuba ban seulayang

Manyang leupah jigeulawa  
Ureueng donya han deuh pandang  
Tujoh buleuen dalam hawa  
That seungsara muda seudang  
Teukeudi Po Tuhan Ma'bud  
Sret lam laot bungong karang  
Tajul Muluk yoh nyan ka sret  
Dalam laot meugeulumbang

'Oh sare ka teubleut mata  
Laot raya deuh neupandang  
Tajul Muluk nyang meutuah  
Neuhei Allah hana reunggang

Wahe Tuhan Po lon sidroe  
Hambateu nyoe gaseh sayang  
Neupeulara he ya Rabbi  
Bek roh neubri nyawong hilang

Ngon keuramat dumna syeekhi  
He ya Rabbi neupeuriwang  
Wahe Tuhan nyang that gani  
Meungkawali bri lon pandang

Adat teukeudi lon troh masa  
Bahle sama putroe intan  
Adat han trep siklep mata  
Ya Rabbana keu lon neupulang

'Oh lheueh lon eu putroe muda  
Ulon rela nyawong hilang  
Meunan neukheun po jroh rupa  
Troph le teuka sikrak batang

Hanyot laju u keue banta  
Neuek lanja le neupasang  
Bak masa nyan bungong riwat  
Dalam bakat balek batang

Ulee ili dalam bakat  
Banta deelat lam geulumbang  
Bitpih meunan lam meularat  
Nyang teuingat putroe bintang

Dumnan gaseh dalam hate  
Meungkawali putroe seudang  
Bit ka dumnan wahe sampee  
Hana geuthee nyawong hilang

Meuna mantong mumot tuboh  
Putroe haloh han putoh sayang  
Adat meukon dumnan rasa  
Bah rimueng ba sinan ceukang

Meuna umu Tuhan neubri  
Nakeuh lagi 'oh ion riwang  
Tajul Muluk seungsara that  
Dalam bakat ngon geulumbang

Teukeudi Allah Po Nyang Ahad  
Sret u darat banta seudang  
'Oh sare troh bineh pasi  
Po juhari teungoh rijang

Di yub aron neupiyoh le  
Badan lape bungong karang  
Sang han ek le meugrak gaki  
Po juhari meutang ilang

Teuma neujak banta muda  
Rot lam rimba neupeuseunang  
Sira neujak neumoe bae  
Soe deungo su teuka sayang

Neuseubot nan Meungkawali  
Baten lahe keunan pandang  
Neukheun syae tan beureunti  
Bak laku ri akai hilang

Ubak Tuhan mohon bantu  
Ya Tuhanku gaseh sayang  
Meunan neukheun po samlakoe  
Sira neumoe hana reunggang

Neujak sidroe ret lam rimba  
Uroe seunja ka meusu glang  
Laju neujak hana teudoh  
Hingga troh yub kayee manyang

Ban meuteumeung kayee raya  
Cut banta neupiyoh rijang  
Tajul Muluk nyang bahgia  
Neuek lanja kayee seuntang

Peugot teumpat di cong kayee  
Bungong keumbee piyoh rijang  
Keutam keutum patah kayee  
Bungong keumbee hate reunggang

Geunta hate po jroh rupa  
Saleh bala nyoe ka datang  
Neupadok lon ya Rabbana  
Nibak bala jen edeurang

Ya Tuhan ku neupeujeuoh  
Bek neubri troh keunoe datang  
Meunan neukheun puteh leusoh  
Nagaka troh keunan rijang

U yub kayee jijak lanja  
Naga raya deuh neupandang  
Tajul Muluk pirak lipat  
Neiduek teutap di cong seuntang

Bak masa nyan naga raya  
Jingieng sigra ban saboh nyan  
Wie ngon uneuen jipareksa  
Sinan lingka kayee seuntang

Hana saboh pi meung sapat  
Malakat jiulee rijang  
Jikeubah le that meuteuntee  
Bak peureudee kayee manyang

Malakat jroh hana tara  
Hu meucahya ban buleuen trang  
Nyan dum seupot glap gulita  
Peungeuh rimba lam geumilang

Peugot teumpat di cong kayee  
Bungong keumbee piyoh rijang  
Keutam keutum patah kayee  
Bungong keumbee hate reunggang

Geunta hate po jroh rupa  
Saleh bala nyoe ka datang  
Neupadok lon ya Rabbana  
Nibak bala jen edeurang

Ya Tuhan ku neupeujeuoh  
Bek neubri troh keunoe datang  
Meunan neukheun puteh leusoh  
Naga ka troh keunan rijang

U yub kayee jijak lanja  
Naga raya deuh neupandang  
Tajul Muluk pirak lipat  
Neudeuk teutap di cong seuntang

Bak masa nyan naga raya  
Jingieng sigra ban saboh nyan  
Wie ngon uneun jipareksa  
Sinan lingka kayee seuntang

Hana sabohpi meung sapat  
Malakat jiulee rijang  
Jikeubah le that meuteuntee  
Bak peureudee kayee manyang

Malakat jroh hana tara  
Hu meucanya ban buleuen trang  
Nyan dum seupot glap gulita  
Peungeuh rimba lam geumilang

'Oh lheueh naga keubah malakat  
Jijak leugat ngieng binatang  
Keudeh keunoe jijak mita  
Deukekjh raya naga suang

Tajul Muluk neukalon le  
Dalam hate meugeulumbang  
Seubab rindu malakat nyan  
Masa nyan sang neucok rijang

Pakri lon cok malakat nyoe  
Yoh goh jiwoe naga suang  
Nyang got jinoe bah lon saba  
Lon bicara jalan seunang

Meunan pike po jroh rupa  
Neueu lanja ulee mumang  
'Oh nan teutap puteh leusoh  
Naga bioh le jiriwang

Cok malakat nyang seumeuloh  
Laju jibloh dalam padang  
Tinggai banta sidroe sinan  
Pike yoh nyan pakri jalan

Seubab rindu keu malakat  
Tamita pat jalan seunang  
Pakri neucok nyan malakat  
Banta ingat uroe peutang

Hingga beungoh le ngon uroe  
Po samlakoe tren le rijang  
Tanoh leuhop neujak mita  
Peukek lanja u cong seuntang

Cukop hase sianeka  
Uroepi ka laju hilang  
Teuka seupot glap gulita  
Banta muda hate seunang

'Oh ban sare leupah seunja  
Troh le naga keunan datang  
'Oh troh keunan naga raya  
Keumala jikeubah rijang

Naga jijak sinan lingka  
Jijak mita lutong musang  
Tajul Muluk pirak lipat  
Malakat sabe neupandang

'Oh ban sare leupah naga  
Leuhop nyang na neutiek rijang  
Leuhop ka sret ateueh malakat  
Deungon siat cahya hilang

Gadoh peungeuh ka seupot that  
Naga karat le jiriwang  
Jipoh-poh droe naga raya  
Hingga fana nyawong hilang


Naga mate yoh nyan sigra  
Banta muda neutren rijang  
Cok malakat po samlakoe  
Peuke jinoe u cong seuntang

Bak masa nyan po jroh rupa  
Deuh suara neudeungo trang  
Saboh cicem di cong kayee  
Meusilee bak cabeueng seuntang

Cicem bayeuen nan geuuroh  
Aneuk saboh mantong seudang  
Jimeututo deungon bunda  
Ngon suara that meulumbang

Pakon he ma treb that neuwoe  
Ulon sidroe hana seunang  
Deuke deungon grah hana bagoe  
Seubab trep woe ma jeunulang

Han neusayang keu lon sidroe  
Kadang peue-peue bala datang  
Teuma seuot bayeuen rimba  
He aneukda that lon sayang



Akan teutapi cahya mata  
Jeuoh raya lon beurjalan  
Lon jak mita umpeuen gata  
Habeh rimba lon sang abrang

Aneuk bayeuen marit utoh  
Pakon jeuoh neubeurjalan  
Pakon han di sinoe lingka  
Neujak mita daruet canggang

Inong bayeuen jaweueb meunoe  
Lam uteuen nyoe hana seunang  
Peunyaket le that hana bagoe  
Malam uroe hana reunggang

Peue peunyaket lam uteuen nyoe  
Ma teungku droe peugah rijang  
Bek tatanyong he aneuk droe  
Kadang keunoe ureueng datang

Aneuk bayeuen jikheun meunoe  
Lam uteuen nyoe pane urang  
Jipeugah le teuma meunoe  
He aneuk droe deungo beutrang

Sibak kayee blah rot barat  
Hu meukilat ban buleuen trang  
Bohjihpi le muda masak  
Cabeueng ramphak sang keutapang

Baranggasoe han jeuet jijak  
Di miyub bak naga suang  
Baranggadum rancak bijak  
Han troh tajak bungong keumang

Bek antara manusia  
Cicem rimba that jipantang  
Nama kayee sarai mahtob  
Dumpue cukop he buleuen trang

Peue nyang hajat tameunapsu  
Aneuk teungku hase rijang  
Aneuk bayeuen lom jisudi  
He ma pakri rot nyang seunang

Beutroh taek u cong kayee  
Pakri lagee ma jeunulang  
Peugah he ma bak lon jinoe  
Hate lon nyoe sangat bimbang

Bayeuen rimba jipeugah le  
He boh hate deungo beutrang  
Saboh kulam bungong keumbee  
Ngon bak kayee jidong teuntang

Meunyo rot nan tajak lanja  
Di naga han deuh jipandang  
Dalam kulam tagrop sigra  
Jeuet le rupa ban binatang

Jeuet le rupa miseue nuri  
Tabeudoh le tateureubang  
'Oh troh u cong kayee raya  
Pot boh muda pajoh rijang

Muwoe badan miseue nyang ka  
Indah rupa ban buleuen trang  
Lheueh nyan tacok peue nyang suka  
Rupa-rupa hase rijang

Ujong cabeueng tawiet sikrak  
Jeuet hai nyak peudeueng panyang  
Nyankeuh peudeueng meupusaka  
Tan tarasa 'oh tameucang

Meunyo tatiek lam laot raya  
Tho le sigra jeuet keu padang  
Baranggajan cit troh bungka  
Meung mata han jijeuet pandang

Beuthat ensan ngon jen rimba  
Hana daya ek jiteuntang  
Meunyo rusak nibak tuboh  
On jih taboh puleh rijang

Tacok kulet he aneuk droe  
Jeuet le jinoe guda teureubang  
On tapeugot keu kupiah  
Han le leumah soe nyang pandang

Cok lom kulet kayee bunoe  
Peugot peutoe pantah rijang  
Kutob rabani nama peutoe  
Jeuet tapasoe dum sibarang

'Oh ka hase sianeka  
Beudoh lanja tateureubang  
Bayeuen marit ngon aneukda  
Indah rupa ban buleuen trang

Habeh haba bayeuen rimba  
Teubiet faja peungeuh bandrang  
Tajul Muluk nyang jroh rupa  
Neutren lanja kayee seuntang

Neupeuteupat dalam rimba  
Neujak mita kayee manyang  
Cicem bayeuen kalon rupa  
Bak aneukda jikheun rijang

Jeh hai aneuk manusia  
Takheun hana keunoe datang  
Meunan jikheun bayeuen rimba  
Banta muda hate bimbang

Tajul Muluk arong rimba  
Meuteumeung ka kayee manyang  
Sibak kayee neungieng rupa  
Hu meucahya ban buleuen trang

Bak peureudee kayee raya  
Saboh naga deuh neupandang  
Tujoх cula nibak ulee  
Lom ngon bulee panyang-panyang

Neungieng kulam sinan saboh  
Ie hitam jroh miseue arang  
Keunan neujak banta muda  
Neugrob lanja le meulayang

Yoh nyan naga jigeuriwat  
Jiangkat uleejih rijang  
Naga kalon timu barat  
Hana sapat na mubayang

Tajul Muluk pirak lipat  
Beudoh leugat dalam kulam  
Deungon limpah rahmat Rabbi  
Jeuet keu nuri banta seudang

Neupo laju bungong keumbee  
U cong kayee neuteureubang  
'Oh sare troh u cong kayee  
Bungong keumbee piyoh rijang

Puleh payah bungong pade  
Ka neuwiet le sikrak cabang  
'Oh sare troh ubak jaroe  
Jeuet le beusoe peudeueng panyang

Pot boh kayee pajoh lanja  
Muwoe rupa miseue ensan  
ka meuriwang miseue nyang ka  
Indah rupa ban buleuen trang

Kulet kayee neupluek leugat  
Guda hekeumat jiteureubang  
Pot on kayee banta indah  
Keu kupiah peugot rijang

Seuon laju nyan kupiah  
Han le leumah soe nyang pandang  
Hekeumat neucok nibak naga  
Neuboh lam pha banta seudang

Pat nyang luka boh on kayee  
Puleh teuntee deungon rijang  
Pluek lom kulet kayee jatoe  
Peugot peutoe bungong karang

Kutob rabani nan geukheun proe  
Keunan pasoe dum sibarang  
Cukop hase sianeka  
Ateueh guda banta pasang

Tajul Muluk neupoh lawa  
U antara jiteureubang  
Padum lawet dalam hawa  
Troph banta bak saboh padang

Guda sujud keunan sigra  
Banta muda tren le rijang  
Ateueh bumoe neutren banta  
Gudapi ka laju hilang

Ka muwoe ban asai mula  
'Ajab raya 'oh tapandang  
Kutob rabani banta buka  
Pasoe lanja dum sibarang

Lheueh nyan banta neujak sidroe  
Malam uroe neusang-abrang  
Uroe tutong hana bagoe  
Tutong asoe bungong karang

Neumita ie po samlakoe  
Leuho uroe neuseumbahyang  
Ngon karonya Tuhan sidroe  
Meuteumeung nyoe saboh kulam

Saboh kulam indah han soe  
Po samlakoe keunan bimbang  
Neukalon ie lam kulam nyoe  
Mata laloe tahe mandang

Siblah hitam siblah ceukoe  
Bungong geutoe hate bimbang  
Banta seunom lam ie ceukoe  
Neujak manoe dalam kulam

'Oh lheueh seunom beudoh sigra  
Laeh rupa ka neupandang  
Kulam laen neueu nyata  
Ngon rupa ka laen macam

Sigala sifeuet aneuk dara  
Dumpeue ka na banta seudang  
'Ajab hate hireuen laloe  
Neukalon droe meugleueng subang

Wahe Tuhan Po lon Rabbi  
Ban nyang neubri bak lon seunang  
Tajul Muluk nyang bahgia  
Bak Rabbana droe neupulang

Lheueh nibak nyan po juhari  
Dalam pike meutang ilang  
Hokeuh jinoe lon jak piyoh  
Ma teungku beh bukon sayang

Teuduek siat pirak lipat  
Lon riwayat laen macam  
Saboh nanggroe luah cukop  
Siraton Kutob geurasi nan

Meuseuket that aneuk dara  
Nanggroe raja luah han ban  
Nyang got teungku taibadat  
Aneuk deelat hana tunangan

Raja teungku nyang po nanggroe  
Ka neuwoe bak Tuhan Rahman  
Aneukpi na tinggai sidroe  
Nyankeuh gantoe ayah laman

Rupapi jroh that samlakoe  
Jeueb-jeueb nanggroe tan teuladan  
That meusyeuhu timu barat  
Banta deelat Syaref sajan

Bak siuroe putik langsat  
Musyeewarat deungon rakan  
Jak meurusga galakjih that  
Pawang meuhat jiba sajan

Teuma piyoh saboh teumpat  
Raja deelat bandum sinan  
Paroh rusa keudeh keunoe  
Geunap uroe sabe meunan

Cukop hase ban nyang hajat  
Raja deelat kheun bak rakan  
He peurdana wadi meuntroe  
Jinoe tawoe seukalian

Beudoh laju peukeumah droe  
Bek le sinoe dalam hutan  
Teukeudi Po Tuhan sidroe  
Po samlakoe sisat jalan

Tunong baroh han meuho le  
Sosah hate bungong peukan  
Lawet lawan teuma dudoe  
Troph le sampoe ubak padang

Kulam saboh sinan leumah  
Banta indah peurab rijang  
'Oh troh keunan po samlakoe  
Neueue putroe that analan

Poteu raja tanyong meunoe  
Pane nanggroe he cut intan  
Peue nan bangsa gata sidroe  
Peugah jinoe bak lon tuan

Teuma seuot sinyak putroe  
Ampoñ kamoe po jonjongan  
Ulon teunyoe manusia  
Wahe raja nyang budiman

Yoh nyan raja lom pareksa  
Peue buet gata dalam hutan  
Bak siuroe po meukuta  
Grak Rabbana keu lon tuan

Sajan cuda lon jak meuen  
Teuka angen ngon seupot clam  
Lon jak meuen bineh pasi  
Wahe doli lon beurjalan

Di yub aron lon beureungi  
Dua kami nyang laen tan  
Jipot angen dirui mangat  
Teungeut ladat bak lon duek nyan

'Oh teukeujot lon meukuta  
Lon eu rimba seukalian  
Tahe hireuen lon han tara  
Grak Rabbana keu lon tuan

Tinggai ibu ngon ayahda  
Tinggai cuda he jonjongan  
'Oh lon ingat putoh asa  
He meukuta ulon paban

Salah lon tan ube seuma  
Peue kareuna lon lam hutan  
Meunan narit putroe muda  
Ngon ie mata sro meurumpa

Teuma seuot poteu raja  
Bek le rugha he buleuen trang  
Jak sajan lon jinoe lon ba  
Beudoh sigra tabeurjalan

Lon meukawen deungon gata  
Di lon hana lom tunangan  
Meunan narit raja muda  
Hana dawa putroe intan

Geucok putroe boh lam usong  
Di yub payong nyang analan  
Teuma beudoh woe u gampong  
Rakyat meuron-ron ireng sajan

Troh lam kuta bungong tanjong  
Dendayang tren dum meurumpan  
Peukek laju u meuligoe  
Tuan putroe baro datang

Troh le teuka ureueng nanggroe  
Keunan sampoe rame han ban  
Padum uroe lama masa  
Raja muda mupeurasan

Tujoh uroe meukeurija  
Po teuraja kawen yoh nyan  
Hingga teutap raja nanggroe  
Deungon putroe nyang analan

Meusuka-suka lam meuligoe  
Malam uroe that sukaan  
Padum lawet teuma akhe  
Teuka hame putroe intan

Cukop buleuen hame putroe  
Aneuk sidroe ka laheran  
Lahe aneuk tuan putroe  
Ureueng lakoe that analan

Teuma beudoh nek nyang tuha  
Putroe muda geucok yoh nyan  
Yoh nyan marit sinyak putroe  
Deungo kamoe he nek badan

Meunyo hajat meung seumanoe  
Rindu kamoe nek jeunulang  
Teuma neuseuot po nek maja  
Ban nyang suka bak cut intan

Meuna hajat nak seumanoe  
Bek di sinoe he nek badan  
Nibak kulam ulon manoe  
Rindu kamoe hana macam

Han peue salah po jroh rupa  
Ban nyang suka bungong peukan  
Yoh nyan teuma putroe muda  
Ka troh geuba ubak kulam

Meukeumah le tuan putroe  
Tren jak manoe laju sinan  
Ngon dendayang dum sinaroe  
Sajan putroe bungong karang

'Oh ban seunom po sambinoe  
Gaduh keudroe hana meujan  
Dendayang dum sosah hate  
Han meuho le putroe intan

Keudeh keunoe geujak mita  
Po nek maja sosah han ban  
Teuma geukheun laju sigra  
Woe lam kuta seukalian

Tajak peugah ubak raja  
Beudoh lanja wahe rakan  
Beudoh bandum teuma sigra  
Ubak raja geubeurjalan

'Oh troh keudeh dalam kuta  
Geupeuhaba putroe intan  
Nek peugah le ubak raja  
Han meuho ka pirak hupam

Dalam kulam teungoh manoe  
Sajan kamoe seukalian  
Raja deungo meunan haba  
Sret ie mata han muban-ban

Allah hai po putoh asa  
Pat lon mita pirak hupam  
Pakri jinoe lon bicara  
Patek hamba apon badan

Teutap raja dalam sosah  
Ulon peugah putroe intan  
'Oh lheueh seunom putroe indah  
Rupa ubah kon le meunan

Kulam laen lon eu rupa  
Putroepi ka laen ruman  
Ka jeuet agam kon le dara  
Hitam sukla kulet badan

Nyang na puteh aneuk mata  
Laen sukla seukalian  
Ka teupike po samlakoe  
Tuhan sidroe kaya han ban

Meunan pike bungong geutoe  
Teutap 'oh noe dilee kaman  
Jinoe laen ulon rawi  
Inong Habsyi lon peugah ban

Dawok jimoe geunap uroe  
Seutot lakoe dalam hutan  
Ka padum trep hana jiwoe  
Inong sidroe sosah han ban

Teukeudi Po Rabbon Kade  
Meuteumeung le ngon bangsawan  
Leumah jieu po samlakoe  
Ka jipeutoe laju keunan

Teuma jikheun haba meunoe  
Peue buet keunoe tabeurjalan  
Peue buet keunoe tajak som droe  
Keu kamoe han le ingatan

Ulon mehmoh geunap uroe  
Jak koh tungoe dalam hutan  
Meukeu aneuk han ingat le  
Bahle mate keulaparan

Mate geucang rimueng pajoh  
Jak som tuboh dalam hutan  
Peue lom taduek han tajak woe  
Bek le sinoe mate geucang

Tajul Muluk bungong geutoe  
Neupeujok droe ubak Tuhan  
Tan neujawueub sikrak haba  
Ban nyang suka bah jipadan

Leumah pike dalam dada  
Ngon kuasa Malikon Manan  
Ban nyang kheundak Tuhan Esa  
Nibak hamba that relaan

Tajul Muluk nyang bahgia  
Neuwoe lanja bungong peukan  
Agam paleh that ceulaka  
Pura-pura jak lam hutan

Bit paleh that tan bicara  
Peurum'oh na laen jalan  
Sebab ulon inong tuha  
Nyankeuh punca han tariwang

Tajak mita inong muda  
That ceulaka rimueng kuran  
Pane inong nyang ka gila  
Deungon gata jimeurakan

Nyansa badan hitam nahi  
Inong pane nyang ka sawan  
Meunan jikheun inong cati  
Banta ahli neujawueub tan

Hingga jiba troh u rumoh  
Po banta jroh teutap sinan  
Beungoh uroe 'oh ka suboh  
Baci saboh neucok yoh nyan

Jak koh kayee dalam rimba  
Keu beulanja bloe makanan  
Uroe malam neujak sabe  
Ka neuek gle manyang han ban

Dalam padang nyang luah that  
Banta deelat ka troh keunan  
Jak mita ie keudeh keunoe  
Po samlakoe tutong badan

Meuteumeung ngon kulam saboh  
Po banta jroh neutren keunan  
Banta seunom yoh nyan sigra  
Mangat rata basah badan

Na sikeujab beudoh lanja  
Banta muda hireuen mandang  
Dilee badan hitam sukla  
Jinoe pi ka miseue intan

Tajul Muluk ucapan syuko  
Neupujoe Po sidroe Tuhan  
Lheueh nibak nyan bungong kundo  
Teungoh laju dalam kulam

Troh u darat bungong keumbbee  
Neueu bajee mantong sinan  
Kutob rabani bak sot dilee  
Cit meuteuntee muminah tan

Bandum mantong Tuhan neubri  
Po juhari cok le rijang  
Kulet kayee laju neusie  
Neupangge guda analan

Guda raghoe troh le sigra  
Indah rupa hana lawan  
Tajul Muluk nyang jroh rupa  
Ateueh guda laju pasang

Guda jipo pantah sigra  
Dalam hawa sangat tajam  
Laju jipo hana teudoh  
Hingga troh bak saboh padang

Banta kalon padang luah  
Neukheun pantah bak guda nyan  
Wahe ulon guda indah  
Padang luah tatren keunan

Raja guda sujud pantah  
Ban nyan titah jiubah han  
Laju sujud troh u bumoe  
Po samlakoe neutren keunan

Guda hilang laju keudroe  
Laju jiwoe bak mulaan  
Tajul Muluk nyang samlakoe  
Yoh nyan sidroe neubeurjalan

Teungoh neujak po samlakoe  
Neukalon nyoe saboh taman  
Leumah kuta that seureuloe  
Ngon meuligoe jroh hana ban

Cit jen hitam po hareuta  
Ureueng tuha nyang peugah nyan  
Jen hitam nama geurasi  
Le that sakti ngon seunuban

Rakyat le that meuribee katoe  
Jen pari nyoe han soe lawan  
Dalam kuta saboh meuligoe  
Sidroe putroe that analan

Tajul Muluk nyang samlakoe  
Neujak sidroe lam kuta nyan  
Laju neukek lam meuligoe  
Tan meusidroe ureueng sinan

Jeueb-jeueb bilek neupareksa  
Sidroe hana neueu ensan  
Nyang na intan dum meutabu  
Meujampu deungon beurlian

Tajul Muluk hireuen tahe  
Hareuta le ureuengpi tan  
Teungoh ngieng nyan bungong meulu  
Neudeungo su indah han ban

Siulah sang ureueng bae  
Tahe gante soe deungaran  
Wahe Tuhan Po lon Rabbi  
Saleh pakri untong badan

Lam rimba nyoe huteuen sunyi  
Hana meukri lon jitawan  
Wahe Tuhan Po Nyang Esa  
Neupeulara patek laman

Neubri leupah lon lam rimba  
Bek lam bahya suntok zaman  
Wahe Tuhan Rabbon Kade  
Keu lon neubri beuna jalan

Lon meung jak eu bunda abi  
Rindu hate lon hana ban  
Teungoh bae cut putroe ti  
Dum jirawi untong badan

Tajul Muluk neudeungo kri  
Neupeurap le teuma keunan  
Inseueh hate bungong meulu  
Neudeungo su mangat han ban

'Oh troh nibak babah pinto  
Keumeung lalo hana jalan  
Sebab pinto ka meugunci  
Banta ahli sosah han ban

Banta han ek neutheun hate  
Neupeurap le neutrom yoh nyan  
Jibeudoh le putroe muda  
Jak pareksa peue meusu nyan

Ban troh keunan po jroh rupa  
Jieu banta teudong sinan  
Jieu rupa that samlakoe  
Sinyak putroe tahe heran

Teuma marit tuan putroe  
Ampon kamoe po jonjongan  
Pat bu gampong deungon nanggroe  
Peue buet keunoe neubeurjalan

Saleh cit nyoe ampon doli  
Bangsa pari aneuk ensan  
Seumbah sujud hamba ini  
Di yub gaki po jonjongan

Bek weueh hate po meukuta  
Sebab hamba tanyong meunan  
Jeuet lon tanyong po meukuta  
Sebab hamba that sosahan

'Oh troh jiwoe jen ceulaka  
Meukuta meuhat jitawan  
Jipoh mate tuanku droe  
Teulah dudoe po jonjongan

Miseue ulonteu nyoe sidroe  
Di nanggroe jiba lam hutan  
Tinggai nanggroe bunda ayah  
Lon jireupah he sulton

Meunan jikheun sinyak putroe  
Po samlakoe jaweueb rijang  
Wahe putroe nyang sambinoe  
Deungo kamoe cut analan

Ulon titek bagoe ie mbon  
Angen peutren dalam awan  
Meuna gaseh cut meuubon  
Tatueng ulon keu teubosan

Jampang-jampang tajak manoe  
Taba kamoe srah pakaian  
Jen nyang jeuheuet han lon takot  
Meuna po cut sinoe sajan

Meubacut han hate kuyut  
Bah jipubuet barangkaban  
Reudok di gle hujeuen han padee  
Asap lam batee seupot lam hutan

Meutuah tuboh mate di juree  
Lam peulangkee putroe intan  
Meunan neukheun banta ahli  
Han taturi bangsa ensan

Adat manok bireng tani  
Hana peue ci putroe intan  
Han tom jiplueng meung sipadé  
Jitem mate di geulanggang

Nyankeuh manok nyang pusaka  
Jeuet taba barangri peukan  
Putroe deungo meunan haba  
Peurab sigra com bak tangan

Meuah ampon po meukuta  
Kon lon cuba deelat laman  
Di lon deelat lon meuseunda  
Bek meukuta keumarahan

Aneuk puyoh dalam cintra  
'Oh troh masa bri makanan  
Tuanku tamong keunoe sigra  
Bek di lua po jonjongan

Tajul Muluk jawueb sigra  
Han jeuet hamba tamong keunan  
Bek hai putroe lon tamaba  
Hana kada lon di sinan

Teumpat di lon bak seulasa  
Meuna rela bungong peukan  
Meunyo hana mangat hate  
Idin tabri lon beurjalan

Bek troh jiwoe jen baduwi  
Jipoh mate ulon tuan  
Han lon jeuet ngieng po juhari  
Jih le sakti ngon seunuban

Tajul Muluk meunan haba  
Sret ie mata putroe intan  
Sira jimoe putroe muda  
Jimat banta nibak tangan

Han neutamong wahe doli  
Neupoh mate lon relaan  
Adat udep tan guna le  
Reuloh hate suntok zaman

Di gop geuduek dalam nanggroe  
Di lon sidroe dalam hutan  
'Oh lon ingat hanco hate  
Di gop sakri di lon saban

Meunan narit putroe muda  
Ngon ie mata basah badan  
Tajul Muluk tanyong sigra  
Pakon rugha putroe intan

Jak tatamong po jroh rupa  
Lon jok nyawa ubak Tuhan  
Putroe deungo meunan haba  
Tamong lanja le u dalam

Banta piyoh atueuh geuta  
Putroe muda jiduek sajan  
Tajul Muluk tanyong sigra  
He adekda bungong peukan

Pat bu nanggroe bintang kala  
Ayah bunda tapeugah nan  
Gata putroe soe bu nama  
Keunoe soe ba dalam hutan

Putroe seuot jipeugah troh  
Taman Paridoh gampong laman  
Taman Paridoh nama nanggroe  
Ayah kamoe sinan sulton

Ayah ulon tuanku droe  
Aduen adoe dua gop nyan  
Sidroe doli ngo lon peugah  
Mula Fasyah nan sulotan

Mat keurajeuen he meukuta  
Peulinggoe Pura nan nanggroe nyan  
Bak siuroe po meukuta  
Gop peuhaba bak lon tuan

Meungkawali adek kamoe  
Treb ka jinoe lam sukaran  
Ban lon deungo meunan haba  
Lon jak lanja he jonjongan

'Oh troh keudeh patek hamba  
Lon eu nyata lam sukaran  
Ka meuthon dalam peunjara  
Makanan hana jimakan

Uroe malam jimoe bae  
Sebabab judo jih ka hilang  
Baro 'oh nan putroe peugah  
Banta reubah laju yoh nyan

Gadoh ingat banta indah  
Neudeungo gah putroe intan  
Ruhon Afda hireuen tahe  
Jieu laku cut bangsawan

Teuka sosah bungong pade  
'Oh meugule banta seudang  
Ya Tuhanku pakon meunoe  
Peue bala nyoe atueh intan

Teuma teuingat bungong kundo  
Jicok laju cumboi intan  
Jipeuduek bak hidong banta  
Lalu jaga bungong peukan

Nibak pangsan lalu jaga  
Sro ie mata basah badan  
Teuma marit po sambinoe  
Pakon meunoe po jonjongan

Peue na salah po meukuta  
Ubak hamba neupeugah trang  
Tajul Muluk jaweeub keunong  
Bek tatanyong wahe intan

Meuna gaseh tuan putroe  
Haba bunoe lom takheun ban  
Putroe peugah teuma sigra  
He meukuta deungo laman

Lon dom sinan dua uroe  
Teuma lon woe he jonjongan  
Na sikhan rot baro lon woe  
Ateueh kamoe bala datang

Ka teukeudi Tuhan sidroe  
Jidrop kamoe le jen hitam  
Jicok ulon laju sigra  
Keunoe jiba dalam hutan

Nama ulon Ruhon Afda  
He meukuta geurasi nan  
Nyang adek lon Meungkawali  
Peurmaisuri bunda laman

Ka lon peugah awai akhe  
Saleh pakri he jonjongan  
Tajul Muluk laju seuot  
Lon nyoe patot cahya intan

Ngo lon peugah he sambinoe  
Di lon nanggroe Syarikatan  
Zainul Muluk nama raja  
Nyan ayahda ulon tuan

Nama ulon Tajul Muluk  
Bungong tajok deungo beutrang  
Meungkawali bungong kundo  
Nyankeuh judo ulon tuan

Sampoe keunoe ulon lalo  
Pie laku po ma intan  
Teungoh marit bungong kundo  
Ie mata ro basah badan

Meuna tulong bungong pade  
Bek roh neubri apon badan  
Ruhon Afda jikheun meunoe  
Bek le neumoe po jonjongan

Meung ek leupah lam banya nyoe  
Lon peujaroe putroe intan  
Meunan jikheun Ruhon Afda  
Seuot banta teuma nyoe ban

Wahe putroe bungong tanjong  
Tuhan tulong nibak setan  
Meuna umu bungong sukron  
Bahle buet lon ngon jen hitam

Meun nan narit banta deelat  
Hekeumat neucinta rijang  
Neucinta saboh hekeumat  
Deungon siat guda datang

Raja guda keunañ ka trok  
Tajul Muluk neukek yoh nyan  
Deungon putroe bungong tajok  
Banta peuduek dihadapan

Banta giduek guda hekeumat  
Jipo leugat dalam awan  
Guda jipo pantah sangat  
Bungong riwat di atueuh nyan

Deungon putroe Ruhon Afda  
Laju bungka rot lam awan  
Seupot uroe watee asa  
Jen jigisa woe lam taman

'Oh troh jiwoe dalam rimba  
Jieu hana putroe sinan  
Jimita le keudeh keunoe  
Di jen pindoe sosah han ban

Tan meuteumeung sinyak putroe  
Sosah han soe di jen setan  
Teuma leumah dalam dada  
Putroe muda ka gop tawan

Meunan jikheun jen afeuret  
Mata jipet tatkala nyan  
Leumah jieu bungong rusep  
Deuh meulep-lep dalam awan

Sare leumah jieu putroe  
Hate seungkoe jen adeurang  
Teuma jikheun haba meunoe  
Tulong kamoe wahe Sudan

Meuntroe Sudan seuot sigra  
Di jeumala angkat tangan  
Ampon meuah po meukuta  
Bek le rugha he sulotan

Ulon nyang cok tuan putroe  
Tuanku droe bek sosahan  
Ureueng nyang ba kupoh mate  
Neueu doli yoh lon tawan

Neubri idin po meukuta  
Ulon bungka jioh jalan  
Raja deungo haba meuntroe  
Dum geupasoe dalam badan

Cok ngon alat mat di jaroe  
Jipo jinoe rot lam awan  
Padum na trep jipo sunggoh  
Hingga ka troh bak bangsawan

Tajul Muluk kalon rupa  
Nekheun sigra bak cut intan  
Wahe putroe bintang kala  
Jeh ka teuka jen meukawan

Jitueng gata laju jinoe  
Jipoh kamoe he cut intan  
Bak lon ingat he cut putroe  
Uroe nyoe peusambot badan

Wahe putroe bungong pade  
Lon mupake ngon jen setan  
Lon jok nyawong ubak Rabbi  
Adat matepi lon paban

Meunyo jicok bungong pade  
Udep mate lon relaan  
Meukon meunan han meusampe  
Hana meuri bangsa ensan

Wahe putroe þungong kipah  
Nyoë kupiah boh bak badan  
Boh bak ulee jinoe laju  
Bek deueh jieu le jen setan

Mubek leumah po sambinoe  
Ulon teunyoe jeuët barang ban  
Meunan narit banta muda  
Ruhon Afda sosah han ban

Kitakot that keu jen pari  
Saleh pakri 'oh troh keunan  
Jipoh mate po samlakoe  
Jicok kamoe teuma lheueh nyan

Putroe jimoe hate rugha  
Ro ie mata basah badan  
Tajul Muluk neukheun sigra  
Putroe muda bek syugolan

Tuhan kada bungong pade  
Bek tamoe le bungong peukan  
Putroe deungo meunan ulah  
Cok kupiah seuon rijang

'Oh lheueh putroe ngui kupiah  
Han le leumah bak jen setan  
Na sikeujap teuma akhe  
Keunan troh le meuntroe Sudan

Tajul Muluk neutanyong le  
Kadeungo he meuntroe hewan  
Peue na hajat peugah jinoe  
Wahe meuntroe nyang analan

Meuntroe Sudan jaweueb meunoe  
Kadeungo nyoe wahe ensan  
Hoka kaba sinyak putroe  
Kacok bunoe dalam taman

Putroe jiduek lam meuligoe  
Troh kah sidroe kajak tawan  
Meuntroe Sudan su meudhot-dhot  
Hana patot buet kah meunan

Nyang got peugah jinoe laju  
Bek kueumpu nyawong simpan  
Meuhan pulang bungong meulu  
Peugah laju gata soe nan

Adat mate kah uroe nyoe  
Ka kutusoe nama ensan  
Adat teukeudi nyawong sampoe  
Mangat meusoe kah sulotan

Meunan Sudan tuto seungkoe  
Po samlakoe jaweueb yoh nyan  
Na kadeungo wahe meuntroe  
Ulon teunyoe aneuk sulotan

Tajul Muluk nama hamba  
Aneuk raja Syarikatan  
Di yup langet ateueh bumoe  
Nyoe raja nyoe nyang pahlawan

Cit geuthee na Tajul Muluk  
Jitupeue trok jeueb sulotan  
Bak raja kah han jituri  
Aneuk doli Syarikatan

Meuhan keunoe kupeureugi  
Cut putroe ti kujak tawan  
Nama ulon ka katuri  
Di kah pakri soe geuheu nan

Jipeugah le teuma sigra  
Di lon nama meuntroe Sudan  
Jen afeuret nama raja  
Cit geuthee na jeuep-jeuep alam

Nyang jeuet keunoe ulon teuka  
Lon jak mita putroe intan  
Neuyue jak tueng uleh raja  
Nyang kah bawa wahe ensan

Pulang jinoe bek le lama  
Lon meung gisa bak sulotan  
Tajul Muluk seuot sigra  
Peue ri haba meuntroe Sudan

Bek deungon lon jak meuseunda  
Tajak gisa keudeh rijang  
Pajan tajok putroe muda  
Nyang jeuet gata lakee pulang

Nyang got jinoe tajak gisa  
Peutroh haba bak sulotan  
Peugah beutrok ubak raja  
Tayue teuka bak lon tuan

Meunyo gata han meumada  
Deungon raja sabe padan  
Hana patot batee kaca  
Ngon teumaga tapeulawan

Jeuet keu rusak muploh bara

Laba hana saboh cawan

Adat mate kah he meuntroe

Sia kamoe payah badan

Miseue kupoh saboh asee

Jeuet keu malee deungon rakan

Raja di kah nyang kreueh ulee

Meunyo ngon kee sabe padan

Kareuna jih meugah raya

Beuthat raja biek jen hutan

Meuntroe Sudan beungeh raya

Tuto gasa bak bangsawan

Wahe ensan nyang ceulaka

Peue ro haba kameukalam

Hana patot meunan tuto

Han got laku meunyo ensan

Jinoe nyang got bek le tuto

Bungong kundo pat kasimpan

Bunoe kon na sama-sama

Jinoe hoka wahe ensan

Hana kueu putroe muda

Kucok hana peue kupulang

Meutan kucok peue kalakee

Hana malee kah binatang

Meunan narit Tajul Muluk

Hate murok meuntroe Sudan

Jilumpat le keunan ka trok

Bungong tajok laju jicang

Hana keunong bungong tanjung

Neugrop lambong pantah han ban

Neusuet peudeueng dalam sarong

Meunoe neukheun cut bangsawan

Wahe peudeueng ranteng kayee  
Katulong kee wahe teelan  
Hai peudeueng bek kabri malee  
Kupoh sitree jen edeurang

Lheueh nibak nyan bungong tanjong  
Neugrop lambong atueuh setan  
Neutak keunong jroh meurancong  
Keunong bak lhong putoh meukhan

Teutap mate laknat Allah  
Gaduh tuan ngon cut intan  
Mangat hate banta indah  
'Oh ka reubah meutroe Sudan

Laen bandum habeh sampoe  
Tinggai peuet droe plueng teureuban  
Jipo pantah hana bagoe  
Keudeh jiwoe bak sulton

'Oh troh keudeh angkat jaroe  
Ampon kamoe po jonjongan  
Gajah jithat hana bagoe  
Sudan meuntroe ka jisimpan

Habeh umu han le hayat  
Wahe deeliat putoh meukhan  
Jen afeuret ka jilumpat  
Ngui ngon alat nibak badan

Bahle ngon kee sigo jici  
Mangat meuri bangsa ensan  
'Oh ka cukop nibak asoe  
Jipo jinoe dalam awan

Sajan rakyat wadi meuntroe  
Dum sinaroe jibeurjalan  
Sira jijak meunoe pike  
Kupoh mate bangsa ensan

Nyang di rakyat han peue tanyong  
Jigrop lambong dalam awan  
Surak deumpek that meutaga  
Bak jisangka ek jisimpan

Ladom jiba tungkat beusoe  
Nibak jaroe ka jitatang  
Ladom taeu jiba beude  
Jipo sare dalam awan

Bak masa nyan banta muda  
Laju bungka rot lam awan  
Teungoh bungka po jroh rupa  
Trok le sigra jen meukawan

Banta kheun bak putroe muda  
Bek that lanja tabeurjalan  
Jeh takalon jen ceulaka  
Lom ka teuka dum meurumpa

Jinoe nyang got po jroh rupa  
Tangui sigra kupiah nyan  
Bek deuh jieu cut sambinoe  
Ulon teunyoe jeuet barang ban

Meunan narit banta ahli  
Cut putroe ti ngui peukaian  
Bak uroe nyoe lon mupake  
Ngon jen kafe wahe intan

Cok kupiah ngui bak ulee  
Bungong keumbee gaeb rijang  
'Oh ban gadoh bungong keumbee  
Jen meuree-ree ka troh datang

Leumah jieu banta muda  
Jidong lingka jroh meurumpa  
Taeu jidong jroh meupadoe  
Siribee droe bak bilangan

Han deuh jieu tuan putroe  
Sapat ngon droe banta seudang  
Ka jiapet rot deh rot noe  
Jieu putroe tan le sajan

Saket hate hana bagoe  
Tuan putroe jieu ka tan  
Teuma jikheun haba meunoe  
Deungo kamoe wahe ensan

Hoka kaba putroe siti  
Kah jak taki putroe seudang  
Hana patot seukali-kali  
Cut putroe ti kajak tawan

Bungong jumpa nyang mangat bee  
Lhat bak ulee baranggajan  
Teuma beudoh bungong keumbee  
Biek jen sitree laju neucang

Neusuet peudeueng banta areh  
Neucang habeh seukalian  
Neucang keunoe jigrop keudeh  
Bit that paleh jen edeurang

Ladom keunong bak tangkurak  
Ka teukeupak sinan ceukang  
Ladom meukhan putoh neutak  
Sangat rancak banta seudang

Tajul Muluk neupet mata  
Neucang lanja hantu setan  
Le that mate jen ceulaka  
Buet cut banta nyang analan

Bak bilangan leubeh laksa  
Nyang ka pana seukalian  
Jen afeuret beungeh raya  
Rakyat dumna habeh simpan

MILIK KEPUSTAKAAN  
DIREKTORAT TRADISI  
DITJEN KAJE DEPT KULTURA

Peukeumah droe jen nyang raya  
Tan jikira le barangban  
Jilumpat le keunan sigra  
Ateueh banta nyang analan

Leumah jieu po samlakoe  
Guda raghoe neumeukandran  
Jen afeuret beungeh tuloe  
Dumpek tanggoe su lam awan

Hoka kasom aneuk kamoe  
Sinyak putroe kajak tawan  
Kupoh mate kah uroe nyoe  
Han thee keudroe bangsa ensan

Tajul Muluk jaweueb pantah  
Peue kapeugah wahe setan  
Han kutakot keu bangsa kah  
Peurab pantah nak kutuban

Jen afeuret beungeh raya  
Jingo haba cut bangsawan  
Dalam babah jen ceulaka  
Apui meunyala keuluanan

Hu ngon apui meujeureulah  
Banta indah tutong badan  
Tajul Muluk neuteupok pha  
Ujeuen raya teuka rijang

Sret le ujeuen that meutaga  
Apui raya laju padam  
Apui ka len deungon siat  
Jen makan that beungeh yoh nyan

Nibak jaroe jitiek tungkat  
Gunong leugat teudong keunan  
Tajul Muluk pi that cakap  
Gunong meuhat neupoh rijang

Gunong hanco jeuet keu sira  
Jen ceulaka beungeh han ban  
Jipeurab le keunan sigra  
Cokma raya nibak tangan

Tajul Muluk jipoh laju  
Meu'u-'u ban reudok datang  
Bánta neugrop na sigeutu  
Cokma lalu leupah jalan

Hana keunong bungong keumbee  
Di jen asee beungeh han ban  
Tajul Muluk neukheun lagee  
Hana malee kah binatang

Han peue uji meunyo ngon kee  
Jinoe kathee bangsa ensan  
Neugrak peudeueng ranteng kayee  
Neucang sitree biek jen hewan

Han jan jigrop jimeusilee  
Pantah lagee kilat beuklam  
Neutak keunong bak tangkurak  
Beukah mubhak le meutimphan

Sinan mate le teukeupak  
Gadoh rancak hantu setan  
'Oh ka mate jen ceulaka  
Banta bungka laju rijang

Deungon putroe Ruhon Afda  
Ateueh guda neumeukandran  
Padum lawet jipo sunggoh  
Hana piyoh uroe malam

Troh bak nanggroe Taman Paridoh  
Bungong iboh piyoh sinan  
Teuma marit po sambinoe  
Deungo kamoe po jonjongan

Tinggai tuanku dilee sinoe  
Bahle lon woe bak sulotan  
Meunan narit Ruhon Afda  
Jiwoe lanja teuma lheueh nyan

Troh u rumoh bintang kala  
Bak ayahda sujud rijang  
Raja kalon woe aneukda  
Sro ie mata han muban-ban

Bu meutuah cahya mata  
Pajan gisa aneuk badan  
Seuot putroe teuma sigra  
He ayahda nyoe baro ban

That meutuah cahya mata  
Ayahda han apon badan  
Meuteumeung eu tangke nyawa  
Padum lama ka jitawan

Soe nyang puwoe bintang kala  
Peugah sigra bak lon tuan  
Jaweeub putroe nyang jroh rupa  
He ayahda ngo lon kheun ban

Sidroe ureueng manusia  
Indah rupa hana lawan  
Hana sidroe ngon tapeusa  
Sang meutia kulet badan

Gop nyan nyang cok dalam rimba  
Ngon jen raya geumeulawan  
Geumuprang ngon jen ceulaka  
Siploh laksa jen teureuban

Geumuprang lam awan mig  
Rakyat raja habeh simpan  
'Oh lheueh mate jen seumua  
Geucok hambar teuma rijang

Hingga ka troh lon geupuwoe  
Le samlakoe nyang bangsawan  
Jeh pat jinoe na di luar  
Hana lon ba keunoe sajan

Meunan narit Ruhon Afda  
Jawueub raja nyang analan  
Raja neukheun ubak meuntroe  
Deungo kamoe seukalian

Jak tueng keunoe po juhari  
Hana meukri tinggai sinan  
Jibeudoh le meuntroe wadi  
Ka jiili laju yoh nyan

'Oh troh keudeh dum sinaroe  
Bak samlakoe nyang analan  
Mubri saleuem mumat jaroe  
Wadi meuntroe seukalian

Teuma beudoh sidroe meuntroe  
Nyang that raghoe dalam kawan  
Bri horeumat keu cut banta  
Ban nyang kada adat reusam

Lheueh nyan meuntroe peugah haba  
Ampon hamba po jonjongan  
Bandum kamoe suroh raja  
Bak meukuta deelat laman

Poteu raja di meuligoe  
Kamoe keunoe neuyue jalan  
Neulakee langkah uleh raja  
Deungon hamba jinoe sajan

Teuma seuot banta muda  
Ban nyang sabda bak jonjongan  
Ban nyang hajat po meukuta  
Hana dawa nibak laman

Insya Allah he syeedara  
Sama-sama tabeurjalan  
Meunan narit banta muda  
Beudoh sigra teuma yoh nyan

Sajan rakyat dum seureuta  
Ireng raja nyang pilehan  
Hingga sampoe dalam kuta  
Po jroh rupa piyoh sinan

Ateueh bale meupeurmata  
Bintang kala neukek keunan  
Meuteumeung le deungon raja  
Bandua geumumat tangan

Tajul Muluk nyang samlakoe  
Neucom jaroe po jonjongan  
Raja sambot laju pantah  
Beu meutuah batee intan

Wahe aneuk bungong rambot  
Lon meuniet sret buleuen bintang  
Ngon usaha po samlakoe  
Ek tapuwoe aneuk laman

Adat meukon tulong gata  
Ta meugisa suntok zaman  
Teutap sinan dalam rimba  
Suntok masa keususahan

Ulon sinoe apon han soe  
Ka troh tawoe cut analan  
Sang aneuk tapulang nanggroe  
Meunan keu proe bak lon tuan

Banta teuduek bak keurusi  
Meuseundi batee pualam  
Hana sapeue jawueub neubri  
Raja puji di hadapan

Lheueh nyan ranup lom ka neubri  
Banta ahli sambot rijang  
Banta pajoh ranup sigapu  
Jibeudoh hu cahya badan

Teungoh marit raja doli  
Ka troh jime le hidangan  
Peiduek laju u keue banta  
Ban nyan kada muliaan

Laen bandum wadi meuntroe  
Raja nanggroe bri makanan  
Cukop hase sianeka  
Poteu raja marit yoh nyan

Dua jaroe di jeumala  
He aneukda batee intan  
Makeuen aneuk peue nyang mudah  
Nanggroe ayah jeuoh peukan

Tabeue masen bek peue takheun  
Lon lam uteuen wahe intan  
'Oh lheueh makeuen bandum hase  
Geupinah le dum hidangan

Geuboh ranup dalam bate  
Geubeuot le keu bangsawan  
Banta pajoh ranup sigapu  
Teuma meusu po jonjongan

Ubak meuntroe sabda raja  
Ngon bentara bandum sinan  
Na tadeungo wahe meuntroe  
Rakyat nanggroe dum tapeusan

Tayue jitren dum sinaroe  
Jeuoh ngon toe seukalian  
Keunoe bandum tayue teuka  
Hajat hamba meupeurasan

'Oh lheueh titah nibak raja  
Banta muda puwoe yoh nyan  
Peukek laju u istana  
Poteu raja that sukaan

Peurmaisuri di meuligoe  
Po samlakoe peurab keunan  
Tajul Muluk nyang bahgia  
Seumbah bunda gaki tangan

Putroe sambot pantah sigra  
Peumulia cut bangsawan  
Peurmaisuri neukheun pantah  
Bu meutuah aneuk badan

Sijuek hate lon han tara  
'Oh na gata wahe intan  
Beu selamat bintang kala  
Wahe banta nyang analan

Meunan narit peurmaisuri  
Duek piyoh le teuma sinan  
Teuma troh le Ruhon Afda  
Dengon banta marit yoh nyan

Wahe adek bungong riwat  
Nyoekueh teumpat di lon tuan  
Ka troh tajak teumpat kamoe  
Wahe adoe cahya intan

Bek na peue kheun po samlakoe  
Nanggroe kamoe rimba Tuhan  
Kru seumangat wahe cuda  
That mulia bak lon tuan

Nibak cuda na cit dumnoe  
Di ulon nyoe sapeuepi tan  
Keunoe ka troh ubak cuda  
Nyang lon ba pha ngon tangan

Gadoh malee he cuda droe  
Cit ka meunoe nasib badan  
Meunan narit banta muda  
Seuot sigra putroe intan

Wahe adek bungon geutoe  
He samlakoe bek kheun meunan  
Han soe balah guna gata  
Dalam donya tan teuladan

Gampong nanggroe lon bri keu yum  
Han cit sadum ngon guna nyan  
Taniet adek rumoh kamoe  
Sang rumoh droe wahe intan

Meunan narit putroe muda  
Cut banta ka tahe heran  
Peurmaisuri teukab jaroe  
Tahe keudroe hireuen mandang

Bandua droe hireuen hate  
Han troh pike ngon seunuban  
Bak neusangka bungong kundo  
Jeuet keu judo putroe intan

Tan neutupue bintang kala  
Meusyeedara dua gop nyan  
Jimeuseubot aduen adoe  
Bandua droe jiubah han

Peurmaisuri deungon raja  
Gop nyan dua sosah han ban  
Lheueh nyan teuma raja deelat  
Neubri teumpat nyang analan

Dalam taman indah han soe  
Po samlakoe geuba keunan  
Cok biula mat di jaroe  
Geunap uroe laloe ngon nyan

Geunap uroe syae panton  
Akhe ngon phon jroh lakuan  
Soe nyang deungo reuloh hate  
Meungkawali geuseubot nan

Teutap sinan Tajul Muluk  
Laloe mabok ngon peurasan  
Jinoe laen'lon peugisa  
Putroe muda nyang analan

That meusyeuhu jeuep-jeuep nanggroe  
Meugah kawoe bungong peukan  
Jitren rakyat jeuoh ngon toe  
Bungong jaroe jiba sajan

Meunan sabé geunap uroe  
Asoe nanggroe troh meurumpan  
Padum lawet akhe masa  
Peulinggoe Pura troh habaran

Ruhon Afda meugah ka woe  
Ubak putroe ibu intan  
Hamilah Katon jikheun meunoe  
Ampon kamoe po jonjongan

Ruhon Afda ka troh jiwoe  
Idin kamoe jak kalon ban  
Mula Fasyah jawueub meunoe  
Idin kamoe he cut intan

Lagi kon gop bungong meulu  
Bah tajak eu aneuk badan  
Hingga beungoh le ngon uroe  
Wadi meuntroe neuhei yoh nyan

Meusapat le dum sinaroe  
Imum sagee huleebalang  
Cukop hase deungon alat  
Ban nyang babat meuatoran

Teuma meugah bak Meungkawali  
Deungon umi meung beurjalan  
Bak masa nyan bungong pade  
Trep ka lawi dalam tahan

Gaki jaroé keunong rante  
Jimoe sabe bungong peukan  
Han tom teungeut po jroh rupa  
Pijuet raya ka ngon badan

Bak uroe nyan po sambinoe  
Jingo bunyoe gop peugah ban  
Ruhon Afda ka troh jiwoe  
Ubak nanggroe ayah laman

Hamilah Katon umi putroe  
Singoh uroe meung beurjalan  
Meujak kalon putroe muda  
Baro gisa bak jen setan

Meungkawali deungo meunan  
Hate seunang han meuban-ban  
Rindu hate hana tara  
Jak eu cuda baro pulang

Bak dendayang putroe peugah  
Tajak pantah he da badan  
Tajak he da ubak ayah  
Tapeugah haba lon tuan

Lon deungo gah cuda ka woe  
Bak uroe nyoe lon beurjalan  
Lon meung jak eu da boh hate  
Trep that ka cre ngon lon tuan

Meuna idin bak ayahda  
Jinoe sigra lon beurjalan  
Meunyo hana idin doli  
Bahle mate lon lam tahan

Hana guna lon udep le  
Mangat meusampe he da badan  
Meunan haba Meungkawali  
Dendayang le beudoh rijang

'Oh troh keudeh ubak doli  
Jipeugah le narit intan  
Di keue putroe Hamilah Katon  
Meuñoe jikheun le dendayang

Deelat ampon po meukuta  
Patek hamba peusurohan  
Seumbah sujud putroe muda  
Hajat cinta keu jonjongan

Keumeung jak eu Ruhon Afda  
Nyang ban gisa dalam hutan  
Rindu hate putroe muda  
Jak eu mata cuda badan

Nyankeuh haba ampon doli  
Idin neubri he jonjongan  
Hamilah Katon seuot sigra  
Di jih cit ka deungan ensan

Keupeue laen hajat cinta  
Manusia di jih wadan  
Mula Fasyah jawueb neubri  
Jinoe bahle jibeurjalan

Nyang leubeh jroh po sambinoe  
Bak uroe nyoe taba sajan  
Meukon meunan he cut putroe  
Teulah dudoe he cut intan

Meunan narit raja nanggroe  
Dendayang woe pantah rijang  
'Oh troh ubak Meungkawali  
Jipeugah le haba sulotan

Meuah ampon cut sambinoe  
Ka troh lon woe wahe intan  
Ka neuwasiet ubak hamba  
Po meukuta neuyue peusan

Wahe po cut bungong jeumpa  
Bek neuhawa le keu ensan  
Bek neugalak manusia  
Po jroh rupa kheun sulotan

Meung neupateh bungong pade  
Cit jinoe le neuba sajan  
Teuma jaweueb putroe muda  
Hana dawa bak lon tuan

Meunan narit po jroh rupa  
Dendayang ka beudoh rijang  
jijak peugah ubak raja  
Ban nyang haba putroe intan

Awai akhe ka jipeugah  
Mula Fasyah marit yoh nyan  
He dendayang tajak gisa  
Tayue buka pinto tutopan

Tayue teubiet Meungkawali  
Bek tinggai le dalam tahan  
"Oh lheueh titah raja nanggroe  
Sinyak putroe buka yoh nyan

Jak bak ayah putroe muda  
Dan bak bunda dua sajan  
'Oh lheueh seumbah ayah ngon umi  
Tren jak mandi bungong peukan

'Oh lheueh manoe bungong keumbee  
Ek u juree teuma rijang  
Teuma jiduek sajan bunda  
Po jroh rupa nyang analan

Lheueh nyan marit peurmaisuri  
Idin neubri po jonjongan  
Jinoe laju lon peureugi  
Meungkawali lon ba sajan

Teuma seuot raja nanggroe  
Idin kamoe he cut intan  
Akan teutapi bungong riwat  
Ingar beuthat judo badan

Meungkawali aneuk dara  
Ingar gata bek cte sajan  
Kareunajih hate rugha  
Jicinta keu bangsa ensan

Soe tube thee putroe indah  
Jimeulangkah lam-lam hutan  
Jijak laju ho langkah ba  
Malee gata putroe intan

Meunan narit raja nanggroe  
Tuan putroe kabui yoh nyan  
Lheueh nibak nyan laju beurangkat  
Deungon rakyat seukalian

Inong agam dum peureugi  
Meungkawalipi na sajan  
Han padum trep teuma dudoe  
Troh le sampoe geubeurjalan

Troh u nanggroe Taman Paridoh  
Geumupiyoh seukalian  
Teuma meugah u meuligoe  
Bak cut putroe nyang analan

Meugah ka troh Meungkawali  
Deungon umi dua sajan  
Deungon rakyat dum sinaroe  
Bineh nanggroe piyoh sinan

'Oh ban meuthee ubak raja  
U istana neukek yoh nyan  
Raja peugah bak esteuri  
He putroe ti nyang analan

Meugah ka troh peurmaisuri  
Meungkawalipi na sajan  
Tayue jak tueng laju sigra  
Ubak maja tapeugah ban

Wahe ma po deungo kamoe  
Jak tueng keunoe putroe intan  
Maja deungo haba putroe  
Beudoh jinoe hei ngon rakan

Boh ngon ranup dalam karah  
Maja langkah laju yoh nyan  
'Oh troh ubak putroe muda  
Po nek maja neukheun nyoe ban

Kru seumangat puteh leusoh  
Meuh seuneupoh nyang analan  
Tho ngon ranup dalam bungkoh  
Lon preh-preh troh putroe intan

Uroe malam lon meuteuoh  
He putroe jroh seulamat datang  
Bu meutuah bungong meulu  
Han tom lon eu cut bangsawan

Nyoe baro troh lon eu rupa  
Meuah deesya ngon lon tuan  
Tanoh di blang pula pade  
Tanoh di gle pula lawang

Wahe putroe panyot kande  
Bek trep lawi piyoh sinan  
Keudeh beutroh u meuligoe  
Jak eu putroe cut analan

Han got lagee gop kheun laku  
Bungong meulu trep di sinan  
Tamong po cut dalam kuta  
Jak eu cuda baro pulang

Meunan narit po nek maja  
Putroe muda tahe heran  
Hamilah Katon jawueub sigra  
He nek maja jroh analan

Insya Allah he nek teungku  
Jinoe laju lon beurjalan  
Lheueh nyan teuma po nek maja  
Peutamong lanja seukalian

U istana troh le sigra  
Ban nyan kada meuliaan  
'Oh troh keudeh dum seumua  
U istana geukek rijang

Meungkawali nyang jroh rupa  
Scumbah cuda gaki tangan  
Ruhon Afda putik sukron  
Hamilah Katon seumbah yoh nyan

'Oh lheueh seumbah keudeh keunoe  
Po sambinoe piyoh sinan  
Duek bak teumpat intan pudoe  
Sinyak putroe nyang analan

Hingga seupot le ngon uroe  
Geubot jinoe le hidangan  
Cukop hase sianeka  
Po nek maja neukheun yoh nyan

Ampon po cut bungong jeumpa  
Di jeumala dua tangan  
Kureueng meujeulih kamoe rimba  
Nibak maja he cut intan

Tacok ie jok peugot halua  
Asoe kaya teumon manisan  
Makeuen po cut bu ngon sira  
Teumpat maja jeuoh peukan

Tabeue masen bek peue takheun  
He cut buleuen bungong rihan  
Deungo po nek peugah haba  
Khem teurtawa putroe intan

Sira neukheun Meungkawali  
Neujaweueb le meunoe macam  
Bek le hai nek peugah haba  
Neuduek sigra keunoe sajan

Po nek maja le that tuto  
Bak meuato utoh han ban  
Maja deungo haba putroe  
Neuduek le toe ngon cut intan

Buka sahab meuceuradi  
Cok seurahi neusrah tangan  
Hingga cukop dumpeue hase  
Geumakeuen le seukalian

'Oh lheueh makeuen ka seuleusoe  
Pinah dudoe le hidangan  
Ampon po cut kheun nek maja  
Hajat cuda bungong keumang

Neugade langkah u istana  
Bek trep lama he buleuen trang  
Putroe deungo haba maja  
U istana ek le rijang

Geupiyoh le sapat dua  
Deungon cuda dua sajan  
Ruhon Afda buka tuto  
He adek e bungong peukan

Pakon adek pijuet tuboh  
Sang-sang sunggoh keudukaan  
Asoe han le muka pucat  
Peue na hajat adek badan

Miseue ureueng tunu hate  
Sang-sang ka cre seukalian  
Meunan bangon lon eu rupa  
Kadang cit na keusalahan

Teuma seuot Meungkawali  
Bek Allah bri cuda badan  
Hana cuda di lon salah  
Peue neupeugah keu lon tuan

Han tom lon eu ureueng lakoe  
Dalam nanggroe suntok zaman  
Wahe adek bungong puteh  
Hanlon pateh bungong peukan

Beuthat takheun meunoe meudeh  
Han lon pateh adek badan  
Le that tanda ulon lihat  
Jeuep-jeuep teumpat keunyataan

Hana cuda di lon salah  
Cit lam dasyah suntok zaman  
Bek neupateh haba peusuna  
Wahe cuda nyang budiman

Wahe cuda putik langsat  
Na peue hajat ulon tuan  
Napsu ulon keumeung tanyong  
Kheun beukeunong cuda badan

Padum na trep dalam huteuen  
Cuda neukheun bak lon tuan  
Ho rot neuwoe da meutuah  
Pakri ek leupah bak jen setan

Teuma seuot Ruhon Afda  
He adekda deungo laman  
Teungoh lon duek di istana  
Trok le teuka sidroe ensan

Rupa indah kon sigeutu  
Soe nyang na eu reubah pangsan  
Muda seudang that samlakoe  
Hana sidroe na teuladan

Lagi gagah ngon beurani  
Le that sakti ngon seunuban  
'Oh troh geuek u meuligoe  
Ubak kamoe geukheun rijang

Wahe putroe cahya mata  
Peue bu bangsa gata intan  
Ayah uni soe geuheu gla  
Putroe muda soe saleh nan

Teuma lon kheun he adek beh  
Taman Paridoh nanggroe laman  
Ruhon Afda nama kamoe  
Yoh di nanggroe ayah boh nan

Ulon teunyoe bangsa pari  
Meungkawali adek laman  
Bak siuroe lon peureugi  
Meurumpok le deungan setan

Jidrop ulon bak rot raya  
Keunoe jiba dalam hutan  
Padum uroe lam awan hijo  
Jiba laju patek laman

Meuna gaseh po meukuta  
Neucok hamba bak jen setan  
Bek lam huteuen suntok masa  
He meukuta gaseh sayang

Teuma lon tanyong he adekda  
Po meukuta soe geuhei nan  
Pat bu nanggroe po meukuta  
Ubak hamba neupeugah ban

Teuma geukheun ubak kamoe  
Ulon teunyoe bangsa ensan  
Nama ulon bek tasudi  
Nama neugri Syarikatan

Teuma geucok ulon sidroe  
Geuba jinoe rot lam awan  
Peiduek ateueh guda hekeurnat  
Sakti le that adek badan

Kamoe meujak na sikhan rot  
Ka jiseutot le jen setan  
Muploh ribee hantu seutot  
Ureueng got-got dum pahlawan

Ngon kuasa Rabbon Kade  
Habeh mate dum geusimpan  
Deungon tulong gop nyan sidroe  
Troh geupuwoe ulon tuan

'Oh troh keunoe Taman Paridoh  
Geupiyoh bak bineh hutan  
Geuyue woe lon bak ayahda  
Ulon maba gop nyan sajan

Han geutem jak he adekda  
Geumeudawa meunoe meunan  
'Oh han ek le ulon maba  
Lon woe lanja adek badan

Tinggi gop nyan sajan guda  
Saleh hoka lheueh nibak nyan  
Teuma seuot Meungkawali  
He cuda ti pakon meunan

Hana patot han troh neuba  
Dumnan guna he da badan  
Geucok cuda dalam gunong  
Geujok nyawong ubak Tuhan

Adat meukon gop nyan puwoe  
Sampoe dudoe mantong sinan  
Ibu bapak han taeu le  
Hingga mate dalam hutan

Dumnan guna manusia  
Han ek cuda na balasan  
Bit nyo cuda hana tuah  
Neupeuleupah geubeurjalan

Adat tajok kuta nanggroe  
Han cit sampoe ngon guna nyan  
Adat meung lon he da bungong  
Bahle nyawong geuba sajan

Lon peutamong lam istana  
Bak ayahda lon peugah ban  
Meunyo bit-bit han geutem jak  
Sitapak han lon cre sajan

Beukit geupeugot baranggakri  
Han lon weh le he da badan  
Bit nyo cuda han got basa  
Tan seutia meunyo meunan

Meunan jikheun Meungkawali  
Sebab hate that dukaan  
Teungoh marit bungong pade  
Ka teungeut le dua sajan

Hingga beungoh le ngon uroe  
Beudoh putroe nyang analan  
Geujak u mon po sambinoe  
Geujak manoe dua sajan

'Oh lheueh manoe bandua droe  
Geungui jinoe le pakaian  
Teuma marit Ruhon Afda  
He adekda deungo laman

Wahe adek bungong jeumpa  
Jak udehta dalam taman  
Le that bungong sinan jroh-jroh  
Hana saboh nyang sa ngon nyan

Hijo biro kuneng mirah  
Bee mupeuah hana lawan  
Bak bungong he adek droe  
Dalam nanggroe tan teuladan

Dalam rimba ulon puwoe  
Jak sambinoe takalon ban  
Meunan jikheun Ruhon Afda  
Po jroh rupa seuot yoh nyan

Bit na cuda ban neupeugah  
Sang beurakah cuda badan  
Kon hai adek lon meuseunda  
Sabet beuna ban lon kheun ban

Meunyo hana ban lon peugah  
Nan taubah ulon tuan  
Ruhon Afda meunan rawi  
Meungkawali beudoh yoh nyan

Geujak laju bandua droe  
Hingga sampoe ubak taman  
'Oh troh keunan po sambinoe  
Deungo bunyoe indah han ban

Meujan-jan ban su biula  
Na siat ka suara ensan  
Na siat sang buloh meurindu  
Soe deungo su ladat han ban

Sikeujap sang ureueng bae  
'Oh tadeungo teuka sayang  
Suara gambang syae panton  
Akhe ngon phon jroh lakuan

Meungkawali teudong tahe  
Ie mata ro basah badan  
Gaduh pike Meungkawali  
Dumnan bunyi dalam hutan

Jitanyong le teuma sigra  
Wahe cuda peue meusu nyan  
Teuma seuot Ruhon Afda  
He adekda tan lon tuban

Han tom nyang ka meunan bagoe  
Bak uroe nyoe lon deungoran  
Baroe nyang na he adekda  
Ureung gila geujak keunan

Bek le tajak bungong jeumpa  
Geupoh gata le ureueng nyan  
Meunan jikheun Ruhon Afda  
Putroe muda seuot rijang

Di lon cuda hana lon woe  
Mangat bunyoe lon deungoran  
Bah lon jak eu siat jinoe  
Ureueng sidroe lon takot tan

Galak hate lon cuda beh  
Bahle beutroh lon jak keunan  
Ruhon Afda jawueb meunoe  
Di lon kuwoe adek badan

Han lon jeuet jak keunan rab toe  
Geupbh kamoe le ureueng nyan  
Ruhon Afda laju gisa  
Pura-pura peutakot nyan

Meungkawali jikheun meunoe  
Beuthat neuwoe cuda intan  
Bahle lon jak keunan sidroe  
Adat rugoe pi lon paban

Jijak laju putroe buleuen  
Wie ngon uneun tan jipandang  
Teutap putroe jijak lanja  
Lon calitra banta seudang

Tajul Muluk lon hareutoe  
Sinan sidroe dalam taman  
Hana sapeue teuingat le  
Bungong pade sosah han ban

Syae panton nyan di babah  
Neukisah keu putroe intan  
Neuseubot nan Meungkawali  
Malam hari tan lupaan

Bak uroe nyan teungku ampon  
Syae panton indah han ban  
Deungo teelan ulon rawi  
Panton doli nyang mulaan

Bismillah ngon nama Allah  
Alhamdulillah pujo Tuhan  
Muhammadon Rasulullah  
Lon paban bah nasib badan

Puteh-puteh bungong giri  
Kasturi ngon bungong peukan  
Wahe putroe Meungkawali  
Han ingat le keu lon tuan

Dumnan ulon lam seungsara  
Di gata meung hiropi tan  
Bukon sayang bungong meulu  
Sret meutabu soe pileh tan

Teugo bunda peutroh napsu  
He cut meulu gata bek meunan  
Bukon sayang bungong jeumpa  
Geujak mita jeuep-jeuep peukan

Ya Ilahi Tuhan kaya  
Putoh asa ulon tuan  
Di laot na kapai raya  
Keumeung bungka u Beulawan

Pakon lupot putroe muda  
Han troh teuka bak lon tuan  
Wahe Tuhan Po Nyang Esa  
Neubri teuka putroe intan

Rindu hate lon han tara  
Ya Rabbana apon badan  
Tajul Muluk meunan haba  
Ngon ie mata sret meurumpan

Teungoh bae po samlakoe  
Sinyak putroe pi troh keunan  
Yoh nyan putroe tahe gante  
Malee sипу bungong rihan

Jikeumeung jak malee mata  
Keumeung gisa han meukri ban  
Dalam hatejih that murok  
Tajul Muluk nyang meusu nyan

Adat meukon po samlakoe  
Pakon kamoe geuteuoh nan  
Meunan leumah dalam hate  
Bungong pade susah han ban

Ya Tuhanku Rabbon Kade  
Neupeulahe bak lon tuan  
Teuma pike bungong meurak  
Bahle lon jak keunan rijang

Kadang cit nyo po meukuta  
Bah lon buka ngon pakaian  
Jijak laju putroe buleuen  
Trok bak rinyeun laju keunan

Jiek laju bungong tajok  
**Tajul Muluk** cit ka meunan  
**Bit** ka leumah po samlakoe  
Goh cit meusoe bak pandangan

Sebab banta teungoh keudroe  
Teungoh neumoe po bangsawan  
Tumpang ulee bungong husen  
**Nap** ho laen bak masa nyan

**Hana** neuthee bungong rambot  
**Dong** di likot putroe intan  
Tatkala nyan Meungkawali  
Ka jituri po bangsawan

Peurab laju putroe siti  
Com bak gaki po jonjongan  
**Tajul Muluk** ka teukeujot  
Sang-sang peue sret ateueh badan

'Oh ban neueu po samlakoe  
Leumah putroe cahya intan  
Ban neukalon Meungkawali  
Reuloh hate han meuban-ban

Putroe seumbah banta muda  
Sret ie mata ngon meubram-bram  
Meungkawali ka jibae  
He tuanku ampon laman

Meuah ampon tuanku droe  
Ulon teunyoe that salahan  
Awai akhe lahe baten  
Neubri idin he jonjongan

Kayee raya jroh hijo on  
Meuhimpon cicem meukawan  
Bek neuhaloh nyang salah lon  
Neupeuampon seukalian

He tuanku tangke hate  
Malam hari lon cintaan  
Seulawet tan tuanku droe  
Ulon teunyoe lam dukaan

Pie ayah deungon umi  
Lon geurante gaki tangan  
Lam peunjara lon geupasoe  
Malam uroe teutap sinan

Ban nyang kheundak Tuhan sidroe  
Ulon teunyoe that relaan  
'Oh lon ingat wahe doli  
Toe rab mate ulon tuan

Kadang ho-ho ka teubade  
Saleh mate po jonjongan  
Saleh ka sret dalam laot  
Ajai mawot syahi alam

'Oh lon ingat han meusampe  
Got beumate patek laman  
Keupue guna peutoe kaca  
Meunyo hana peue tasimpan

Keupeue guna udep hamba  
Meunyo hana po jonjongan  
Keupeue guna kapai raya  
Meunyo hana lem kapitan

Keupeue guna patek hamba  
Po meukuta dalam awan  
'Oh ka malam lon uem ija  
Sebab meukuta hana sajan

Pie ayah deungon umi  
Geuboh doli han meuban-ban  
Meunan jikheun Meungkawali  
Po juhari seuot rijang

Jak lam paya pot beuramoe  
Tapuwoe peugot beulacan  
Pihak ka troh keunoe lon woe  
Wahe putroe nyo bit meunan

Adat jadeth ulon mate  
Bungong pade that sukaan  
Jeuet tagantoe ureueng diwa  
Nyang sa bangsa putroe intan

Teungoh u gle pot bungong ta  
Meukerija bungong tangan  
Lah na untong udep hamba  
Nibak baya seukalian

Tujoh buleuen dalam laot  
Riyeukek bapot lon he intan  
Karonya Po Tuhan Ma'bud  
Lon teusurut bineh hutan

Bukon sayang lon eu awe  
Pucok mate sret meukhan-khan  
Wahe putroe bungong pade  
Bek tawueuh le keu lon tuan

Tacah tanah pula gapeueh  
Aneuk tulo breueh tren meukawan  
Bak uroe nyoe taeu/beudeuh  
Bek le tawueuh lon beurjalan

Bukon sayang cicem nuri  
Ka mate di dalam taman  
Ulon teunyoe geupoh mate  
Meungkawali lam duakaan

Jaroe gaki geuboh rante  
Hana lheueh le baranggajan  
Po sambinoe sosah hate  
Hingga mate ngon sebab nyan

Nyankeuh lon kheun bungong geutoe  
Le that rugoe judo badan  
Adat tatueng lon keu judo  
Malee sipu putroe intan

Ulon teunyoe manusia  
Ngon diwa han sabe padan  
Meungkawali aneuk raja  
Lon nyoe hamba biek teubosan

Teulah dudoe po jroh rupa  
Malee mata nibak rakan  
Pane ek jeuet batee kaca  
Ngon meutia tapeulawan

Nyankeuh lon kheun bungong pade  
Beuta pike narit lon nyan  
Reudok geulanteue kilat muble  
Ka runtoh gle nanggroe Asahan

Seulamat tinggai jantong hate  
Idin tabri lon beurjalan  
Meunyo han ek lon theun hate  
Bahle mate lon lam hutan

Lon paban bah meuh seuneupoh  
Ka meunan roh nasib badan  
Meunan narit banta muda  
Ngon ie mata sret meurumpam

Meunyo neujak po meukuta  
Patek hamba neuba sajan  
Bunda abi han lon weueh le  
Lon kumate ngon jonjongan

Hana hajat lon meukawen  
Raja laen nyang meugahan  
Deumi Allah deungon Nabi  
Nyankeuh doli judo badan

Sira marit sira jimoe  
Jitumbok droe putroe intan  
Jilungkop droe bak gaki banta  
Ngon ie mata basah badan

Dumnan di lon po meukuta  
Rugoe laba lon relaan  
Tuboh pijuet muka pucat  
Seubab lon ingat keu jonjongan

Bek antara geuboh rante  
Adat mate lon relaan  
Dumnan di lon lon theun hate  
Ampon doli neukheun meunan

Wahe Tuhan Rabbon Kade  
Neubri mate patek laman  
Teungoh jimoe putroe muda  
Ruhon Afda troh le keunan

'Oh sare troh cut sambinoe  
Jieu adoe that syugolan  
Teungoh po droe bungong jeumpa  
Ruhon Afda jikheun nyoe ban

Wahe adek bungong geutoe  
Bek le tamoe wahe intan  
Keupeue tamat ureueng lakoe  
Goh tatusoe he buleuen trang

Bit sinyak nyoe hana malee  
Ureueng jamee tajak tawan  
Peue cit takheun bak lon baroe  
Hana sidroe nyang cintaan

Teuma seuot Meungkawali  
He cuda Ti bek kheun meunan  
Hana malee lon cuda e  
Nyankeuh judo di lon tuan

Sampoe lon duek lam peunjara  
Keu meukuta lon cintaan  
Bek antara geuboh rante  
Adat mate pi lon paban

Ka neutupeue cuda bungong  
Peue neutanyong bak lon tuan  
Meunan narit bintang kala  
Ruhon Afda jjiem yoh nyan


Tajul Muluk lom peugah proe  
Wahe putroe cahya intan  
Bek le tamoe bungong pade  
Goh lom mate ulon tuan

Insya Allah Tuhan neubri  
Ka meusampe ban cintaan  
Ban nyang hajat po sambinoe  
Tuhan sidroe bri sampoekan

Tajul Muluk meunan kata  
Putroe muda jjiem yoh nyan  
Rotdeh rotnoe mangat hate  
Han sapeue le keusosahan

Na sikeujab teuma dudoe  
Sinyak putroe jikheun nyoe ban  
Neubri idin po meukuta  
Lon jak gisa he jonjongan

Deelat ampon tinggai sinoe  
Ulon sidroe kubeurjalan  
Tajul Muluk jawueub bagah  
Insya Allah judo badan



Jak he judo beu seulamat  
Bek lupa that keu lon tuan  
Akan teutapi bungong riwat  
Sang han mangat meunan macam

Bak lon sangka putik sukon  
Tajak tueng lon putroe intan  
Hana lon thee po sambinoe  
Peuleumah droe bak lon tuan

Meungkawali teuma seuot  
Leumah leumbot peurkataan  
Pakon tuanku hate lupot  
Ngieng u likot po jonjongan

Dumnan di lon po meukuta  
Na cit haba keu lon tuan  
Meunan narit sinyak putroe  
Sira jimoë basah badan

Putroe jimoë meusok-meusok  
Cit lam dawok keulaparan  
Pakon tamoe bungong tajok  
Tajul Muluk ka na sajan

Takheun tawoe po sambinoe  
Nibak kamoe tan larangan  
'Oh lon ingat po juhari  
Di gop sakri di lon saban

Nyankeuh sebab lon kheun meunoe  
Kon hai putroe lon beuncian  
Jak hai judo woe u teumpat  
Bek trep lambat dalam taman

Marah ibu ngon ayam  
Putroe muda keudukaan  
Bek hai judo le tatheun droe  
Meuraba-raba jeuep-jeuep hutan

Tajul Muluk meunan kata  
Putroe muda jaweueb yoh nyan  
Bukon sayang bungong seurunoe  
Putoh taloe sret meukarang

He tuanku payong nanggroe  
Bek neuhiro buet ka zaman  
Meung neupeugah sabe-sabe  
Neupoh mate lon jonjongan

Meuhan tuanku habeh pike  
Han lon woe le gampong laman  
Ho nyang neujak po meukuta  
Ulon neuba jinoe sajan

Meunan narit Meungkawali  
Ateueh doli jitiek badan  
Jiseumpom droe ateueh banta  
Jimoe rugha putroe intan

Tajul Muluk marit meunoe  
Bek tamoe bungong peukan  
Jak leh tawoe bungong sukon  
Bah tinggai lon dalam taman

Meuna idin Tuhan Esa  
Troh lon gisa ubak intan  
Nyang jinoe bah tinggai dilee  
Bungong keumbee bek syugolan

Meunan narit Tajul Muluk  
Bungong tajok jimoe kiam  
Teutap jimoe putroe muda  
Ruhon Afda marit yoh nyan

Wahe adek bungong jeumpa  
Deungo cuda wahe intan  
Pakon adek sosah hate  
Goh lom mate po jonjongan

Jinoe adek nyang meurasa  
Jak tagisa gampong laman  
Meuka tawoe bak ayahda  
Lon bicara lheueh nibak nyan

Meuna umu bungong keumbee  
Banta tathee beuna sajan  
Lon nyang puwoe po meukuta  
Bek le rugha adek badan

Meunan narit Ruhon Afda  
Putroe muda woe le yoh nyan  
Sira jijak po jroh rupa  
Di nap banta nyang analan

Tuanku bek paleng muka  
Ingar guna putroe intan  
Meung trep neuwoe wahe doli  
Meungkawali han le sinan

Ulon teunyoe neuniet tan le  
Ka mate di dalam hutan  
Demi Allah deungon Nabi  
Han ubah le ban lon kheun nyan

Habeh sumpah bintang kala  
Di nap banta nyang bangsawan  
Tajul Muluk bungong pade  
Neujaweweub le haba nyoe ban

Aneuk meureubok kutru bak data  
Aneuk rawa di cong asan  
Jak leh tawoe putroe muda  
Ubah hana bak lon tuan

Meunyo cit na idin Rabbi  
Tujoh hari tapreh laman  
Bit pi meunnan putroe indah  
Nibak ayah han lon tuban

Bek antara geubri lon woe  
Meunanggroe bek lon kalon ban  
Meunyo geutham bak siseun nyoe  
Jadeh putroe lon meulawan

Ka sep he nyak lon bri nama  
Keu ayahda trep ka zaman  
Uroe nyoe ka habeh pike  
Bangsa pari kumeung simpan

Rakyat raja kupoh mate  
Bek weueh hate putroe intan  
Meukon meunan po juhari  
Han geuturi bangsa ensan

Han geuturi le ayahda  
Aneuk raja Syarikatan  
Kon teukabo lon bak Rabbi  
Seuhari han peue lon simpan

Nakeuh diwa bangsa pari  
Leubeh lagi yoh lam hutan  
Jen hitam masa saboh roe  
Muploh katoe ngon angkatan

Tajul Muluk hana cit gli  
Bek nyang pari na dua khan  
Insya Allah judo payong  
Deungon tulong Poku Tuhan

Bek tawueuh le bungong sukun  
Reuloh gampong deungon midan  
Deumi Allah kupoh mate  
Walee meuseuke po jonjongan

Uteuen seumak lon niet jalan  
Gunong manyang lon niet midan  
Bak masa nyoe cit lon pike  
'Oh ka mate habeh jalan

'Oh mate lon di blang raya  
Ban nyang suka gata intan  
Tameukawen soe nyang suka  
Bangsa diwa sabe wadan

Ulon judo ka lheueh adat  
Hana sapat keumaluan  
Asai nyang bek jeuheut nama  
Gop upat ceula bangsa ensan

Meungkawali deungo haba  
Sret ie mata han meuban-ban  
Weueh keu judo po sambinoe  
'Oh troh geuwoe saleh pakri ban

Kadang meuhat jeuet prang raya  
Ho troh hamba wahe Tuhan  
Weueh keu ayah saboh bagoe  
Po sambinoe hate rawan

Meunan pike putroe muda  
Ruhon Afda kheun lom yoh nyan  
Bek le tamoe bungong pade  
Po tallah bri keubajikan

Insya Allah he adekda  
Na bicara bak lon tuan  
Meungkawali seuot bagah  
Bu meutuah he da badan

Teuma beudoh putroe muda  
Jiwoe lanja gampong laman  
'Oh troh jiwoe u istana  
Trok le sigra ngon hidangan

Putroe makeuen le bandua  
Sama-sama putroe intan  
'Oh lheueh makeuen po juhari  
Peurmaisuri troh le keunan

Teuma tanyong peurmaisuri  
He boh hate pane jalan  
Seuot putroe nyang jroh rupa  
Sajan cuda jak lam taman

Peurmaisuri tanyong bagah  
Peue na leumah taeu sinan  
Teuma seuot Meungkawali  
Han ek doli lon peugah ban

Cukop dumpeue sinan lahe  
Hireuen hate lon kalon ban  
Peurmaisuri galak han soe  
Teuma dudoe tren le sinan

Uroe pi ka seupot laju  
Ek u leupu putroe intan  
Malam jula jak beuradu  
Bungong meulu dua sajan

Teuma marit Meungkawali  
He cuda ti pakon meunan  
Han neupeugah deungon teupat  
Ampoñ deelat dalam taman

Ruhon Afda jaweueb bagah  
Hana salah lon hai intan  
Ulon tanyong awai akhe  
He putroe ti tapeugah han

Nyankeuh sebab han lon peugah  
Takot salah ulon tuan  
Meunan narit Ruhon Afda  
Khem teurtawa cut analan

Sebab hana ulon lahe  
Ampoñ doli ion sangka tan  
Hana lon thee da meutuah  
Na neuukeubah dalam taman

Teungoh marit po sambinoe  
Bandua droe teungeut pangsan  
Hingga teuma beungoh uroe  
Tren jak manoe dua sajan

'Oh lheueh manoe bungong pade  
Ka jinggui le dum pakaian  
Na sikeujap teuma dudoe  
Ka troh sampoe ngon hidangan

'Oh lheueh makeuen ka seuleusoe  
Raja nanggroe neukheun yoh nyan  
Wahe aneuk bungong geutoe  
Jinoe tawoe bak sulotan

Meungkawali jaweueb pantah  
Insya Allah po jongjongan  
Cukop hase sianeka  
Putroe muda le berjalan

Padum na trep di rot raya  
Trok lam kuta bungong rihan  
Hamilah Katon kalon rupa  
Hate suka hana macam

Teutap putroe lam istana  
Deungon bunda sinan sajan  
Teuduek dilee putroe muda  
Ruhon Afda lon peugah ban

'Oh leupah woe Meungkawali  
Cut putroe ti hate rawan  
Teuingat keu Tajul Muluk  
Bungong tajok nyang bangsawan

Seubab geubri jroh that guna  
Pakri daya tabalasan  
Adat kon na gob nyan sidore  
Han soe puwoe aneuk badan

Teuma marit peurmaisuri  
Bak lon doli saboh padan  
Ruhon Afda bungong kipah  
Yue peunikah ngon bangsawan

Bit pi meunan wahe doli  
Ubak siti tatanyong ban  
Meunan narit peurmaisuri  
Raja doli jaweueb rijang

Wahe judo deungo kamoe  
Gata sidroe nyang tanyong ban  
Peurmaisuri tanyong leugat  
Bungong riwat jaweueb rijang

Han jeuet bunda lon meunikah  
Ka lheueh sumpah lon ngon gop nyan  
Tajul Muluk banta muda  
Aneuk raja Syarikatan

Gop nyan sidroe that beurani  
Le that sakti ngon seunuban  
Lagi gagah that peurkasa  
Cit geuthee na bangsa ensan

Masa dilee he ma ubon  
Hamilah Katon srom lam awan  
Tujohe buleuen kalang kalot  
Sret lam laot he ma badan

Uroe malam bakat beuot  
Han jeuet karot bungong peukan  
Nyang geulakee ubak Rabbi  
Meungkawali judo badan

Masa geujak dalam rimba  
Deungo he ma lon peugah ban  
Cit lam geumoe rok-rok masa  
Putroe muda geuseubot nan

'Oh lon deungo meunan haba  
Lon kheun teuma meunoe macam  
Deelat ampon payong nanggroe  
Bek le neumoe po jonjongan

Meungkawali nyang sambinoe  
Adek kamoe putroe seudang  
Meuna umu po samlakoe  
Lon peujaroe keu jonjongan

Habeh janji ma teungku droe  
Lon geupuwoe rot lam awan  
Geumuprang ngon jen ceulaka  
Rakyat dumna habeh simpan

Nyankeuh he ma cuba pike  
Jalan pakri lon sampoekan  
Lom pi adek Meungkawali  
Na peureugi dalam taman

Ka meurumpok ngon putroe ti  
Banta ahli nyang budiman  
Ka lheueh janji bandua droe  
Tujoh uroe bri tanggohan

Geubri tanggoh tujoh uroe  
Troh le geuwoe bak cut intan  
Meunyo geutham watee geuwoe  
Hanco nanggroe he ma badan

Rakyat raja geupoh mate  
Meunan janji po bangsawan  
Ka lon peugah awai akhe  
Raja doli that dukaan

Peurmaisuri deungo haba  
Sret ie mata han meuban-ban  
Ubak raja geujak pantah  
Geujak peugah dum haba nyan

Habeh geukheun awai akhe  
Baten lahe seukalian  
Teuma marit raja nanggroe  
Ubak meuntroe neukheun nyoe ban

Wahe meuntroe bungong tajok  
Tajul Muluk aneuk laman  
Ruhon Afda nyang sambinoe  
Gop nyan puwoe dalam hutan

Adat meukon gob nyan puwoe  
Mate keudroe aneuk badan  
Meung patot mee putroe muda  
Nyang po jeumba cut bangsawan

Akan teutapi he peurdana  
Putroe muda tan sukaan  
Seubah dilee ka lheueh janji  
Meungkawali judo badan

Meuhan tabri po sambinoe  
Akhe dudoe keususahan  
Nanggroe reuloh rakyat mate  
Jihanco le po bangsawan

Jen hitam nyang le that sakti  
Habeh mate dum jisimpan  
Meung geutanyoe he peurdana  
Hana daya prang talawan

Meuntroe deungo sabda raja  
That meurasa dalam badan  
Meuntroe jawueub meunoe haba  
Ban nyang suka bak jonjongan

Meunyo meunan he peurdana  
Peulinggoe Pura tabeurjalan  
Bahle gata keu teulangke  
Peurmaisuri taba sajan

Meuntroe deungo titah raja  
Beudoh lanja le beurjalan  
Peurmaisuri sajan geuba  
Hingga teuma troh lam taman

Geutamong le dalam kuta  
Ngon peurdana dua sajan  
Hamilah Katon kalon rupa  
Jitren sigra mumat tangan

Lheueh meuteumeung bandua droe  
U meuligoe peuek rijang  
Na sikeujap duek mupiyoh  
Dendayang troh jiba puan

Putroe pajoh ranup sigapu  
Putroe meusu buka kalam  
Wahe adek cahya mata  
Deungo hamba wahe intan

Meungkawali nyang sambinoe  
Hoka jinoe adek badan  
Hamilah Katon peugah laju  
Na di leupu bungong rihan

Padum na treb ka hana bu  
Ia mata ro basah badan  
Saleh saket bungong meulu  
Sianeuk bu tan jimakan

Hamilah Katon meunan rawi  
Peurmaisuri jaweueb yon nyan  
Idin gata bungong sukon  
Lon jak kalon putroe intan

Troh u rumoh neupeureugi  
Meungkawali ka na sinan  
'Oh ban jieu ka troh bunda  
Putroe muda beudoh rijang

Meungkawali com di teuot  
Putroe sambot dua tangan  
Teungoh seumbah teuot bunda  
Sret ie mata miseue hujan

Teuma marit peurmaisuri  
He boh hate pakon meunan  
Pakon aneuk sosah hate  
Soe tapike wahe intan

Teuma seuot Meungkawali  
Lon he umi sosah han ban  
Saleh mate lon troh masa  
Wahe bunda han lon tuban

'Oh lon ingat pie umi  
Deungon doli dua sajan  
Suntok masa lon geubeunci  
Gotkeuh bahle lon beurjalan

Bahle lon jak u dalam gle  
Mangat mate rimueng kuran  
Meunan narit Meungkawali  
Peurmaisuri seuot rijang

Wahe aneuk tangke hate  
Bek tamoe le bungong peukan  
Bek he aneuk jak lam rimba  
Ngieng keu bunda he buleuen trang

Nyandum aneuk lon usaha  
Rugoe laba lon relaan  
Kon peue laen lon bicara  
Cit keu gata wahe intan

Lon nyoe aneuk keu teulangke  
Ubak doli ayah intan  
Bek le aneuk hate gundah  
Jok bak Allah seukalian

Meunggoh mupeue hana lon woe  
He sambinoe bek dukaan  
Meunan narit peurmaisuri  
Meungkawali suka han ban

Habeh haba cut putroe Ti  
Peurmaisuri ek le rijang  
'Oh sare troh u meuligoe  
Raja nanggroe troh le keunan

Mumat jaroe peurmaisuri  
Geutanyong le haba nyoe ban  
Wahe cuda pirak lipat  
Peue na hajat cuda badan

Wahe adek lanja keunoe  
Suroh putroe lon beurjalan  
Ruhon Afda bungong meulu  
Jimeunapsu putroe intan

Yue ba saleuem keu meukuta  
Saboh haba deelat laman  
Teuma seuot raja deelat  
Peue na hajat aneuk badan

Peurmaisuri jaweuueb sigra  
Ampon hamba po jonjongan  
Ruhon Afda tangke hate  
Malam hari beurcintaan

Meungkawali bungong seuke  
Jigade bak po jonjongan  
Jipeukawen uleh putroe  
Deungon adoe nyang bangsawan

Tajul Muluk nyang seutia  
Aneuk raja Syarikatan  
Ruhon Afda jih nyang puwoe  
U nanggroe Paridoh Taman

Ngon jen hantu jimupake  
Malam hari prang jilawan  
Rakyat raja habeh mate  
Keunong sakti cut bangsawan

Ruhon Afda bungong kipah  
Ka lheueh sumpah dua gop nyan  
Jimeuseubot aduen adoe  
Sampoe dudoe jiubah han

Nyankeuh sebab wahe deelat  
Jiharap that bak jonjongan  
Meuhan neubri bungong riwat  
Jeuet meularat akhe zaman

Dum jen hitam nyang beurani  
Ka lheueh mate buet bangsawan  
Meung geutanyoe ampon doli  
Baranggakri han ek lawan

Tajul Muluk that jigade  
Jimeunghan bri han meukri ban  
Akan teutapi meuhat teumakot  
Jikalon buet cut bangsawan

Bak masa nyan raja nanggroe  
Ingar keudroe malee han ban  
Lheueh nibak nyan teuma dudoe  
Peurdana meuntroe neuhei keunan

Huleebalang meuntroe kali  
Ka troh ili laju keunan  
Meuteumeung le deungan raja  
Jaroe dua beuot meulayang

Deelat ampon po meukuta  
Peue na haba neuhei laman  
Teuma sabda raja raya  
Keu aneukda neupeugah ban

Meungkawali nyang sambinoe  
Ubak kamoe troh habaran  
Tajul Muluk ka troh jiwoe  
Dalam nanggroe Paridoh Taman

Bak lon sangka jih ka mate  
Buet putroe ti srom lam awan  
Teuma jinoe ka troh gisa  
Jibri haba bak lon tuan

Jimeuhajat Meungkawali  
Meung han lon bri prang jilawan  
Jen hitam ka jipoh mate  
Cok putroe ti dalam hutan

Ruhon Afda jih nyang puwoe  
Troh u nanggroe Paridoh Taman  
Jinoe meuntroe pakri pakat  
Cuba ingat dum sibarang

Patot tabri putroe muda  
Nyankeuh raja nyang bangsawan  
Atawa bek cuba pike  
Gotkeuh bahle prang talawan

Nibak ulon dumkri hase  
Udep mate lon relaan  
Meunan sabda raja nanggroe  
Wadi meuntroe jawueub yoh nyan

Meuah ampon po meukuta  
Nibak hamba saboh padan  
Bek tuanku hate luka  
Meunyo cit na patek laman

Barang peue buet ek mupike  
Bek hai doli keususahan  
Soe meuahajat putroe indah  
Neupeunikah po jonjongan

Seubab gop nyan bahgia that  
Laot darat han soe lawan  
Kon kamoe peutakot deelat  
Deuh neulihat buet bangsawan

Ka lheueh neusrom dalam hawa  
Padum lama han cit simpan  
Dalam laot sret lam bakat  
Malaikat sambot rijang

Meung kon gop nyan sakti le that  
Han le hayat he jonjongan  
Lom tuanku tueng ibarat  
Aneuk deelat putroe intan

Ruhon Afda gop nyan puwoe  
U nanggroe Paridoh Taman  
Adat kon na gop nyan sidroe  
Mate putroe dalam hutan

Jen hitam nyàng le that sakti  
Lom beurani le seunuban  
Akan teutapi ampon deelat  
Deungon siat habeh simpan

Ingat beuthat wahe doli  
Meuhan meukri keurugian  
Tinggai doli dua lhee droe  
Geunap uroe keumaluan

Dum jen hitam ka mupaloe  
Meung geutanyoe siat han jan  
Nyankeuh lon kheun ampon deelat  
Ingat beuthat he sultonan

Meunyo neutueng keu meulintee  
Gadoh malee po jonjongan  
Adat teukeudi teuka bala  
Na aneukda prang jilawan

Deelat tuanku neuduek saja  
Rugoe laba buet bangsawan  
Meunan bak lon nyang meurasa  
Laen teuma bak jonjongan

Meunan narit peurdana meuntroe  
Raja nanggroe tahe heran  
Teuma seuot raja nanggroe  
Wahe meuntroe nyang budiman

Ban nyang pakat nibak gata  
Hana dawa bak lon tuan  
Jinoe takrah bandum rakyat  
Timu barat seukalian

Inong agam tuha muda  
Tayue teuka dum u midan  
Takheun ulon meukeurija  
Lon bri jeumba putroe intan

Meunan narit nibak raja  
Lem peurdana beudoh rijang  
Yoh nyan meuntroe jikrah rakyat  
Raja deelat lon peugah ban

Habeh narit deungon meuntroe  
Raja neuwoe laju yoh nyan  
Meuteumeung le peurmaisuri  
Raja doli neukheun nyoe ban

Wahe cuda bungong pade  
Rela hate bak lon tuan  
Ban nyang hajat Ruhon Afda  
Rugoe laba lon relaan

Pajan hase bak aneukda  
Peugah haba bak lon tuan  
Meunan sabda nibak doli  
Peurmaisuri jawueb kalam

Insya Allah payong nanggroe  
Idin lon woe po jonjongan  
Teuma seuot po teuraja  
Idin cuda bak lon tuan

Lheueh nyan beudoh peurmaisuri  
Woe keumbali gampong laman  
Deungon meuntroe nyang juhari  
Peurmaisuri laju pulang

Padum lawet di rot raya  
Troh lam kuta putroe intan  
Meuteumeung le deungon raja  
Lom aneukda dua sajan

Teuma marit peurmaisuri  
Wahe doli deungo laman  
Ban nyang hajat Ruhon Afda  
Hate rela po jonjongan

Hana sapeue na meubantah  
Ngon meutuah putroe intan  
Yoh nyan raja neuhei meuntroe  
Neupeugah proe seukalian

Wahe meuntroe nyang seutia  
Rakyat dumna pangge rijang  
Inong agam tuha muda  
Beutroh teuka uroe Seunayan

Takheun ulon meukeurija  
Lon boh gaca aneuk badan  
Lheueh peurintah nibak raja  
Beudoh sigra meuntroe bujang

Jikrah rakyat dum sinaroe  
Jeuoh ngon toe dum sibbarang  
Inong agam keunan sampoe  
Ribee katoe bak bilangan

Di leuen peunoh mideuen sarat  
Geubri teumpat ban atoran  
Teuma sabda raja naggroe  
Ubak meuntroe nyang budiman

Jinoe peugot saboh surat  
Tayue intat keu sulton  
Ubak ayah Meungkawali  
Tapeugah kri buet peurasan

Malam Hameh phon lon mula  
Lon boh gaca aneuk badan  
Nyang di sinoe ka lon mula  
Sideh teuma ban sukaan

Peurdana meuntroe peugot surat  
Geuyue intat laju rijang  
'Oh troh waki jak ba surat  
Raja deelat sambot yoh nyan

Mula Fasyah buka surat  
Haba mangat sang manisan  
Mangat hate raja deelat  
Dalam surat buet ka meujan

Teuma neukheun bak peurdana  
Deungo hamba peugah macam  
Jinoe kamoe meukeurija  
Meung boh gaca putroe intan

Rakyatpi ka keunan sampoe  
Peurdana meuntroe peugah yoh nyan  
Wahe rakyat dum sinaroe  
Raja nanggroe beursukaan

Neupeukawen tuan putroe  
Ngon samlakoe nyang analan  
Tajul Muluk nyang samlakoe  
Tuan putroe nyan tunangan

Geutanyoe dum keunoe ka troh  
Toe ngon jeuoh dum sibarang  
Uroe malam bek le piyoh  
Bek na teudoh mupeurasan

Hingga teuma haba nyang toe  
Malam uroe tango kiam  
Peurasan meuribee bagoe  
Rakyat nanggroe that sukaan

Jisie lumo meureutoh ploh  
Keu peunajoh jamee datang  
'Oh habeh nyan laen ka troh  
Tango kiroh bukon wayang

Meunan sabé geunap uroe  
Teuduek 'oh noe keu sulotan  
Tajul Muluk bungong geutoe  
Dalam nanggroe Paridoh Taman

Hate sosah hana bagoe  
Teuduek sidroe po bangsawan  
Ka teuingat po samlakoe  
Keu cut putroe bungong rihan

Ruhon Afda lam meuligoe  
Deungon ma droe cut analan  
Laen nibak nyan rakyat dumna  
Agam dara ka troh keunan

Keubeue lumo cit ka hase  
Meukhanduri peurayaan  
Cukop pakat wadi meuntroe  
Meuriam sagoe geutet yoh nyan

Su meuriam hana teudoh  
Sang runtoh Paridoh Taman  
Tajul Muluk bungong pade  
Teukeujot le tatkala nyan

Bak neusangka prang raya that  
Saleh pat-pat teuka lawan  
Neueu ureuengpi rame that  
Subra sangat inong agam

Keumeung jak eu Ruhon Afda  
~~Neutren~~ lanja po bangsawan  
Teungoh neutren po samlakoe  
Sinyak putroe ka troh keunan

Neutanyong le meunoe haba  
Peue na bala cuda badan  
Pane musoh keunoe teuka  
Peugah cuda bak lon tuan

Teuma seuot po sambinoe  
He adek nyoe kon pasai muprang  
Hajat ayah meukhanduri  
Rindu hate po jonjongan

Nyankeuh adek lon jak keunoe  
~~He~~ samlakoe jak peugah ban  
~~Sebab~~ ayah meukeurija  
Neuboh gaca gata intan

Meunan narit Ruhon Afda  
Po cut banta that sukaan  
Hana sapeue le beurkata  
Neutren lanja lheueh nibak nyan

Tajul Muluk nyang samlakoe  
Di meuligoe bak masa nyan  
Seugala inong nyang muda-muda  
Sajan banta duek meurumpa

Tan jiminah meung sideupa  
Keunan mata seukalian  
Ladom inong nyang ceulaka  
Sang beujiwa jicom yoh nyan

Ruhon Afda jikheun meunoe  
Bak samlakoe jipeugah ban  
Wahe adek cahya mata  
Lon boh gaca gata intan

Uroe nyoe lon puphon gaca  
Idin gata adek badan  
Tajul Muluk jawueub meunoe  
Bak lon sidroe dawa cit tan

Ban nyang hajat nibak cuda  
Hana dawa bak lon tuan  
Akan teutapi lon na hajat  
Neupreh siat cuda badan

Kareuna ulon na syeedara  
Syamson Akba nyang analan  
Ayah bundapi tan sinoe  
Dalam nanggroe Syarikatan

Patot cuda lon mupakat  
Meunan hajat cuda badan  
Meunyo hana lon mupakat  
Hana mangat bak lon tuan

Gop upat ceula da meuubon  
Geukheun ulon seutia tan  
Bitpih meunan da boh hate  
Ban nyang pike cuda badan

Teuma seuot Ruhon Afda  
He adekda deungo laman  
Meunyan adek bek tatakot  
Meunyo bak buet keubajikan

Meunan narit Ruhon Afda  
Banta muda tahe heran  
Jeuetkeuh dumnan lon peuhaba  
Peulinggo Pura pi cit meunan

Hana kureueng ubé seuma  
Meukeurija hana reunggang  
Uroe malam meukeurija  
Macam rupa dum peurasan

Peulinggoe Pura Taman Paridoh  
Subra riöh hana macam  
Mupeurasan hana teudoh  
Meugeureupoh uroe malam

Tajul Muluk nyang samlakoe  
Peurdana meuntroe sinan sajan  
Huleebalang meuntroe kali  
Di keue doli duek meurumpa

Laen rakyat dum sinaroe  
Raja nanggroepi di sinan  
Teungoh-teungoh peugah haba  
Neuteupok pha cut bangsawan

Ka teiduek le aneuk raja  
Syamson Akba geurasi nan  
Nyankeuh sakti raja naga  
Lam keumala keunyataan

Nyankeuh baro lahe nyata  
Syeedara banta analan  
Teuma marit Syamson Akba  
Di jeumala dua tangan

Peue na hajat po meukuta  
Keupeue hamba neupanggelan  
Tajul Muluk jawueub sigra  
He syeedara deungo laman

Lon ka teulhon han le ija  
He syeedara pakri jalan  
Meunyo hana tulong gata  
Jeuheut nama bak lakuan

Teuma seuot Syamson Akba  
Po meukuta bek sosahan  
Soe keumeung poh ampon deelat  
Peugah leugat bak lon tuan

Teuma seuot bungong pade  
Tan soe taki lon he intan  
Nyang jeuet lon kheun haba meunoe  
Lon keumeung woe bak cut intan

Lon woe bak Meungkawali  
Jinoe pakri adek badan  
Tapuwoe lon bak buleuen nyoe  
Ubak putroe nyang analan

Akan teutapi he syeedara  
Han sapeue na di lon tuan  
Ulon harap nibak gata  
Meunyo cit na keumudahan

'Oh nan narit po jroh rupa  
Syamson Akba teukui yoh nyan  
Tangah u langet teukui u bumoe  
Pahlawan droe meuhei rijang

Teuka reudok deungon tipeuen  
Lam uteuen teubiet pahlawan  
Deungon rakyat muploh katoe  
Nyum lham nanggroe Paridoh Taman

Asoe nanggroe yo ngon atot  
That teumakot jikalon ban  
Peurdana meuntroe deungon raja  
Miseue geumpa leungo badan

Teuma marit po samlakoe  
Tuanku droe bek syugolan  
Bukon musoh keunoe teuka  
Adek hamba nyang pubuet nyan

Syamson Akba ampon deelat  
Adek sahabat di lon tuan  
Meunan neukheun banta ahli  
Mangat hate dum sibarang

Lheueh nibak nyan padum lama  
Syamson Akba hei pahlawan  
He syeedara dum sinaroe  
Deungo kamoe dumna rakan

Peudong kuta ngon meuligoe  
Tujoh uroe beu hase nyan  
Pahlawan ngo sabda doli  
Jibeudoh le seukalian

Jideumpek le pahlawan Sadon  
Rakyat meuhimpon dalam awan  
Pahlawan teukui u bumoe  
Kuta beusoe teudong sinan

Cukop hase ngon meuligoe  
Indah han soe takalon ban  
Syamson Akba teupok jaroe  
Tujoh putroe teudong keunan

Laen nibak nyan ureueng binoe  
Ribee katoe bak bilangan  
Juho Alam pahlawan tarek  
Jireutek dua blah tangan

'Oh jireutek dua jaroe  
Le that bagoe troh peurasan  
Geundrang tambo ngon napiri  
Seurune kale pi na sinan

Datok Jani pahlawan kha  
Jisrom ija dalam awan  
'Oh troh keudeh dalam mig  
Kapai raya jeuet le rijang

Kapai teureubang indah rupa  
Han sapat na nyang sa ngon nyan  
Teuma beudoh Meurak Diwangga  
Nyang keupala dum pahlawan

Jipaleng le kanan kiri  
Ngieng u bumi tangan u mayang  
Ateueh ulee jaroe jikeubah  
Jihah babah raya han ban

'Oh ban jihah babah raya  
Asap meubura teubiet sinan  
Dalam asap he teungku droe  
Jeuet le nanggroe luah han ban

Nanggroe baro indah rupa  
Hana nyang sa dalam alam  
Ngon sipai muploh laksa  
Dum seunjata nibak tangan

Jaga kuta ngon istana  
Han ek kira bak bilangan  
Ladom taeu gulam beude  
Ulee ili atueuh jalan

Ngon meuriam han peue peugah  
Po tallah dum nyang tuban  
Han ek teelan tariwayat  
Maklum sahibat buet bangsawan

Bak masa nyan wahe sabat  
Sang kiamat bak lakuan  
Asoe nanggroe agam dara  
Miseue geumpa leungo badan

Taman Paridoh Peulinggo Pura  
Rakyat dumna keutakutan  
Agam inong klik meu'a'a  
Ladom hei ma ladom hei wang

Saboh macam di ureueng binoe  
Jimat lakoe ka roh tuan  
Nyang di tuan saboh lagee  
Mat meulintee nibak badan

Sira jiwoe jikheun lagee  
Neuba kee-kee teungku sajan  
Le that ureueng seudee ratee  
Gadoh malee inong agam

Bahkeuh 'oh nan kaman dilee  
Tango lagee lon peugah ban  
'Oh lheueh cukop sianeka  
Po jroh rupa tren le yoh nyan

Tajul Muluk nyang samlakoe  
Neuduek sidroe dalam taman  
Troph le keunan Ruhon Afda  
Bak cut banta nyang analan

Teungoh-teungoh peugah haba  
Syamson Akba troh le keunan  
Jisujud le ubak banta  
Jaroe dua beuot meulayang

Ampon tuanku payong nanggroe  
Ka troh lon woe po jonjongan  
Ban nyang hajat tuanku droe  
Hase sampoe seukalian

Tajul Muluk jawueb pantah  
Bu meutuah adek badan  
Jinoe tawoe he adekda  
Ubak tandra seukalian  
  
'Oh troh' keudeh gata teuka  
Uroe lusa troh lon tuan  
Seureuta deungon meuntroe muda  
Ngon keukanda wahe intan

Meunan takheun dalam kuta  
Bak syeedara dum pahlawan  
Tajul Muluk meunan kata  
Syamson Akba beudoh rijang

Ban nyang suroh nibak raja  
Tan meutuka bungong rihan  
Pahlawan tujoh peukeumah droe  
Malam uroe teungeutji tan

Jipreh teuka po samlakoe  
Malam uroe mupeurasan  
Teiduek 'oh nan saboh leua  
Ruhon Afda marit yoh nyan

Jitanyong le ubak banta  
Peue suara dalam awan  
Pane nanggroe lam awan migas  
He adekda tapeugah ban

Meuligoe jroh lon eu rupa  
Seuot sigra banta seudang  
Nyankeuh nanggroe wahe cuda  
Adek hamba nyang buatan

Meuna idin bak Rabbana  
Uroe lusa lon beurjalan  
Ruhon Afda seuot bagah  
Insya Allah adek badan

Jinoe adek ulon gisa  
Idin gata wahe intan  
Meunan jikheun Ruhon Afda  
Jiwoe lanja lheueh nibak nyan

'Oh troh jiwoe bak ayahda  
Peugah haba laju yoh nyan  
Padum lawet teuma dudoe  
Ka troh sampoe bak tanggohan

Uroe. Seunanyan buleuen peuet blah  
Neucok langkah bungong peukan  
Geucok langkah bandum rata  
Marit banta nyang analan

Di istana saboh laku  
Deungo teungku lon peugah ban  
Raja hekeumat nyang keu raja  
Adek banta nyang analan

He syeedara dum sinaroe  
Raja jinoe heundak beurjalan  
Meung beurangkat raja nanggroe  
Beudoh jinoe peugot jalan

Beu hase le deungan siat  
Peugot sabat jalan intan  
Pahlawan tujoh beudoh sigra  
Jiteupok pha pantah han ban

Teubiet asap meubura-bura  
Rakyat teuka di dalam nyan  
Jipeugot le jalan raya  
Meuh suasa batee intan

Dalam nanggroe Peulinggoe Pura  
Meukeurija bak masa nyan  
Geupreh-preh woe banta muda  
Agam dara laloe sinan

Hana jieh malam uroe  
Dawok laloe ngon peurasan  
Teungoh-teungoh jimeunari  
Jikalon le sidroe rakan

Leumah jieu jalan raya  
Hu meuahya miseue intan  
Phon bak bineh kuta nanggroe  
Hingga sampoe dalam awan

'Oh ban jieu meunan bagoe  
Jikheun meunoe ubak rakan  
He syeedara dum sinaroe  
Han lon tupeue bala Tuhan

Jeh takalon di lua kuta  
Sinan mula troh lam awan  
Han tom lon eu meunan rupa  
Beuneung raja troh lam awan

Kadang-kadang teuka bala  
Buet Rabbana han tatuban  
Ban jideungo meunan haba  
Jingieng teuma seukalian

Inong agam rioh subra  
Jikheun bala ka troh datang  
Ladom jiplueng dalam kuta  
Ubak raja jak peugah ban

Nyang ladom jiplueng u lua  
Bak jikira ek lheueh badan  
Nyang di inong saboh bagoe  
U meuligoe jiek curam

Jijak peugah ubak putroe  
Ampon kamoe he cut intan  
Ampon po cut di jeumala  
Beuneung raja keulaheran

Han tom lon eu meunan rupa  
Hu meucahya miseue intan  
Phon teubiet lam parek raya  
Keudeh punca dalam awan

Meunan jikheun bak putroe ti  
Meungkawali beudoh rijang  
Jibuka le jeundila kaca  
Jipeunyata yoh nyan rijang

Teuma leumah jingieng nyata  
Hana nyang sa meucahya trang  
Na sikeujab putroe tahe  
Jideungo su meuribee ban

Teuma marit Meungkawali  
Nyankeuh sakti cut bangsawan  
Yoh nyan jikheun uleh putroe  
Bak sinaroe dum dendayang

Nyankeuh sakti po samlakoe  
He cuda droe bek sosahan  
Ban jideungo meunan haba  
Jitren lanja seukalian

Jitren u yub bandum rata  
Jijak mita bandum rakan  
'Oh meuteumeung jipeugah le  
Wahe akhi bek sosahan

Nyankeuh sakti po samlakoe  
Tanda neuwoe bak cut intan  
Meunan neukheun Meungkawali  
Ubak kami neupeugah ban

Teungoh-teungoh dong meututo  
Troh le lalo guda kandran  
Lam blang raya guda lalo  
Rakyat pi le inong agam

Ngon peurasan rupa-rupa  
Hana nyang sa dalam alam  
Ayah putroe Meungkawali  
Meuntroe wadi neuhei rijang

Troh le keunan dum peureugi  
Raja doli buka kalam  
Wahe meuntroe nyang seutia  
Jak tueng sigra bungong rihan

Deungon rakyat bandum taba  
Haria deungon ben peukan  
Ban jideungo meunan haba  
Teubiet lanja dum sibarang

Inong agam bandum jiba  
Jak tueng banta nyang analan  
Nyang jak di keue bungong kipah  
Payong teuhah seukalian

Lom likot nyan ureueng tuha  
Aneuk dara di likot nyan  
Taeu jjak santeut banja  
Payong sutra nibak tangan

Rotdeh geupreh rotnoe geujak  
Ka meurumpak teuma yoh nyan  
'Oh meuteumeung dua pihak  
That meuhayak mupeurasan

Diwa Hamilah nyang sambinoe  
Dalam nanggroe saboh padan  
Deungon sireutoh di rakan droe  
Teubiet jinoe bungong rihan

Sidroe dendayang nyang mat payong  
Jipeutudong putroe intan  
Trok le keunan tuan putroe  
Meurumpok nyoe ngon bangsawan

Ban meurumpok he syeedara  
Jaroe dua beuot rijang  
Lom jitumpoh ngon suara  
Ampon hamba po jonjongan

Lon nyoe miseue saboh piala  
Bak srah muka cut bangsawan  
Tabeue masen ie lam gaca  
Bek neukuta keumarahan

Bukon sayang putik iboh  
Peunajoh cicem meukawan  
Assalamalaikom meuh seuneupoh  
Pakon trep troh keunoe datang

Aneuk bayeuen di cong iboh  
Leukek utoh meuen bak taman  
Tho ngon ranup dalam bungkoh  
Lon preh-preh troh po jonjongan

Bukon sayang mirahpati  
Nibak gaki gleueng kunengan  
Bek tuanku sinoe lawi  
Sayang nuri dalam taman

Sianeuk bu tan jipajoh  
Meunggoh lom troh cintra intan  
Meunan jikheun Diwa Hamilah  
Seuot pantah putroe seudang

Ruhon Afda jawueeb meunoe  
Deungo kamoe he ma badan  
Alaikom salam he ma putroe  
Nibak kamoe muliaan

Leukek bangguna roh lam taloe  
Sayang han soe takalon ban  
Nyang jeu et lama keunoe sampoe  
Trep that kamoe dalam hutan

Padum lawet dalam laot  
Riyeuek bapot he ma badan  
Adat kon tulong Tuhan Ma'bud  
Kalheueh mawot cintra intan

Aneuk musang di cong iboh  
Teungoh pajoh boh rambutan  
Ranup nyang tho dalam bungkoh  
Singoh neuboh he ma badan

Cempala nyang bulee got  
Di cong beunot bineh jalan  
Meuna umu po bungong crot  
Troh jiseutot dalam awan

Meunan jikheun putroe indah  
Diwa Hamilah seuot rijang  
Diwa Hamilah marit meunoe  
Deungo kamoe he cut intan

Puteh-puteh bungong geutoe  
Angen tampoe musem hujan  
Kamoe bandum nyang troh keunoe  
Jak tueng putroe ngon bangsawan

Diwa Hamilah meunan narit  
Seuot nyang bit putroe intan  
Diwa Rakna Keumala Sari  
Nyan esteuri di sultanan

Insya Allah wahe·umi  
Nibak kami hajat meunan  
Meunan neukheun bungong kipah  
Diwa Hamilah mumat tangan

Bandua si mumat jaroe  
Geujok dudoe ngon bungkosan  
Putroe pajoh ranub lam karah  
Diwa Hamilah geukheun yoh nyan

Udeh jinoe dalam kuta  
Deungan hamba bungong rihan  
Tamong laju teuma sigra  
Deungan tandra seukalian

Huleebalang meuntroe wadi  
Teumpat geubri meuatoran  
Lheueh nibak nyan teuma dudoe  
Po samlakoe peuek rijang

Geupeudeuk le di seuramoe  
Bantai pудoe tampok intan  
Tajul Muluk neupiyoh le  
Teungku kali neukheun yoh nyan

Jinoe banta lon peunikah  
Ngon cut indah nyang analan  
Po samlakoe jaweueb bagah  
Ban nyang titah guree laman

Teungku kali kheun bismillah  
Alhamdulillah lheueh nibak nyan  
Lon peunikah banta ahli  
Ngon putroe ti nyang peurawan

Tajul Muluk neujaweweub le  
Kabui kami seukalian  
Teuma geupeuek u meuligoe  
Bak cut putroe nyang analan

Troh bak pinto putroe muda  
Sidroe majap teupreh sinan  
Geumat ngon ie lam seurahi  
Geusrah gaki cut bangsawan

Lheueh nibak nyan banta muda  
Laju jiba bak cut intan  
Jipeudeuk le po jroh rupa  
Ateueh tika meuh ngon intan

Teuma peurab Meungkawali  
Di keue doli duek meurumpan  
Cok le ranup dalam bate  
Jisuleueng le keu sulotan

Na sikeujab duek beureunti  
Geubeuot le ngon hidangan  
Troh le majap keunan teuka  
Sanggoi raya pinah rijang

Teuma geusrah jaroe banta  
Seureuta geubuka hidang  
Makeuen tuanku bu ngon sira  
Nanggroe hamba jeuoh peukan

Teuma seuot banta muda  
Makeuen sama he ma badan  
Teuma makeuen sama-sama  
Putroe muda ngon sulotan

'Oh lheueh makeuen po jroh rupa  
Hidang raya pinah rijang  
Teuma malampi ka jula  
Banta muda jak tidoran

Ateueh geuta nyang indah that  
Dua sapat ngon cut indan  
Hana peue le lon riwayat  
Meung buet deelat han lon tuban

Hingga teuma beungoh uroe  
Tren jak manoe dua sajan  
'Oh lheueh manoe suci asoe  
Troph le sampoe ngon hidangan

Tajul Muluk ngon putroe ti  
Neumakeuen le dua sajan  
Meunan sabe geunap hari  
Banta ahli ngon cut intan

Han tom jarak meung sipade  
Hana tom cre uroe malam  
Hamilah Katon deungon doli  
Mangat hate han meuban-ban

Padum lawet sinan lawi  
Deungo akhi lon peugah ban  
Poteu raja nyang juhari  
Meuntroe wadi neuhei keunan

Imum geusyik tandi waki  
Rakyat sare seukalian  
'Oh troh keunan dum peureugi  
Jiangkat le dua tangan

Deelat ampon payong nanggroe  
Rakyat sinaroe habeh datang  
Teuma sabda raja nanggroe  
Wahe meuntroe nyang analan

Tajak gata bak samlakoe  
Di meuligoe bak cut intan  
Lakee langkah siat keunoe  
Rindu kamoe tapeugah ban

Meunan sabda raja nanggroe  
Beudoh meuntroe laju jalan  
'Oh troh keudeh u meuligoe  
Angkat jaroe le meulayang

Ampon tuanku di jeumala  
Patek hamba peusurohan  
Neuyue jak tueng tuan hamba  
Keudeh sigra bak sulotan

Tajul Muluk nyang bahgia  
Bak ayahda neujak yoh nyan  
'Oh sare troh ubak raja  
Seumbah sigra po jonjongan

Poteu raja sambot pantah  
Bu meutuah bungong rihan  
Taduek keunoe bungong pade  
Rindu hate lon hana ban

Tajul Muluk nyang juhari  
Ka neuduek le di hadapan  
Na sikeujab neuduek banta  
Tren le sabda bak sulotan

Wahe **aneuk bungong** jeumpa  
Lon ka tuha **wahe intan**  
Nyan pat kuta **ngon meuligoe**  
Nyan pat putroe **bungong peukan**

Nyan pat rakyat wadi meuntroe  
Jeuoh **ngon toe seukalian**  
Takeurajeuen uleh gata  
Gantoe hamba **aneuk badan**

Teuma jaweueb banta muda  
Ban nyang suka deelat laman  
**Muzafasyah teuma kata**  
Bak peurdana seukalian

Wahe meuntroe nyang seutia  
Nyoe **aneukda gantoe laman**  
Peue nyang hajat bandum gata  
Peugah sigra nibak gop nyan

Meunan narit poteu raja  
Peurdana seuot le rijang  
Deelat ampon po meukuta  
Di jeumala patek laman

Ban nyang titah seuripada  
Kamoe dumna that sukaan  
Habeh haba **ngon samlakoe**  
Mumat jaroe **ngon sulton**

Lakee idin **bungong geutoe**  
Laju neuwoe bak cut intan  
Teutap raja **peutimang nanggroe**  
Teutap putroe **peutimang badan**

Masa keurajeuen po samlakoe  
Hana sapeue keukurangar-  
Hukom ade hana bagoe  
Rakyat **nanggroe that sukaan**

Troh meusyeuhu jeuep-jeuep nanggroe  
Po samlakoe that adelan  
Timu barat ureueng teuka  
Maniaga laju keunan

Aman nanggroe hana tara  
Rakyat dumna that sukaan  
Bab peurtama 'oh noe reuda  
Bab keudua lon peugah ban

Bungong jeumpa puteh mirah  
Bee meupeuah bungong asan  
Teuduek 'oh noe saboh kisah  
Laen ulah lom lon peutrang

Jakarta Nopember 1982  
Dialih aksarakan dan  
disunting oleh  
Ramli Harun



PN BALAI PUSTAKA — JAKARTA

Perpus  
Jend